


مكتبة الزمن



تأليف
مروة حمدي



تليفاكس: ٥٧٤٤٣٨٠ - ٠٢ - الإسكندرية





مكتبة الزمن

تأليف
مروة حمدي

الطبعة الأولى

2012م

الناشر

دار الوفاء للنشر والطباعة والنشر

تليفاكس : 5274438 - الإسكندرية

بسم الله الرحمن الرحيم

مقدمة الكتاب

إلى كل مصرى أصيل لديه ضمير أو بعض ضمير أو حتى بقايا ضمير متهالك أهدى إليه هذا الكتاب كى يكون مرآة تعكس له فيها جميع إيجابياته وسلبياته فى الحياة وليعرف ما هو يجب فعله وما يجب الابتعاد عنه، فهى دعوة لكل مصرى فى المقام الأول ولكل عربى وكل مسلم أن يراقب الله أولا وضميره ثانيا ويعزم التغيير من داخله قبل غيره لأن تغيير النفس يأتى بعده مباشرة تغيير الكل من حولنا فلا بد أن نتكاتف ونقف بدا واحدة أمام الخطأ والظلم لنعلو ببلدنا العظيم ونصل لأفضل جال ونصبح أكبر وأعظم شعب مصريين وعرب ومسلمين قوة واحدة وطن واحد، لذلك يجب رفع شعار الاتحاد قوة كما أمرنا الله ورسوله حتى نظل خير شعوب العالم عن جدارة واستحقاق كما عهدنا من قبل ...

وأخيرا وليس آخرا أحب أن أهدى خالص تحياتى إلى جميع أفراد أسرتى وإلى كل فرد وقف بجانبى وساعدنى وشجعنى لظهور أول مولود لى فى التأليف والكتابة إلى النور واتمنى من كل قلبى أن أكون قد وفقت وأن أكون عند حسن ظنهم بى، وشكرا ...

المؤلفة / مروة حمدى

Email :

Maktabetelzaman@yahoo.com

مشهد (1) نهار - داخلي

حجرة مكتب مقبل يكتب على الشاشة سنة 2100

تظهر حجرة واسعة كل مابها مصنوع من الزجاج ، المكتب والكراسى والمكتبية الخلفية للحجرة ، اما الحوائط فمن الزجاج العاكس وكذلك باب الحجرة أيضا.....

يوجد بها بعض الاجهزة الالكترونية الغير متعارف عليها حيث انها غريبة الشكل وغير تقليدية.....

هنا يفتح الباب فجأة ويدخل منه البروفيسور العالم مقبل ومن خلفه الدكتورة وهج مسرعة ويبدو على وجهها التأثر الشديد من شئ ما...
يجلس مقبل الى مكتبه الموضوع عليه يافطة زجاجية محفور عليها البروفيسور العالم مقبل شعيب جيد وبكل هدوء.....

مقبل انا مش فاهم يادكتورة وهج انتى مكبرة الموضوع كده ليه تجلس وهج امامه.....

وهج بأقول لحضرتك يا بروفيسور مقبل فيه تلاعب من بعض الباحثين فى مدينة العلماء، انا شفت اتنين بيحاولوا يسرقوا ابحاث مش بتاعتهم عشان ينسبوا لنفسهم
بضحك مقبل برزانة.....

مقبل اومال لو ما كنتيش معانا هنا من اكثر من سنتين وعارفة كويس ان مافيش لا كبيرة ولا صغيرة بتعدى علينا
وهج طب ممكن افهم ليه ما تمسكوش لحد دلوقتى واتعملهم فصل من المدينة

مقبل عيبك انك مندفعة ؛ احنا مراقبينهم كويس ومحدث منهم
حيقدر يفلت منا ، انتى ناسية ان المدينة كلها اجهزة

مراقبة صوت وصورة 24 ساعة --- سيبيهم يفرحوا

شوية بوجودهم هنا

تتظر وهج الى الارض وكأن مقبل قد غلبها بالكلام.....

مانتسش اننا فى ازهى عصر من العصور اللى مرت

على مصر من قديم الازل

ازاى يابروفيسور مقبل

وهج

يقف مقبل من مكانه.....

مقبل تعالى معايا مكتبة الزمن وانتى تعرفى ازاى

مقبل

مشهد (2) نهار - داخلى

حجرة مكتبت الزمن

مقبل ووهج يدخلوا حجرة واسعة وكبيرة جدا مليئة بأجهزة

الكترونية كثيرة وشاشات مختلفة الاحجام تعمل جميعها باللمس اى دون

ازرار بارزة بل ملساء وملونة بألوان مختلفة

فمنها الازرق والاحمر والاخضر ومنها البرتقالى والابيض

..... يوجد بوسط تلك الاجهزة بوابة معدنية بلون البرونز وكأنها

ستفتح الى حجرة اخرى عليها بعض الازرار الملساء ايضا ومدون عليها

بعض الحروف والارقام العربية وبجانبها شاشة متوسطة المساحة يقفا

امامها حيث يضغط مقبل على بعض الحروف والارقام.....

مقبل

لازم تعرفى يادكتورة وهج ان مصر من آلاف السنين مر

عليها ازمانات من كل شكل ولون وبعضتها وقوتها قدرت

تتغلب عليها فى الاخر وتطلع من كل محنة اقوى

من الأول

يلتفت اليها مكملًا.....

واضح انك ماقريتيش تاريخ بلدك كويس وعشان كده

حاوريكى شوية حاجات حتقوى ثقنك فينا اكثر

وهج العفو بابروفيسور انا بس مش عايزة بعد كل التقدّم الللى

وصلنا له ده نرجع نتأخر تانى وشوية شباب غير مسئول

حيكون مسئول عن البلد بعد كده يوديها فى داهية

مقبل يعود للازرار بالبوابة....

مقبل لاماتخافيش انا حاوريكى دلوقتى اول محنة اتعرضنا ليها

فى التاريخ خرجنا منها منتصرين ازاى

نضئ الشاشة ويظهر عليها مشهد لحرب ما.....مقبل يفتح البوابة.....

مقبل تعالى معايا عشان تشوفى بنفسك ع الطبيعة

وهج ومقبل يدخل المكنبة معا من خلال بوابتها.....

مشهد (3) نهار - خارجى

الصحراء

وهج ومقبل يقفا معا بمكان شاسع بوسط الصحراء تدور به حرب

ما... تلك الحرب تبدو انها منذ ايام الفراعنة حيث فريق يرتدى ملابس

فرعونية وفريق اخر من الصلّع يرتدون ملابس اخرى مختلفة.....

وهج ومقبل ينظران الى الحرب الدائرة عن بعد وهو يشرح لها.....

مقبل دى اول حرب حصلت فى تاريخ مصر بين المصريين

والهكسوس.

الحرب مازالت دائرة من امامهما....

مقبل:

الهكسوس دول كانوا لاجئين مالهومش بلد تأويهم دخلوا

مصر حبة حبة، وعشان احنا طيبين وبنرحب بالضيوف

استغلوا ده لحد مااحتلونا وسرقوا ارضنا حتة حتة فقررنا

نقف لهم ونطردهم وزى مانتى عارفة دايماً بنحس بـده

متأخر شوية لأن سرعة البديهة عندنا كانت بطيئة حبتين

هنا يقترب منهما مصرى قديم متفاجئاً بشكلهما الغريب من حيث الملابس

والشكل فيندهش منهما ويقف متسمر امامهما لفترة وجيزة

هنا تأتى عجلة حربية مسرعة راكبا عليها احد الهكسوس فيطيح بالمصرى

من امامهما بسرعة فيطير بالهواء.....

مقبل

هم صحيح اللي اخترعوا العجلات الحربية دى لكن

المصريين كانوا شاطرين اخدوا فكرتها ونفذوها

وحاربوهم بنفس سلاحهم .

وهنا تلقى رأس مقطوعة لاحدى افراد الهكسوس امام ارجلها.... فعندما

يروها ينزعجا بارقى الاعين فتفتح الرأس عيناها فتراهما بمنظرهما

الغريب الغير مألوف لعصرهم فتصرخ الرأس فى نفس الوقت الذى

يصرخا فيه مقبل ووهج من منظر الرأس المقطوعة.....

مقبل

(بفزع) انا بأقول ياللا نرجع ؛ احسن الفراعنة هم اللي

يتهمزوا ويتغير التاريخ بسببنا

مشهد (4) نهار - داخلي

حجرة مكتب الزمن

يخرجوا وهج ومقبل من بوابة مكتبة الزمن الى الحجرة الواسعة
مرة ثانية وهما يلتقطان أنفاسهما وكأنهما كانا يهربان من شئ مخيف...
مقبل يغلّق البوابة من خلفه.....

مقبل الحمد لله نفدنا بأعجوبة.... احنا ممكن نكمل تاريخ مصر
من الشاشة بس

وهج انا بأقول كده برضه....
مقبل يلتفت اليها.....

مقبل آه بس انا حاعمل كده عشان وقتي ثمين ومش فاضى لكن
رسالتك اللي بتحضرها عن مشاكل مصر عبر التاريخ
لازم تكون فيها معايشة منك بالواقع

وهج (بدشة) اשמعنى يابروفيسور مانا ممكن احضر رسالتى
من الشاشة بس

مقبل لا ياوهج يابنتى انتى عايزة تاخدى درجة العلماء نظرى
وتشمتى الباحثين اللي بتشتكى منهم فيكى ويقولوا فيه
وساطة وللا ايه انتى عارفة كويس ان مافيش عندنا فى
مصر حاجة اسمها وساطة ، كله لازم يتعب عشان يوصل
تتظر وهج الى الارض بخجل.....

وهج وحضرتك عايز رسالتى فى انهى فترة
مقبل يفكر ويقلب بالازرار على الشاشة فى تاريخ مصر حيث تظهر
مشاهد لما يسرده عليها.....

مقبل

عندك مثلاً من بطولاتنا وصمودنا ادام الازمات بعد
الهكسوس..... فيه بطولات مينا فى توحيد القطرين...
وعندك فتوحات اسكندر ومن بعدها عمرو بن العاص
وانتصار صلاح الدين ع الصليبيين وقطز ع التتار...
وفيه خروج الفرنسيين من مصر وكمان الانجليز.... ده
غير ثورة 23 يوليو وبعدها حرب 73 وآخرهم طبعاً اتحاد
العرب وطردهم للامريكان والاسرائيليين من الوطن
كله..... بصى كل ده احنا عارفينه وحافظينه لكن احنا
عايزين فترة تكون مليانة ازمات ويكون فيها مشاكل
كثيرة..... عايزك ترصدى شخصية من الزمن ده
وتعملى عليها بحثك ورسالتك

وهج

ودى انهى فترة يابروفيوسور؟

مقبل يلتفت اليها بعد ان يطفئ الشاشة.....

مقبل

(بعمق شديد) ممممم بداية القرن اللى خلص السنة
اللى فاتت

مشهد (5) ليل - داخلى

حجرة نوم وهج

وهج تجلس على كرسى بحجرتها تخرج من ذراعه الايسر شاشة
ليست بصغيرة اما الذراع الايمن فبه بعض الازرار..... وهج امام
الشاشة منهكة فى البحث عن شئ ما حيث تظهر على الشاشة بعض
المعلومات التى تقرأ فيها بشغف حتى تصل لما تريده.....
هنا ترفع رأسها بابتسامة تتم عن نجاحها فيما تبحث عنه.....

مشهد (6) نهار - داخلي

حجرة مكثبات الزمن

وهج تقف امام الشاشة التي بجانب البوابة وتقلب بالازرار الموجودة حيث تبحث عن العصر المناسب لبدء رسالتها كما طلب منها مقبل في بداية القرن ال21.....

وهنا وبعد بحث مطول يظهر على الشاشة حارة من حارات الاسكندرية القديمة بمحرم بك ثم صالة بمنزل ما متواضع ويبدو انه ذو طراز قديم والحوائط والاسيرة متهالكة بعض الشيء وبوسط الصالة منضدة مربعة متوسطة الحجم وعليها جهاز تلفزيون كبير الحجم ويبدو عليه ايضا انه من الطراز القديم..... يقف شابا ويدعى راضى وهو يقوم بتركيبه بعد اصلاحه حيث يقف بجانبه صاحب البيت ويدعى سيد..... تثبت وهج على هذا المنظر ثم تبدأ فى مراقبة راضى..... وهنا تقترب الكاميرا من الشاشة حتى يصبح المشهد بكامل الشاشة ويكتب عليها سنة 2010....

مشهد (7) نهار - داخلي

صالة شقة سيد

راضى يكون قد انتهى من تصليح جهاز التلفزيون حيث يقوم بتفكيكه ويقف بجانبه سيد صاحب الشقة....

راضى تمام... كده التلفزيون رجع احسن من الاول

سيد تسلم ايدك ياراضى...

راضى بدير التلفزيون كى يفتحه ويختبره اذا كان يعمل جيدا ام لا....

سيد إلا بالحق ياراضى حستفتح محل الصيانة بتاعك امتى

راضى ربنا يسهل ياسيد بس نخلصوا من موضوع التراخيص
ونعتروا فى موظف التراخيص اللي منعرفوش ببيروح فى
انهو داهية ده....

يعمل التلفزيون.....

راضى ها ؛ ايه رأيك بقى ياسيد ؟

سيد ينظر باعجاب ثم يفاجأ....

سيد ايه ده!!.... ده طلع بالالوان....

راضى (بتعجب) ليه هو كان ابيض واسود!!

سيد بقالنا 17 سنة جايبينه وبستفروا عليه على انه ابيض

واسود.... تسلم ايديك اللي تستلف فى حرير ياراضى

وهنا تظهر ذبذبات على الشاشة تدل على ان هناك موبايل سوف يرن

..... ينظرا الى الجهاز بدهشة....

سيد ايه ده... التلفزيون شكله ماستتحمش الالوان ----

(وهو يبتعد عنه) ده حيستفرقع وللا ايه ...

وهنا يسمعا صوت رنين موبايل مكتوم.....

راضى ده موبايل بيرن ياسيد.... ماتبعد موبايلك ياعم حتبوظلى

شغلى

سيد انا نوبالى جوة ياراضى....

سيد يقرب أذنه من التلفزيون....

سيد الصوت طالع من هنا ياراضى...

راضى ده تلاقيه بتاع المذبة دى....

يتوقف الرنين....

المذبة ألو... ايوه ... مين معايا....

راضى شفت ايه طلع الصوت من عندها

يستدير راضى كى يغادر.... يعود الرنين المكتوم مرة اخرى والذبذبات المتلاحقة على الشاشة.....

سيد لآبقى .. هو كل مانويالي المذيعه يسترن التلفزيون
حيستلخبط كده... انت استخليته حساس اوى ياراضى
والبرامج كلها باقت تليفونات.....

راضى يبحث عن موبايله بملايسه....

سيد مالك ياعم بتستدور على ايه ؟

راضى الموبايل بتاعى مش لاقيه

سيد لا لا لا لا... مافيش حد حرامى عندنا

راضى وانا قلت كده برضك...راح فين ده بس انا لسه متكلم فيه
راضى يبحث فى كل مكان.....

دور معايا كده.....

سيد يبحث معه هنا وهناك حتى يصل الى التلفزيون.....

سيد انا مستسمع الصوت مستطلع من هنا، صدقنى

يتوقف الرنين....

راضى طب هات موبايلك ورن لى كده...

يدخل سيد ثم يأتى بالموبايل وهو يطلب رقم راضى فيعاود الرنين....

راضى (بالم) ايه ده ... شكلى نسيت الموبايل فى بطن التلفزيون

سيد كده برضك.... حرام عليك ياشيخ ؛ اتارى التلفزيون

بيستوجع كل مايسترن... والعمل ايه دلوقتى يادكتور...

راضى (مضطراً) حنضطروا نفتحوا بطن المريض ثانى

مشهد (8) نهار - خارجى

بورصة حلموس

منظر على قهوة بالحارة عليها يافطة مكتوب عليها بورصة
حلموس..... راضى يجلس مع المعلم حلموس صاحب القهوة.....
حلموس مالك ياراضى... بقالك كام يوم كده شكك مش عاجبنى
أكنك شايل طاجن سنك
راضى أبدا يامعلم حلموس ، اصل كل حاجة جاية معايا بالعكس
حلموس الصبر... الصبر والرضا عشان ربنا ينولك اللى فى بالك
راضى هو فيه أكثر من كده رضا وصبر... ده حتى اسمى
راضى عبد الصبور
يضحك حلموس.....

حلموس خلاص يبقى ربنا حيفرجها
يأتى فتحى صديق وشريك راضى ويبدو عليه الغضب الشديد.....
فتحى المحل حيثفتح امتى ياراضى
راضى ينتفض ويصق الشاى الذى ارتشفه للتو....
راضى فيه ايه يافتحى خضنتى
فتحى مش وقت خضة ياخويا... رد على سؤالى...
راضى هى الخضة كمان ليها وقت ومعاد
فتحى ماتتوّهش معايا ياراضى المحل حفتحه امتى ؟
حلموس ماتتعد يافتحى كده وتستهدى بالله واتقاهموا بالعقل.....
يقف حلموس من مكانه.....

انا حاو صيلك على كوباية ينسون تروقك
فتحى وهو يسحب كرسيه ويجلس.....
فتحى مش عايز حاجة يامعلم حلموس شكرا

حلموس يربت على كتف راضى قبل ان يتركهما..... راضى ينظر الى
حلموس مشيرا نحو فتحي بسخرية....

راضى حيفرجها.....

فتحي ممكن اعرف مش بترد عليا ليه ياسى راضى

راضى يترك كوب الشاي بضيق...

راضى أرد عليك ازاي وانت داخل عليا بزعايبك ومش فاهم

قصداك ايه من السؤال

فتحي لأ انت فاهم قصدى كويس اوى..... بقالك اكثر من سنة

واخذ منى فلوس على انى حنشاركك فى محل الصيانة

بتاعك بعد مالبستنى السلطانية على اننا حنكسبوا ذهب من

وراه وأديتك كل اللي حيلتى واستخسرته فى بيتى وعيالى

ومن ساعتها ماشفتش منك لالبيض ولا اسود ، والمحل

لسة جايب ضرفه

راضى اومال لو كتش معاشرنى اليوم بيومه وعارف كل حاجة

وان فتح المحل عايز مصاريف اد ايه ، وانا ماطلبش

منك حاجة كله على دماغى..... انا اللي بنجرى على

تسجيل العقد والاشهار والترخيص وشغل التوضيب وانت

حاططلى ايديك فى الماية الباردة ده غير ظرف الموظفين

فلوس يعنى رشاوى بالمفتش هنا وهناك ؛ وأكنى ماشى

بزكية فلوس بافرق منها ومحدث عنده دم وعاييز يخلص

لى حاجة

فتحي ماطبعا عمال تبعت فى فلوسى براحتك؛ انا خلاص

معايش فلوس تانية

راضى ومين قالك يافالح انى بادفع من فلوسك فلوسك دى
انا خلاص دفعتها مقدمة شرا المحل وباقيت الإقساط
والرشاوى كلها من معايا

فتحى عامة الله الغنى عن دى شراكة وانا عايز ال7000 جنيهه
بتوعى ومتنازل ياسيدى عن فوايدهم

يخرج حلموس من داخل القهوة...

حلموس ياأخى حرام عليك حتبقى انت وحال البلد قاسيين عليه...
اومال فين الرحمة

فتحى مانا معزور برضك يامعلم رغيف العيش بنجيبوه
بالضالين ولأكننا بنشحتوا من الحكومة مش بندفعوا
تمنه... ولو وصلت الفرن متأخر ثانية عن الساعة 12
يبقى خلاص شطب ومافيش ؛ قول لى انت ده يرضى
ربنا يامعلم كانت اتوجدت الرحمة فى قلوبهم الاول

حلموس مهما يكن لازم تحس بصاحبك..... مهو كمان رايح جاى
متبهدل عشان المحل يقف على رجله تقوم انت كمان
تيجى عليه

فتحى ما انا لما ادبته الفلوس كُت محتاجها ودلوقتى محتاجها
اكثر وفاكرها حترجع لى وبزيادة بعد كام شهر معرفش
ان.....

حلموس (يقاطعه) خلاص يافتحى لبانتك زرقا.... ده كله بتاع ربنا.
مين عارف شايلك ايه ماتجيبش دلوقتى تضيع وقفك مع
صاحبك هدر

فتحى يحاول ان يهدأ..... راضى يقوم متضايقا.....

راضى سلام عليكموا يامعلم...

راضى يغادر القهوة دون النظر لأحد منهما.....

حلموس راضى... ياراضى ... تعالى يابنى ده انتوا اخوات
راضى يلوح بيده بعدم اهتمام فى ضيق من خلفه وهو مبتعدا.....

مشهد (9) نهار - داخلى

وحدة الزراعيص بسيدى جابر

منظر عام على مبنى التراخيص من الخارج ومنظر عام
من الداخل على الزحام الشديد من المواطنين والضوضاء الكثيرة وعدم
تواجد معظم الموظفين فى اماكنهم بل يوجد واحد او اثنان على الاكثر
بدلا من تواجد ستة راضى بالداخل منتظرا دوره ويكون قد
نفذ صبره.....

راضى وبعدين يا جماعة حنخلصوا امتى ؟ مش كده يعنى...
الموظف فيه ايه يا استاذ... انت عايز تعمل بلبله فى صفوف
الجماهير

راضى ده اللى ربنا قدرك عليه، تحدف لنا كلمتين سمعتهم من
الحياة اليوم.... تلاقىك مش فاهم معناهم
الموظف طب حضرتك عايز ايه دلوقتى

راضى عايز حقى... عايز اشوف وش الموظف اللى هنا
(يشير ناحية مكانه) ولو مرة واحدة قبل ما يموت
الموظف الاستاذ حسنين استاذن بدرى النهاردة ، تعالى له بكرة
بدرى شوية

راضى (بغضب اكثر) انا بقالى اكثر من 6 شهور باجيله فى
اوقات مختلفة وعمرى ماشفت خلقتة.... ماتسألوا عنه
يمكن يكون مات وللا حاجة وجيبوا لنا بداله بدل ما انتوا
موقفين حالنا ومصلحنا كده... وللا انتوا مابتحركوش

غير بالفلوس....

الموظفين عيب كده..... عيب اللي بتقوله ده.....

تتعالى بعض اصوات المواطنين.....

المواطنين والله عندك حق ياأستاذ.....

معاك حق والله فعلا.....

الموظف يشير الى الساعى فيذهب ليه الساعى ومن ثم يشير نحو

راضى..... الساعى يتوجه نحو راضى مقتربا منه.....

راضى قُلْتُس حاجة انا....

الساعى يااستاذ... مالوش لازمة الكلام ده.... انا حادلك على

طريقة تخصلك مصلحتك بسرعة

راضى (يقرف) وايه هى الطريقة دى بقى ان شاء الله

الساعى يهمس بأذن راضى وهو يشير اليه بيده بأن يخرج خارج المبنى

ويلتف حوله يمينا الى الخلف.... راضى تبرق عيناه ثم يصرخ فجأة....

راضى ابوة كده باحرامية يامستغلين ده انا حاوديكوا فى داهية

..... ان مابلغت عنكوا مابقاش انا.... تتعالى اصوات

المواطنين.....

المواطنين فيه ايه.... حصل ايه.....

راضى البيه عامل لى صفقة مع الموظف المحترم اللي مش

لاهيينه وقاعدين مستنيينه انه يروح يقعد ع القهوة اللي

ورا المصلحة ويسرب له العُملا واحد ورا الثانى بشرط

ندفعوله المبلغ المطلوب

الساعى (بخجل وتردد) انا قلت لك كده... انت كداب .. انت

بتتبلى عليا...

الموظف واضح انك بتاع مشاكل وحد زقك علينا

وهنا يظهر فجأة حسنين الموظف المطلوب..... راضى يراه يدخل من الباب الخلفى ويجلس بسرعة فى مكانه.....

راضى اخيرا ياراجل شفت وشك تصدق ليك وحشة

حسين خير يا جماعة ايه الدوشة دى ؟

راضى طبعا عامل نفسك عبده الالهيل

حسين معلش اتأخرت عليكوا شوية اصلى كنت فى الحمام الللى

فى الشارع الللى ورائنا اتفضلوا اقفوا طابور هنا ادامى...

راضى (بتهمك) اكيد رنة ع الموبايل هى الللى جابتك فى غمضة

عين كده

الجمهور يتحرك بسرعة ليقف طابور امام شباك حسين.....

اما راضى فيقف ينظر للناس متحسرا عليهم ومتألما بشدة.....

راضى سلبيين طول عمركو حنفضلوا سلبيين انتوا الللى بتضيعوا

حقوقكو بايديكوا... اشربوا بقى ، وكعوا وادفعوا

جاتكو الههم

يخرج راضى من المصلحة شبه مكتب.....

مشهد (10) نهار - خارجى

طريق البحر بسيدى جابر

راضى يسير مهموما متجها الى طريق البحر حيث كان يتمم

ببعض الكلمات من كثرة الضيق والملل.....

صوت راضى خلاص مابقاش فيه رحمة فى قلوب الناس..... مهمم

الفلوس وبس ، لكن ازاي ومنين ومن مين مش مهم

انشالله نقطع لهم من لحمنا وبرضك شغلهم والواجب الللى

عليهم ما بيثعملش..... فين الحكومة عامية عنهم فين...

فين....

يصل راضى الى طريق البحر نفسه ويقف قليلا منتظر كي يهدأ الطريق
حتى يعبر إلى الجانب الآخر ويصبح على رصيف الكورنيش كي يستوقف
مشروعا

راضى (مكملا) منكوا الله... خلاص مابقاش فيه حد عنده

ضمير.... مابقاش فيه حد بيعمل حساب لربنا.....

حتروحوا من ربنا فين....

عرض طريق البحر بمنطقة سيدى جابر واسعة جدا والسيارات هنا تسير
بسرعة جنونية فكلما حاول العبور يتردد خوفا من السيارات وبعد فترة
يحاول العبور جريا حتى يصل الى منتصف طريق البحر ويقف على
الرصيف ثانية قليلا حتى يحاول العبور مرة اخرى الى الجانب الاخر....
ينتظر قليلا ثم يهم بالعبور وهو يجرى كالعادة فتكون هناك سيارة مسرعة
جدا آتية وهى تتأرجح وسط السيارات الاخرى يمينا ثم يسارا فجأة رغبة
منها ألا تتوقف ولو للحظة او تعطلها عن السير سيارة اخرى امامها
وكأن طريق البحر ملكا لها او ليس به ارواحا يجب الحرص على
حياتهم.....

راضى يحاول ان يتفادها باعجوبة حيث انه قد اصبح بمنتصف الطريق
فلايستطيع التراجع ثانية بسبب سيارات اخرى مسرعة ايضا ولكن سيارة
اخرى أبطأ تكون مارة من جانبها وتتفادها هى الاخرى فتصدم راضى
ويقع ارضا فاقد الوعي.....

هنا تبدأ الناس فى التجمهر وتتوقف السيارة التى صدمته وتتوقف بعض
السيارات المارة....

مشهد (11) نهار - داخلي

حجرة مكتب الزمن

وهج تنتفض خوفا على راضى لما حدث له حيث انها لم تتوقع
هذا ابدا ان يحدث.....

مشهد (12) نهار - داخلي

معمل

باهر وعطا يجلسان معا بالمعمل حيث انهما الباحثين المراقبين من
قبل مسئولى مدينة العلماء بسبب تطفلهم لمعرفة افضل الابحاث فى المدينة
ومحاولة سرقة احدهم وانسابها لأنفسهم.....

باهر انا لفيت المدينة كلها مافيش ولا بحث شدنى لحد دلوقتى
عطا طب واللى يدلك على بحث جديد من نوعه ، بس بشرط
باهر (باهتمام) شرطك مقبول من غير مانقول بس قول بسرعة
لاحسن انا حاسس اننا قربنا ننكشفوا

عطا لا... الاتفاق الاول قبل مانقولك
باهر طب قول ياسيدى ياللا

عطا البحث اللي حاقولك عليه ده حنشاركوا فيه احنا الاتنين ،
يعنى حنقدموه مع بعض وينكتب عليه اسمينا احنا الاتنين

باهر ماهو ده كان اتفاننا من الاول
عطا (باطمئنان) اتفقنا... عارف الدكتوراة اللي اسمها وهج

باهر ايوة طبعا... ماهى دى اللي واقفة لنا زى اللقمة فى
الزور

عطا اهه احنا بقى ممكن نزيحوا اللقمة دى بسهولة

هی دلوقتی بقالها کام یوم معتصمة فی مکتبة الزمن معنی
کده انها بدأت فی البحث بتاعها، ودي احسن فرصة
نراقبها ونتابعوها من البداية عشان نكونوا على معرفة
کاملة باللی بتعمله

باهر ينظر للأفق وهو يهز رأسه مؤكدا على كلام عطا بأن الفكرة قد
اعجبته.....

باهر عشان تحرم تحشر نفسها فی اللی مالهاش فيه

مشهد (13) نهار - داخلي

حجرة مکتب الرمن

وهج منهمكة امام الشاشة تتابع ماحدث لراضی وتضغط على
بعض الازرار باهتمام ثم تراقب نتيجة مافعلت ومن ثم تعاود الضغط
باهتمام على بعض الازرار.... بينما هي هكذا يفتح باب الحجرة من خلفها
بهدوء شديد جدا حيث انها كانا باهر وعطا يراقباها عن كتب.....

وهج فجأة تقف وتفتح باب مکتبة الزمن ثم تلتقط سوارا معدنيا به
شاشة دقيقة وبعض الازرار الدقيقة ايضا ثم تلفه حول معصمها وتدخل من
خلال باب المکتبة ثم تتركه مواربا....

هنا يتسلا باهر وعطا الى داخل الحجرة مقتربان من الشاشة
الكبيرة ويقفا امامها مباشرة.....

باهر يضغط على بعض الازرار كي يفتح الشاشة ويتابع ولكنها
لم تظهر شيئا يحاول مرارا وتكرارا ولكن بلا جدوى.....

عطا يقف خلفه يتابع وهو قلقا ومتوترا من ان يدخل عليهما احد
حيث يعلق عينيه نحو الباب بين الحين والاخر.....

عطا هـا لسة برضه
باهر واضح انها قافلة على بحثها بكلمة سر او شفرة معينة
عطا من اولها كده.... يعنى مش حنعرفوا هى دخلت المكتبة
تدور على ايه
باهر استتى بس وماتوترنيش انا باحاول افكر ترتيب الزراير
اللى داست عليها....
يحاول عدة مرات اخر.....

مشهد (14) نهار - داخلى

حجرة رئيس مدينت العلماء

منظر على يافطة على باب كبير مكتوب عليه حجرة رئيس مدينة
العلماء..... تدخل الكاميرا الى داخل الحجرة فتكون شاسعة جدا
ومحاطة بكم هائل من الاجهزة الالكترونية والشاشات مختلف الاشكال
والاحجام..... وامام احدى الشاشات يقفا كل من العالم [مقبل] ورئيس
المدينة [رزين] يتابعان بعض النقاط والاشارات على شاشة من احدى
الشاشات الموجودة بالمكان ومن ثم يضغط مقبل على بعض الازرار
فتتحول النقاط والاشارات الى منظر فوقى لحجرة مكتبة الزمن وبداخلها
باهر وعطا امام شاشة المكتبة وهما يحاولان الوصول لما كانت تبحث
عنه وهج.....

- مقبل** شفت ياسيادة الرئيس زى ماقلت احضرتك بالظبط..
- رزين** الاتنين دول مش ناويين يجيبوها لبر
- مقبل** اول مرة من يوم مافتحت المدينة من 27 سنة يحصل فيها كده... واضح انهم مايعرفوش ان المدينة باكملها تحت المراقبة 24 ساعة
- مقبل** طبعا يافندم لأن ده من خصوصيات المدينة ومايعرفهوش غير الحاصلين على درجة الدكتوراة بس ؛ ورغم كده الكل يعلم بأن المدينة فيها اجهزة مراقبة لكن فين ولمين وازاي ده اللي مش متحدد
- رزين** عامة سيهم براحتهم خالص وادبهم الامان كمان لحد مانشوفوا ناويين على ايه
- مقبل** انا خايف يكونوا جواسيس بعثاهم دولة نامية معادية زى امريكا او يكون اسرائيلى من المتجولين التايهين فى العالم بعد ما تشنتوا
- رزين** لا. ماتخافش دول اضعف بكثير انهم يعملوا كده ؛ دى شعوب عايشة فى تخلف ونسبة الذكاء عندهم معدومة حسب آخر احصائيات السنة دى زائد انهم جُبنوا
- مقبل** خلاص يافندم يبقى نبدأ نكثف المراقبة عليهم من دلوقتى
- رزين** يهز رأسه بالموافقة التامة.....

مشهد (15) - نهار - داخلي

حجرة مكتبت الزمن

يصرخ باهر فجأة وهو يقفز من الفرحة حيث انه قد نجح وتوصل الى تشغيل شاشة المكتبة.....

باهر أهه... أهه... ياسلام عليك يا باهر يا عالم

عطا (بخوف) شششش... وطى صوتك لحد يسمعنا

باهر أصلى مش مصدق نفسى وصلت للشفرة وفتحت الشاشة

وهنا يظهر على الشاشة راضى وهو فاقد السوى بطريق البحر

وهج بجانبه تحاول افاقته وهى تطلب من الناس الابتعاد قليلا حيث

انها طييبة

وهج من الشاشة وسعوا يا جماعة شوية انا دكتورة

باهر ايه ده... بتعمل ايه وهج فى الزمن ده... وعازية من

الشباب ده ايه وزعانة عليه كده ليه.....

عطا يمكن حد من جدودها وكان نفسها تشوفه

باهر جدودها ايه انت كمان...

هنا وهج تضغط على زر بالاسورة المعدنية التى بمعصمها ثم تسند

راضى وتهم بالنهوض بعيدا عن الناس.....

عطا الحق دى راجعة عندنا تانى.....

هنا تبدأ المكتبة فى اصدار صوت انذار خافت مع اضاءة بعض النقاط

الصغيرة المتناثرة على باب المكتبة..... يتحرك باب المكتبة بقوة الدفع

لكى يُفتح تماما بعد ان كان مواربا قليلا جدا..... باهر وعطا يرتبكا

مما يحدث امامهما فيسرا بالخروج من الحجرة قبل عودة وهج ومعها

راضى....

مشهد (16) - نهار - داخلي

حجرة مستشفى على أحدث طراز

تظهر حجرة بمستشفى ويبدو عليها التطور الزائد حيث انها فى سنة 2100 وهنا يتضح ان كل شئ بها الكترونيا حيث يوجد ذراع يخرج من السرير به مجموعة ازرار غريبة الشكل.... وبعد منظر دائرى كامل للحجرة ينتهى بلقطة لراضى وهو مستلقيا على سرير من الالوميتال الخفيف الوزن المتين الصنع وصغير الحجم..... راضى يبدأ فى الافاقسة ببطء وتريجيا حتى يستعيد وعيه كاملا فيجد نفسه فى مكان غريب فينتفض جالسا جلسة قائمة كاملة بالسرير وهنا يجد نفسه مرتديا ملابس المستشفى وهى عبارة عن بيجامة بيضاء مطبوع عليها قلب احمر كبير..... فى تلك اللحظة تدخل الممرضة بسرعة فيفزع راضى من دخولها المفاجئ....

راضى (بارتباك) انتى فىن ... انا مين...؟

الممرضة (باستنكار) افندم....

راضى يهز رأسه حيث انه ادرك انه قد تلعثم فيما قاله.....

راضى قصدى... انتى مين... وانا فىن؟

الممرضة (بابتسامة) انا ممرضة هنا بالمستشفى

راضى (بتعجب) مستشفى... مستشفى ايه... انا هنا ليه ؟

الممرضة حضرتك دى مستشفى القلب الكبير وبقالك 3 ايام فى

غيبوبة؛ والدكتورة اللى جابتك قالت ان عربة خبطتك

راضى (يحاول التذكر) دكتورة ... جابتى.... طب وانتى دخلتى

ليه بسرعة كده انا ماناديتكيش...

المرضة ايوة يافندم ماهو سرير حضرتك حساس بيرسل ذبذبات
لأوضة الممرضات عشان تتحرك الممرضة تستطمن ع
المريض

راضى ياسلام ايه التقدم اللي فى البلد ده
المرضة التقدم موجود من زمان ياأستاذ.... واضح انك كنت برة
البلد من سنين

يبدو على وجه راضى الاندهاش لشديد مما يسمعه من الممرضة....

المرضة تؤمر حضرتك بحاجة....

راضى انتى قولتى دى مستشفى ايه....

المرضة مستشفى القلب الكبير...

راضى آآه... استثمارى يعنى...

المرضة بالعكس دى حكومة.... الاستثمارى قليل جدا فى البلد

راضى (بتحكم) قليل..! انتى شكلك اللي مش عايشة هنا من سنين

ده يامااكثرهم... الواحد طول ماهو ماشى بيتكعبل فيهم..

راضى ينظر حوله..... اومال ايه الزراير دى كلها..؟

المرضة وهى تمسك بمقبض باب الحجرة وقبل ان تخرج.....

المرضة فيه زراير لفتح الستارة وفيه لفتح الشباك والباب ولرفع

السريير وفتح ترابيزة الاكل وبعدها تشيلها او تنقل السريير

لو حبيت تتمشى فى الاوضة عشان تبقى واسعة ادامك

و.....

راضى (مقاطعا) خلاص خلاص ايه كل ده..... انتى متأكدة انها

مستشفى حكومة

المرضة تبتم ثم تخرج..... راضى يبدو عليه انه سيجن جنونه مما

سمع ورأى وهو يقول لنفسه بصوت عال.....

راضى معقول.... معقول فيه مستشفى حكومة فى بلدنا بالتقدم
والتطور ده..... اكيد انا باحلم.....

ينتبه راضى فجأة بخوف

راضى يانهارى على كده اكيد مصاريها نار (بولول) خلاص انا
عرفت مصيرى اكيد السجن ومين دى كمان اللي جابتنى
ودبستى وهربت دى..... يادى المصيبة ندفع مئين ده انا
ماحلش غير.....

هنا يطرق الباب ومن ثم يدخل الطبيب المعالج مبتسما...

الطبيب اخبار صحتك ايه عرفت انك فقت

راضى انا مش فاكر حاجة

الطبيب الدكتور وهج بتقول صد....

راضى (مقاطع) الدكتور مين ١٢

الطبيب الدكتور وهج... وهج نبع الحياة

راضى (بسخرية وتعجب) وده اسم واحدة وللا عنوان كتاب....

(بيتسم الطبيب)

راضى وهى فين دلوقتى ؟

الطبيب يقترب منه كى يتفحص مكان الإصابة التى برأسه وكتفه

الطبيب الحقيقة معرفش.... قول لى بقى ازاي عربية خبطتك

والإصابة شكلها خبطة حاجة معدنية

راضى (بتهمك) لا والله... وهى العربيات بلاستيك وللا حاجة وانا

معرفش

الطبيب (بجدية) طبعا... ماكل العربيات ياابنى مصنوعة من مادة

مخلقة من بلاستيك على كاوتش

راضى لاياشبخ.... ناقص نقول لى انها بتمشى بالحجارة

الطبيب

(بنفس الجدية) لابلالكهربا.... واضح ان الخطبة ماثرة عليك..... وبعدين محدش بتخطه عربية ع البحر من سنين.... ماعديش فى نفق من الانفاق الكثيرة اللي ع البحر ليه.....

راضى

(بقرف) من سنين !!! لاه ده واضح ان حضرتك اللي مش من هنا خالص، وطبعاً حتقول لى اللي يتضرب ع البحر مالوش دية مش كده..... انفاق ايه يادكتور اللي بتتكم عنها ده بين كل نفق والتانى اكثر من 5 كيلو يعنى أدخله تاكسى عشان اعدى الناحية الثانية..... والنبي ممكن اخرج امتى يادكتور ؟

الطبيب

عطول .. بس حنعملوك شوية اشعات وتحاليل تانية عشان نتأكدوا انك باقيت كويس لا والله شكرا كتر خيركوا..... (بهمس) فاكربنى حنفع حاجة.....

راضى

نعم ياأستاذ.....

الطبيب

(ينتبه) والله الحقيقة انا مش عارف اشكركو ازاى، بس انا كل اللي معايا مايكملش 200 جنيه 200 جنيه ايه ياأستاذ...

راضى

الطبيب

يعنى ماعيش ادفع حسابى بصراحة للمستشفى.... التمن هو آخر حاجة بنفكروا فيها المهم صحة البنى آدم اللي حيسألنا عليها ربنا

راضى

الطبيب

ياسلام... ايه الايمان والتقوى اللي نزلت ع الناس مرة واحدة دى..... (يتمتم) ده باينهُ بيشتغلنى.....

راضى

(يكمل) عايز تفهمنى انكوا انقذتوا حياتى من غير
مصاريـف ولا تأمين ولا مليـم حتى

الطبيب ياأستاذ انت غريب اوى ، اهتمام المستشفى هنا صحة
المريض اللى داخلها قبل اى شئ واذا قادر يدفع يدفع ،
مش قادر خلاص يدفع اللى يقدر عليه انشالله مبلغ
رمزى.....

الطبيب يقترب منه بصوت منخفض قليلا.....

الطبيب لو الشريحة المالية بتاعتك تسمح ماشى ماتسمح خلاص
مع السلامة، وادفع وقت ما تسمح لك الظروف

راضى (متعجبا) شريحة مالية ايه ؟ آآآه قصدك ع الموبايل؛
ماعيش رصيد والله مالحقتيش اشحن ماكانش يتعز....

الطبيب (باستغراب) موبايل ايه ياحضرة ؟ انت بتتكلم عن حاجات
بطلت من زمان

راضى (بخضة) بطلت!! الموبايل بطلوه !. منعوه..! اومال
المحل اللى حافظه ده حيصلح ايه

ينظر إليه الطبيب مستغربا ثم يضغط على زر مما بالسريـر فتأتى
المرضة فى لحظات.....

المرضة افندم يادكتور.....

الطبيب حضرى المعمل عشان عمل اللازم...

مشهد (17) نهار - داخلي

حجرة الاشعاع والتحاليل

راضى بحجرة الاشعاع ومعه الطبيب والمرضة يساعده على الوقوف امام لوحة فضية اللون طويلة مستندة على الحائط ثم تربطه الممرضة بأحزمة شفافة مقوية حول صدره من تحت ابطه وحول خصره ورجليه.....

راضى يندهش.....

راضى ايه ده ، انتوا حتعذبوني وللا ايه.... خلاص انا آسف... انا حاعمل المستحيل وادفع حساب المستشفى حابيع هدمى.. لأ البيت ؛ حابيع كل حاجة بس ماتعذبونيش لم يرد عليه احد بل ينظروا اليه فى تعجب ودهشة وكأنه شخص مجنون.....

الطبيب لو سمحت اثبت شوية عشان نعرفوا نكشفوا عليك كويس

راضى (بدهشة) تكتشفوا عليا.... ازاي ؟!

الطبيب (بزهق) ايه ياأستاذ انت عمرك مادخلت مستشفيات قبل

كده

راضى (بصوت باكى) ماهو عشان دخلت وعارف اللى

بيحصل...

لم يعطه الطبيب فرصة لاكمال كلامه فيجلس على كرسى بذراع ملتوى متحرك ملئ بالازرار فيجذبه امامه ثم يفتح شاشة عرض كبيرة معلقة على الحائط امامه ثم يبدأ بالضغط على تلك الازرار وهو يراقب الشاشة بجدية واهتمام.....

هنا تبدأ اللوحة المعدنية المربوط عليها راضى فى التحرك يمينا ثم يسارا ثم للامام ثم ترتفع به حتى يصيح كالسرير وكل هذا وراضى يصرخ من الخوف مما يحدث.....

راضى لا...لا...كفاية... خلاص حندفع ربنا يقدرنى وندفع
بلاش تعذبونى بلاش.... مش عايز اموت مش عايز

وهنا يصيح فيه الطبيب.....

الطبيب اسكت شوية انت ايه... يا استاذ مش كده

راضى يحاول ان يهدأ.....

راضى حاضر حاضر.... اهه... اهه خلاص

وهنا تنزل من السقف لوحة مربعة صغيرة حوالى 25سم 25سم بموتور وتستقر فوق رأس راضى على بُعد بضعة سنتيمترات ثم تبدأ فى مسح شامل للمنطقة المصابة اوتوماتيكيا.....

الطبيب يتابع كل هذا من خلال الشاشة كل ماتصوره الشريحة المربعة..... وبعد ان تنتهى تعود اللوحة مرة اخرى لأعلى كما كانت..... من بعدها تفتح فتحة مستطيلة من الحائط بجانب راضى وتخرج منها طاولة صغيرة مجهزة بماسك اوتوماتيكى يمسك بجهاز صغير معقد ومتشابك التركيب ويخرج منه ذراع طويل معدنى متصل بعدة اذرع مختلفة الاطوال وبجانب ذلك الجهاز شاشة عرض صغيرة جدا بحجم الكف..... يضغط الطبيب على بعض الازرار فيتحرك الذراع الطويل حتى يستقر فوق راضى مباشرة ثم يبدأ الطبيب فى توجيه الاذرع المختلفة الطول كل على حدة بالضغط على الازرار التى امامه الى مكان ما ؛ فواحدة نحو الرقبة وثانية نحو الكتف وثالثة الى الذراع ورابعة وخامسة على الجبهتين بالرأس ؛ وهنا تتركز جميع الاذرع على المناطق المذكورة سابقا.... تبدأ شاشة العرض الصغيرة بجانب راضى فى سرد

بعض الارقام والذبذبات ومن ثم بالتعبية تنتقل تلك الاشارات والارقام الى الشاشة الكبيرة التى يتابعها الطبيب على الحائط امامه.....
هنا يكون راضى قد اغمى عليه من كثرة التوتر والخوف مما رآه.....

مشهد (18) نهار - داخلى

حجرة مكتب الطبيب

هنا راضى يكون قد استعاد وعيه وخلع ملابس المستشفى وارتدى ملابسه ثانية ويجلس امام الطبيب امام مكتبه..... الحجرة ايضا مليئة بالاجهزة التكنولوجية الغير متعارف عليها من وجهة نظر راضى فهو ينظر اليها بكل استغراب.....

راضى انا آسف جدا يادكتور ع اللبث اللى حصل فى المعمل
ماكش اعرف ان فيه مستشفيات فى بلدنا بالتقدم ده والله
الطبيب ازاي بقى يااستاذ راضى ده احنا بلدنا من اكبر الدول
المتقدمة فى العالم علميا واقتصاديا و.....

هنا تدخل وهج بعد ان تطرق الباب.....
الطبيب أهلا .. أهلا يادكتورة... وآدى الدكتورة وهج نبع
الحياة.....

راضى يقف مبهورا بالهيئة التى وجد عليها وهج حيث انه لم يتوقعها بهذا
السن الصغير فكلمة دكتورة توحى بأن سنها كبير....
وهج أهلا بيك يادكتور..... حمد لله على سلامتك يااستاذ
راضى؛ عامل ايه دلوقتى....

راضى مازال مبهورا بها.....
راضى الحمد لله..... الحمد لله اوى

الطبيب هو بقى احسن من الاول والاشعات والتحليل اثبتت انه
 سليم مية فى المية
وهج طب عظيم خالص....
الطبيب نتمنى نشوفوك دايمًا على خير وفى صحة جيدة يااستاذ
 راضى مع الف سلامة
راضى متشكر اوى يادكتور... معلى يعنى عدم اللامؤاخذه هو
 فين دفع الحساب
وهج انا خلاص دفعته....
راضى لأ..لأ..لأ ياآنسة يادكتورة انا مارضاش ان حضرتك تدفع
 لى الحساب
وهج حساب ايه انا مادفعتش غير مبلغ رمزى بس ؛ يعنى
 حاجة بسيطة
 راضى يجلس مرة أخرى من الحيرة....
راضى الله انتوا حتجننوني وللا ايه
الطبيب (مندهشا) ليه يااستاذ راضى ده العادى فى بلدنا...
 وقبل ان يرد راضى وهج تلحقه وهى تجذبه ناحية الباب كى يخرجها....
وهج معلى يادكتور اصله لسة متلخبط من أثر الصدمة....
 احنا متشكرين جدا.... سلام عليكموا.....

مشهد (19) - نهار - داخلي

حجرة مكتب الزمن

راضى يهب واقف مفزوعا.....

راضى ايه؟؟ 2100 ازاي!!؟ يعنى ايه؟ يعنى انا مُت ورجعت

اتولدت تانى وللا انا باحلم وللا بيتهياالى وللا يمكن مخى

فوُت من الخبطة

وهج تحاول تهدأته.....

وهج يااستاذ راضى... كل اللى حكيت هولك ده ولسة مش

مستوعب

راضى استوعب ايه ده مايتصدقش ولا فى افلام حتى.....

وهج وكل اللى حواليك ده برضه ماخليكش تصدق

ينظر راضى حوله ويجول بعينه فى الحجرة كلها ولم يرد.....

وهج طب انا حاوريك حاجة تخليك تصدق كلامى

ثم تقترب من مكتبة الزمن وتفتح الشاشة وتضغط على بعض الازرار

فتظهر على الشاشة منطقة راضى السكنية وحارته ومنزله.....

ينظر راضى باندھاش غريب لما يرى.....

راضى ايه ده ... ايه ده... واحنا حياتنا مفتوحة اوى كده عندكوا

ومفضوحين ع الهواء

تضحك وهج.....

وهج مفضوحين ايه بس يااستاذ راضى ده تاريخ بلدنا وكونى

أقلب فيه وادرسه دى ماتبقاش فضيحة...

راضى فعلا..... دى تبقى كارثة

وهج كارثة ليه بس مافيش حاجة من دى انت مش فاهم.....

مكتبة الزمن دى هى الكتب والانترنت على ايامكوا

راضى

حاسس انكوا آآآآ انتوا عايزينى اشتغلوكوا جاسوس
على مصر.... لأ... لأ...والف لأ....لا صحيح انا مش
طايق العيشة فيها وملبخة معايا بس لأ ، مصر دى بلدى
وطنى امى نيلها هو دمى ترابها هو لحمى.....
للاللاللاللاللاللال.....

وهج

ايه يااستاذ راضى انت فى مصر واحنا مصريين وقتلك
ميت مرة ان موضوع رسالتى هو البحث فى مشاكل جيل
بداية القرن ال21 افهم بقى..... اومال اللى ع الشاشة
ده ايه ؟

راضى

(باستهتار) هى معضلة يعنى ده تسجيل قديم ومناظر
عشان تضحكوا بيها عليا ، لكن لا يآنسة
يعنى مافيش فايذة برضه مش مصدق

وهج

بدا يظهر الاجهاد والمال على وجه راضى.....

راضى

اصدق ايه ياماما... اصدق ايه وللا ايه اصدق اننا فى
2010 وللا اصدق اننا فى 2100 ؛ اصدق معاملة
الموظفين فى وحدة التراخيص وسلبية الناس واللى
خبطنى ع البحر بسبب سرعة واحد غبى وللا اصدق
معاملة المستشفى ليا واحترامها وانقاذها ليا من غير
ماتعرف اذا كان معايا فلوس وللا لأ.....انتى طلعتى
لى منين؛ حرام بقى كفاية، كفاية اشتغالات وسيبونا فى
الهم اللى احنا فيه حرام

وهج تربت على كتف راضى....

وهج

خلاص ياراضى احنا نروحوا نرتاحوا وبكرة ان شاء الله
لينا كلام تانى

راضى انا عايز اروّح بيتى... انا مش حار تاح غير فى بيتى
ووسط اهلى.....
وهج طب قوم بس.....

مشهد (20) ليل - داخلى

منزل باهر

باهر بمنزله مع عطا حيث جميع مابالمنزل مفروش بفرش آلى
وجميعه مصنوع من الالوميناال الخفيف الصنع المقوى والملون لم يرتكز
شيئا على الارض بل ان جميع الاشياء اما تخرج من الحوائط او تتدلى من
السقف غير انها تتحرك بالازرار كلها حيث مايريده يخرجها ومالا يريده
يدخله ويوفر من خلاله مكان بالمنزل.....

باهر يخرج بزر ترابيزة رفيعة رفيعة معدنية من الحائط وبزر
آخر يخرج كرسيان من تحت الارض معدنيان ايضا بقائم معدنى رفيع
وقوى فيجلسان عليه ويضعها عليها كوبان من العصير.....

باهر ماقولتليش عرفت المعلومات دى كلها ازاي
عطا ولا حاجة قبل ماتيجى وتدخل المكتبة دخلت وحطيت جهاز
تسجيل الليزر بتاعى فى ضهر المكتبة ، فسجل كل
الحوار اللى بينهم وانا قاعد فى المعمل اسمع براحتى من
غير ماحد يعرف....

باهر برافو عليك يعطاه...
يقوم باهر ويتمشى بالصالة المربعة التى مساحتها متوفرة بسبب دخول
جميع اثائها فى اماكنها بالحوائط او الاسقف او الارض.....

باهر كده بقى مسكنا اول الخيط.... يعنى رسالتها عن مشاكل
جيل بداية القرن ال21... حلو اوى كده.....

مشهد (21) ليل - خارجى منطقة محرم بك سنة 2100

وهج وراضى يقفا بمنطقة منسقة وجميلة رائعة الجمال تكثر فيها
الخضرة وذات تنسيق للمباني والحدائق بمنتهى الروعة حيث انها منظمة
فى صفوف بجانب وامام بعضها والمسافات بينها متساوية ليست بضيقة
ولا بواسعة وتوجد نافورات بكل مكان والاضاءة القوية التى تثير المكان
بأكمله وكأنه فى منتصف النهار غير ان جميع المباني متساوية الارتفاع
فتقريبا لا تزيد عن عشرة طوابق فقط وبألوان موحدة متناسقة باهية.....
اما السيارات فهادئة السير وشكلها غير مألوف فهى فعلا جميعها مصنوعة
من مادة مخلفة من البلاستيك والكاوتش معا حيث انها قوية ومرنة ولم
يخرج منها أية عوادم اثناء السير فكلها تعمل بالكهرباء ويبدو على سائقها
الهدوء والرزانة والعقلانية والالتزام الشديد بقواعد المرور غير انه يبدو
عليهم الاحترام لبعضهم البعض وللمشاة بالشارع.....
كل هذا وراضى يقف متسمر فى مكانه منبهرا بما يدور من حوله
وكانه فى الجنة.....

وهج تتطلع لنظرة التى تكاد تخلع عيناه من وسط وجهه من كثرة
الانبهار.....

وهج ايه رأيك يراضى ؟
راضى رأى فى ايه ، ايه الجمال ده كله... احنا فى انهو منتجع
سياحى.....

وهج ده مش منتجع.... دى منطقك.... احنا فى محرم بيه
راضى لأ... مش معقول... لايمكن اصدق ان دى محرم بيه ؛
محرم بيه المزقة ، الزحمة، اللى كلها دوشة عربيات
وتاكسيات ومشاريع وتُرمايات وده ييزق وده بيتخايق وده
بيشتم ويزعق ، والمرور واقف والدنيا متخبطة
لالالالالا مش ممكن.... مش ممكن

وهج لأ صدق ياراضى؛ دى محرم بيه 2100
راضى نفسى اصدق.... نفسى ماكونش باحلم... نفسى تبقى دى
الحقيقة وماتكونيش بتشتغلينى

وهج هى دى فعلا الحقيقة.... بس للأسف مش حتتحقق غير
بعد جيلك بسنين طويلة

راضى (بحسرة) ياخسارة مش حالق اعيش واشوف الجمال
ده.... طب وباقيت البلد شكلها بقى ايه ؟

وهج بنفس الشكل والنظام ده بس كل حى ومنطقة بيتميز بطابع
بُنا ولون معين ، يعنى زى مانت شايف هنا مثلا محرم
بيه لون مبانيها بنى فى بيج وأخذه طابع آخر القرن الـ 19
وبداية الـ 20

راضى وايه كمان عن 2100 اتحفينى.. اتحفينى
وهج كل حاجة دلوقتى مظبوطة وماشية صح وكل فرد فى البلد
من كبيرها لصغيرها عارف كويس ايه اللى ليه وايه اللى
عليه ومحدث يقدر يخالف ده لأن القانون واضح وصارم
راضى طب ممكن اعيش معاكوا فى عصركوا وابقى من
اصحاب القفزة العصرية

وهج تضحك.....

وهج لأ طبعاً... لأن دى مدة معينة ومحددة بيحددها الباحث
لحد مايخلص بحثه وبعدها لازم كل فرد يرجع لعصره
تانى وإلا حيفضل محبوس وتايه فى مكتبة الزمن لآخر
يوم فى عمره

راضى ايه...؟ ليه كده... ماكتى تسيبها مفتوحة احسن
ماينفعش.....

راضى طب وانا حافضل هنا كتير ... اهلى وناسى وحشونى
وهج لأ طبعاً ؛ لأن المفروض انا اللي انزل معاك عصرك
عشان البحث بتاعى والمفروض مانتأخروش اكتر من كده
لأن كله من وقتنا فى المكتبة ولازم ابرمجها فى اسرع
وقت للمدة اللي عايزاها

مشهد (22) نهار - خارجى .

احدى شوارع محرم بك 2010

وهج وراضى بمنطقة محرم بك وباحدى شوارعها المزدحمة
وذلك قبل دخولهم الحارة مباشرة..... وهج مشمزة مما تراه وتسمعه
وتشمه من حولها فهى تضع يدها على آذانها وتحاول كتم انفاسها مع
بعض السعال المتقطع حيث تسير بجانب راضى وكأنها خائفة فهى
منكمشة براضى....

وهج ايه الدوشة الجامدة دى.... وايه الروايح العجيبة
دى كمان...

راضى (بابتسامة وتهكم) ده العادى ياأختى... انتى لسة شوفتى
حاجة..... وبعدين لازم تشمى كويس.... شمى
شمى.... (يتنفس بعمق) ياسلام بقالى مدة ماشمتش ريحة

العوادم والزباله؛ انتى عارفة دى بتدى للواحد طاقة عشان

يعرف يعيش

تتظر اليه وهج بقرف
وهج

ياسلام...!! ايه القرف ده.... دى مواد سامة وضارة
بالصحة

راضى (بسخرية) سامة ايه ياشيخه ، ماالناس عايشة ومستحمة
القرف ومااشتكتش ؛ ياختى عيشى عيشة اهلك

وهج ماهى دى عيشة اهلى.... انا عمرى ماشميت الروايح دى
ابدا ولافيه دوشة بالشكل ده..... احنا اتعودنا ع الهدوء

هنا بتوقف راضى فجأة قبل ان ينعطف يدخل الحارة مباشرة....

راضى استنى.....

وهج تتظر اليه مستفهمة.....

راضى لما الناس يشوفوكى داخله معايا الحارة حيقولوا ايه ؛

وللا لما يسألونى...

وهج عادى ... الحقيقة

راضى حقيقة ايه ؟ دول يودونا ع المعمورة عدل

وهج اشمعنى المعمورة يعنى !!؟

راضى مستشفى المجانين ياختى

وهج آآه... أصلها اتبدلت خالص عندنا وباقت على مستوى

عالى واسمها منتجج الراحة النفسى

راضى لا والنبي ايه.... المهم ، خلينا فى المصيبة دى دلوقتى ؛

وبلاش والنبي كلمة عندنا دى انسيها

وهج مصيبة ايه ... انا مش شايقة مشكلة فى انى دكتوراة

بتعمل رسالتها عن مشاكل العصر والجيل فى البلد

من سنة 2100

راضى أبوة كويس اللي قولتيه بس ياريت من غير 2100
دى وسيبى الباقي عليا وإياكى تفتحي بـُفك بكلمة زيادة
عن كده....
راضى يجذب وهج من يدها أمامها
تعالى

مشهد (23) نهار - خارجى أكارة

راضى ووهج يدخل الحارة متجهين الى بيت راضى.....
وهج متعجبة مما تراه من منظر الناس والحارة والشارع الغير نظيفين
والبيوت القديمة المتهاكة، والاطفال الحافيين الاقدام اشعثين الشعور ذوى
ملابس قديمة بالية.....
هنا يمر راضى امام بورصة حلموس (القهوة) فيراه حلموس
فيخرج وهو متعجبا من تلك الفتاة ذات الوجه الجديد الغير مألوف
فى الحارة..... فى نفس الوقت تراه زوجة فتحي وهى تتشتر الغسيل
بالشباك حتى يصل الى منزل راضى ويدخله.....

مشهد (24) نهار - داخلى بيت فتحي

زوجة فتحي جليلة تدخل مسرعة نحو فتحي الجالس الى ترابيزة
يتناول كوبا من الشاي مع بعض الفُرَص....
جليلة إلحق يافتحي..... راضى جه الحارة ومعه واحد غريبة
ودخلوا على بيته

فتحى وهو منهمك فى بلل القُرص فى الشاى وأكلها.....
غريبة ! ازاي يعنى

جليلة يعنى شكلها مش من هنا، مش من الحارة باين عليها
من الناس العليوى

فتحى يمكن قريبته وللا حاجة
جليلة وهو راضى لو يقرب للاشكال النضيفة دى كان ده
بقى حاله

فتحى (بزق) يووه يا جليلة قصدك ايه لخصى
جليلة قصدى انه اكيد جايها تشتري المحل اللى دفعت فيه اللى
وراك واللى اداك من برة برة وحيلف. الفلوس كلها
لوحده من غير مايقولك

بترك فتحى ما بيده ويتوقف عما كان يفعله وكأن ما قالته جليلة صحيحا.....
جليلة (تكمل) ماتتساش ان المحل مساحته كبيرة وفوق كده وكده
على قمة شارع يعنى يجيب فلوس كثير
فتحى يعاود الاكل وشرب الشاى ثانية وكأنه لا يريد تصديق ما نقوله
زوجته.....

فتحى لا لا لا راضى ما يعملش كده...
جليلة وما يعملش كده ليه ، هو مش زيه زى اى واحد لما
بيتعزر فى فلوس ممكن يبيع اهله
فتحى عامة ياخير النهاردة بفلوس بكرة يبقى ببلاش.... ولو
حصل اللى بنقوليه ده حتبقى حياته اسود من شعر راسه

مشهد (25) - نهار - داخلي

شقت راضى

راضى يفتح باب شقتهم ويدخل ومعه وهج.....

راضى (بصيح) سلام عليكموا يا أهل الدار

تأتى امه من الداخل وهى تهزول نحوه بلهفة ثم تحتضنه.....

أم راضى راضى.. ابنى.. حبيبى بقالك 4تيام غايب عن البيت...

كُتُ فين يا ابنى

وهج تنتظر الى راضى بمعنى هلى صدقت اننى من زمن آخر وانك كنت

معى فى سنة 2100.....

راضى ابدا يام راضى كُتُ باقضى مصلحة كده عشان المحل

ام راضى وماتقولليش....

راضى انا آسف والله ، بس اصلى.....

وهج (مقاطعة) الحقيقة هى كانت حادثة بسيطة والحمد لله خرج

منها على خير

أم راضى (بخضة) ايه! حادثة.. حادثة ايه دى يا ابنى الللى بتتكلم

عنها الـ..... إلا بالحق حضرتك تبقى مين ياختى؟

وقبل ان تتطق وهج يلحقها راضى.....

راضى دى الدكتور وهج يام راضى

أم راضى (بفرح) دكتور !! انت لسة تعبانا يا ضنايا

راضى (يطمئنها) لا لا يام راضى ماتتخصيش ؛ دى هى الللى

انقذتنى وودتنى المستشفى

أم راضى (تصرخ) مستشفى كمان يالهوى....

راضى ده انا باقع بلسانى يام راضى مافيش حاجة مانسا

كويس ايه..... ادبنى فرصة افهمك بقى

هنا بطرق الباب فجأة...

راضى يفتح فيجد فتحتى ومعه المعلم حلموس....

حلموس السلام عليكموا يا جماعة....

راضى وأمه وعليكوا السلام يامعلم.....

فتحتى حمد الله ع السلامة ياراضى ايه الحكاية بقالك كام يوم

غايب محدش شافك

راضى (يتعجب) الله يسلمك ياسيدى.... ياترى هو ده بس اللي

جانبك

حلموس (يلحقهما) ايه ياراضى ده احنا عيلة واهل ولازم نسالوا

على بعض؛ احنا كنا قلقانين عليك ياأخى، وامك واخواتك

كمان

راضى كتر خيرك يامعلم كلك واجب.... اصله مش بعادة من

فتحتى الحب والسؤال اللى نزلوا عليه فجأة كده ده انت

لسة كُت.....

حلموس خلاص ياراضى اللي فات مات والمصارين فى البطن

ببتخانق

فتحتى حقه عليا ياسيدى ماتزعلش كات وزه شيطان وراحت

لحالها..... المهم حتفضل سايبنا واقفين ع الباب كده

راضى اتفضلوا.....

- ق ط م -

نفس المكان :

يجلس الجميع راضى ووهج ومعهما حلموس وفتحى اما ام راضى
فتضع صينية الشاى على المنضدة.....
أم راضى اتفضلوا الشاى....
حلموس تشكرى يام راضى
كل منهم يمد يده ويأخذ كوبا من الشاى.....
فتحى اومال اخبار تراخيص المحل والبقط ايه.....
راضى ماقيش ؛ اتخانقت مع الموظف جوة وبعدها خبطتلى
عربية
حلموس ياساى يارب.... وجرالك حاجة
راضى لا... عدت على خير
فتحى اومال مين الهانم ؟ مش تعرفنا
راضى دى الدكتور وهج ؛ واحد من صحابى القدام من ايام
المدرسة قصدنى استضيفها عندنا عشان بتحضر الدكتوراة
بتاعتها عن مشاكل الناس الغلابة فمارضيتش اكسفه وقلت
لها تتفضل عندنا مع امى واختى...
حلموس ع العموم يادكتورة اهلا وسهلا بيكى وسط اهلك وناسك
وهج شكرا يا حاج.....

مشهد (26) نهار - داخلي

حجرة مكتب الرمن

هنا يكون نهاية المشهد السابق على شاشة المكتبة امام باهر

وعطا.....

باهر يوقف الشاشة على نفس المنظر ويلتفت لعطا.....

شاطرة وهج عرفت ازاي تثبت نفسها عند الناس بسرعة

باهر

وتخليهم يتقوا فيها....

وده مفرحك

عطا

طبعاً ... ده معناه انها حنبدأ تشتغل فى الرسالة فى اقرب

باهر

وقت وطبعاً احنا وراها أول بأول عشان نخلصوا من

الموضوع ده بقى ويبقى لنا كيان فى مدينة العلماء

بس ده مش فى صالحنا...

عطا

ليه يعطاً ؟

باهر

عشان ده كله حيثسجل فى ذاكرة المكتبة وحيثبت جهدها

عطا

فى تحضير الرسالة اول ماتبرمج المكتبة عليها

طب وايه المفروض يحصل ؟

باهر

المفروض يحصل العكس... ان الناس فى الحارة تقف

عطا

ضدها وتكرهها وبكده حتكون فرصة.....

فرصة لإيه ؟

باهر

فرصة لينا ندخلوا وراها مكتبة الزمن انت ناسى ان

عطا

المكتبة مايقبلش دخول اكثر من شخص إلا اذا الشخص

الرئيسى اتعرض لمشكلة خصوصاً بعد البرمجة....

قصدك اننا لازم ننزلوا العصر ده احنا كمان

باهر

- عطا طبعاً عشان نبقا قريبين منها ومن الناس ونقدروا نتابعوا بحثها عن قرب..... هي لسة فى المرحلة الاولى فى المكتبة يعنى لسة ما برمجتهاش للتسجيل وده مش يحصل إلا لما تبدأ فى الرسالة.....
- باهر يعنى احنا المفروض نلحقوا ندخلوا المكتبة وننزلوها قبل البرمجة
- عطا بالضبط ، وبالتالي ساعة ماتخلص الرسالة نكونوا احنا موجودين ومتسجيلين فيها من البداية اما هي ساعتها تبقى نفكروا ازاي نبعدها عنا وتبقى تثبت بقى ان الرسالة بتاعتها
- باهر ايه التخطيط الكبير ده..... المهم ازاي حندخلوا وازاي حنعملوها مشكلة من اصله.....
- عطا حالا حتشوف.....

مشهد (27) غروب - خارجى

بورصة حلموس

سيد يجلس مع حلموس بالقهوة...

- حلموس بصراحة راضى حاله يصعب ع الكافر
- سيد هو اللي عامل فى نفسه كده..... ياما نصحته يستشفله شغلانة تانية جنب شغلانة استصلاح التلفزيونات والنوباليات دى وماقيش فائدة وذن من طين وودن من عجين..... قال ايه صاحب عقل الكترونى مايستغش يستعمل بشغلانة تانية ؛ هو حر بقى..... وأدى آخره

التممة جاييلنا دكتورة قال عشان تستشوف مشاكلنا،

خليها بقى تستحلله مشكلته هنا

يأتى عطا ويجلس على احدى الكراسى بالقهوة.....

حلموس ولة ياكمونة....

كمونة نعمين يامعلم....

حلموس يشير بعينيه ناحية عطا...

حلموس ماتشوف لنا مين الوجه الصاعد ده

كمونة أمرك يامعلم

يذهب كمونة الى عطا حيث يبدو عليه الواجهة وانه ليس من سكان الحارة

او المنطقة.....

كمونة البيه يشرب ايه ؟

عطا وهو ينظر حوله باهتمام وكأنه يبحث عن احد ما.....

عطا أى حاجة دافية.....

كمونة زى ايه ياباشا ؟

عطا كاكاو...

كمونة تحت أمرك يابيه..... إلا حضرتك جاي هنا لحد معين

عطا نعم!!!

كمونة أصل انا اول مرة نشوف حضرتك هنا عندنا ، فلو بتدور

على حد ندلوك

عطا لأ شكرا... هات لى اللى قلت لك عليه

كمونة حاضر

ثم يدخل للداخل ويشير لحلموس بأنه لم يعرف منه شيئا ولم يجيبه عن أى

شئ.....

حلموس تعالى معايا ياسيد.....

يقوما الاثنان ويتجها نحو عطا ثم يجلسان بجانبه.....

حلموس سلام عليكموا يااستاذ.... محسوبك المعلم حلموس صاحب
القهوة دى وده بقى الاسطى سيد سواق خصوصى لباشا
كبير وكان قبل كده سواق مشروع خط المنتشية العوايد
وساعات سيدى بشر
عطا ياأهلا وسهلا

حلموس لكن حضرتك مين عدم اللامواخذة يعنى اصل ماشفناكش
فى الحارة قبل كده

عطا اصلى سمعت ان فيه واحدة دخلت الحارة من شوية بتقول
انها دكتورة

حلموس ابوة فعلا ياسى الاستاذ....
سيد طب وهى تستقربك وللا حاجة...
عطا سمعت انها جاسوسة فقلت اتأكد

سيد يهب واقفا.....

سيد ايه جاسوسة!.... معقول!... استعوزو بالله... احنا لازم
نستقظموا راضى على نيتها

حلموس ابوة طبعاً ضرورى... ياللابينا نقولوله
عطا لأ كده ممكن تعرف انكوا كشفتموها فتهرب..... انا بأقول

تبغوا البوليس احسن وهو يتأكد
سيد انت لسة مستقعد يامعلم بينا ع البوليس نستبلغوه
حلموس احسن يمسكوا راضى معاها

سيد ماتستخافش احنا حنستوقوا جمبه بس ياللا

ثم يجذب سيد حلموس من يده مهرولين للخروج من الحارة....

حلموس (يصيح) خد بالك يالة ياكمونة من القهوة
عطا ينظر الى سذاجتهما بخبث وابتسامة النصر على وجهه.....

مشهد (28) ليل - خارجى

أكارة

تأتى سيارة الشرطة وتقف بأول الحارة ثم ينزل منها الضابط
واثنين من امناء الشرطة وعسكريين ويتجهون ناحية بيت راضى
ثم يدخلونه.....

اهل الحارة تتعالى صيحاتهم ويبدو على وجوههم الاستفسار
والتعجب والتأثر من اجل راضى واسرته.....

اهل الحارة خير فيه ايه.....

ياحول الله يارب.....

لاحول ولا قوة الا بالله هو حصل ايه.....

مشهد (29) ليل - داخلى

شفقت راضى

راضى يجلس بالصالة ومعه اخته رانيا وامه واخيه حمدى
يتحدثون ويتضحكون.....

رانيا انتى لذيذة اوى ياكثورة انا حاسة اننا نعرفوكى من زمان
وهج خلاص يارانيا معنى كده اننا صحاب فبلاش كلمة
دكتورة دى

راضى زمان ايه اللى تعرفيها منه ؛ دى لسة ماجاتش

أم راضى باولة.... (تضربه بيدها مازحة)

حمدى طب يا جماعة نستأننوا احنا بقى عشان رايح الشغل.....

راضى (مازحا) ايه لو كان سيد هنا قال لك نستستأننوا

يضحك الجميع.....

وهج وانت بتشتغل ايه يا حمدى ؟
حمدى فى كافيتيريا ع البحر فى الانفوشى وردية بالليل لحد
الصبح
وهج ليه انت خريج ايه ؟
حمدى المعهد العالى للسياحة والفنادق
وهج طب وماشفتش شغلانة فى فندق ليه احسن
حمدى ينظر إليها بابتسامة حسرة وكأنه يقول ياريت...
راضى معلىش يا حمدى ياخويا اصلها مش من الزمن ده...
حمدى انا لفيت على كل فنادق اسكندرية محدش رضى
يشغلنى... عندهم اكتفاء مش محتاجين عمالة...
ولو اخدوا حد يبقى لازم واسطة.....
هنا يطرق الباب بشدة فجأة...
أم راضى ياساتر يارب.... مين اللى بيخبط كده
حمدى أيوه.....
حمدى يفتح الباب.....
يدخل الضابط والعساكر.....
الضابط مين اللى اسمها وهج ؟ تقف وهج.....
وهج انا يافندم.....
الضابط اتفضل معانا...
راضى يتقدم بسرعة امامها.....
راضى تتفضل على فين... هو فيه ايه يا حضرة الضابط ؟
الضابط انت راضى اللى مخبىها فى بيتك
راضى (بدهشة) مخبىها!! مخبى مين ؛ اكيد فيه حاجة غلط
سيادتك

الضابط أم راضى
 فى القسم حتعرف كل حاجة اتفضل انت كمان معانا
 (تولول) يابيه ابني ماعملش حاجة ؛ دى ضيفة عندنا
 حضرتك..... طيب خدوني انا كمان معاكوا...
 ياسعادة البيه
 انا جاى معاكوا....
 الضابط حمدى
 هم الاتنين بس لو سمحت....
 راضى روح انت على شغلك مالاكش دعوة ده اكيد سوء
 فهم.....
 ثم يخرجوا جميعا ويغلقوا الباب خلفهم وأم راضى تبكى ورانيا تربت على
 كتفها اما حمدى فيقف حائرا من الموقف.....

مشهد (30) ليل - خارجى

مدرية امن اسكندرية

تقف سيارة الشرطة أمام مبنى المديرية وينزل منها الامناء ثم
 يسحبوا راضى ووهج....
 وهج (تعترض) ده مش اسلوب آدمى ، ده اسلوب همجى....
 مافيش قلة الذوق دى عندنا ابدأ.....
 الامين (بتهكم) عندكوا فين ياختى انتى حتعملى لنا فيها
 عبيطة.... ياللا ياللا ادامى
 فيمسكها من ذراعها بشدة ويجذبها.....
 وهج ايه ده!! ازاي تسمح لنفسك تمسكنى من ذراعى وتشدنى
 كده انا حاشتكىك يرفدوك.....
 الامين لم يرد وينظر اليها باحتقار.....

راضى اسكتى خالص الكلام اللى بنقوليه ده مش وقته
ولا إنتى قده خالص

مشهد (31) ليل - داخلى

مكتب الضابط ولید

وهج وراضى يقفا أمام مكتب الضابط ولید.....

ولید يضرب بكفه على مكتبه....

ولید بقى حتستكبيهم يرفدوهم ؛ انتى فاكدة نفسك فين.....

وهج تفتح فيها محاولة ان ترد فيوكزها راضى بكوعه.....

راضى أبوس ايدك تسكتى.... ممكن يافندم نعرفوا احنا هنا ليه ؟

ولید حتعرفوا حالا ياخويا.....

(ينظر لوهج) ممكن نتعرفوا على حضرتك....

وهج (بتقة) الدكتورة وهج نبع الحياة باحثة وباحضر رسالة

درجة العلما فى تاريخ مشاكل جيل بدايات القرن ال21

ولید (بتعجب) نعم ياختى درجة ايه... العلما...

ودى اخترعوها امتى دى

راضى (يهمس) رحنا فى داهية من أولها....

ولید نعم...!!!

راضى ابدأ يافندم الموضوع كله ان الدكتورة معرفة قديمة وكانت

برة مصر طول عمرها ولسة راجعة بس

ولید وراجعة من انهى بلد بقى ان شاء الله

وهج (بتلقائية) من مصر

ولید انتى حتستعبطى....

- وهج انا ما اسمحلكش... ده مش اسلوب راقى فى التعامل مع الناس
- وليد نعم ياختى... حتعمللى لى ايه بقى ان شاء الله....
حتبلى عنى البوليس
- راضى الله يخليكى تسكتى... وعديها .. عديها وخدى اللى بعديها
عشان خاطرى
- وليد انت بتقول ايه يا جدد انت.....
- راضى باقول لها كل دولة وليها نظامها.... معلى اصلها
ما تعرفش حاجة عن اسلوبنا خالص
- وليد انتى جاية منين...
وهج لراضى.....
- وهج ماترد انت.....
- راضى (بحيرة) من... من... من بلد اسمها غريب كده ومتطوحة
فى المحيط الهادى وقريبة من امريكا كده
- وليد ايوة اسمها ايه يعنى ؟
- وهج (بغيط) امريكا ايه دى.... خلاص مافيش امريكا دى
انهارت وانتككت من زمان
- راضى قولى اى دولة ناحيتهم وخلص..خلصينا
- وليد انا مش فاهم انتوا بتتوشوشوا تقولوا ايه لبعض كل شوية
- راضى معلى يافندم أصل العربى بتستوعبه بصعوبة شوية
- وليد آآه.... قولتلى بقى من انهى دولة
- وهج نيكاراجوا
- راضى يشير بيده ورأسه بأنه موافق على ماقالته.....
- راضى هى اللى قالتها دى....

- وليد ومين فى نيكاراجوا بعثك.... وعازيز يعرف عننا ايه
وهج محدش... انا مصرية أصلاً وبقالى سنين ماجيتش
وقررت آجى أشوفها..... فيها حاجة دى ..
- وليد فين بطاقتك؟
وهج ماعيش بطاقة
وليد طب بسبورك؟
وهج مافيش...
- راضى (ياطم) يبقى ختناخدوا كعب داير
يهب وليد.....
- وليد يعنى ايه.... او مال دخلتى البلد ازاي
وهج تخرج من اسورة يدها شريحة رفيعة وبكل هدوء وثقائية.....
- وهج بالشريحة دى...
وليد لا والله..... انتى بتشتغلينى
وهج يعنى ايه سيادتك
- راضى معلش يافندم ، قصدها ان البسبور ضاع منها او تقريبا
التسرق
- وليد ومابلغتيش ليه
راضى ماحنا كنا حنبلغوا بس بكرة الصبح
- وهج بس انا كل المعلومات بتاعى متسجلة ع الشريحة
دى..... اتفضل شوفها
- بمسكها وليد باستغراب ويقلبها فى يده وهو يحرق النظر بها....
- وليد انا شفت شرايح كمبيوترات وموبايلات بالهبل بس عمرى
ماشفت الشكل ده
- وهج بكرة تشوفها سعادتك

راضی يشوفها ايه ده ولأحفاده حتى حيلحقوا يشوفوها
وليد لمساعده الجالس امامه.....

وليد شوفلنا ياابنى عليها ايه دى...؟

وهج مابنشغلش غير ع الجهاز بتاعها
ينفذ صبر وليد....

وليد أبوه اللى هو ايه يعنى..... الكمبيوتر ده ممكن...
لأ.....

راضى (يقاطع) يافندم ده نظام الدولة اللى جاية منها مافيش حاجة
اسمها بطاقة ولارقم قومى هى الشريحة دى بطاقتهم وكل
حاجة عنهم واكيد الجهاز اللى بتشتغل عليه مش موجود
غير عندهم هم بس

وهج بالظبط كده زى ماقال راضى
وليد يحاول ان يكون هادئا ومبتسما بافتعال.....

وليد طب ممكن اعرف ايه الحكاية من الاول وبالتفصيل

- قطع -

مشهد (32) نهار - داخلى

حجرة مكتب الزمن

باهر وعطا يجلسان امام شاشة المكتبة يتابعان بشغف ما يحدث
لو هج.....

باهر كده السكة اتفتحت لنا عشان ندخلوا المكتبة ونوصلولهم
فى اى وقت

عطا	بس لازم يكون ده بأقصى سرعة قبل ماكل شئ يرجع لطبيعته
باهر	خلاص جاهز ندخلوا من دلوقتى
عطا	انا جاهز ومن زمان.... باللا بينا

مشهد (33) نهار - خارجى

المكافأة

راضى ومعه وهج يعودان الى الحارة....

حلموس حمد الله على سلامتكم ياراضى ياابنى.. الله هى جات معاك تانى...!

راضى (بغضب) اظن عيب اوى يامعلم لما ابقى ابن حنتكوا وتعملوا فيا كده خلاص هانتت العشيرة ، نسيثوا راضى واللى عمله واللى بيعمله معاكوا ؛ هو ده كرم الضيافة بتاعكوا.....

حلموس احنا آسفين ياراضى والله..... ده واحد غريب جه هنا امبارح وقعد عندى فى القهوة وقال ان الدكتور تبقى جاسوسة فقلنا نلحقوك... يعنى كان قصدنا خير

راضى طب واللى قصده خير مش يتأكد الاول قبل مايتهم الناس بالغلط

وهج مين اللى قال عليا كده... انا محدش يعرفنى هنا خالص

راضى (يخمن) مين عارف ليكون ليكى شبه فى زماننا مشكوك فى تصرفاتها

حلموس ع العموم احنا بنتأسفولك تانى وحنبوسوا راسك كمان

حلموس يقترب من راضى كى يقبل رأسه ولكن راضى يبتعد....
 راضى خلاص يامعلم حصل خير... وعشان الكل يعرف
 الدكتورة وهج دى ضيفتى لحد ماتخلص بحثها وبعد كده
 حتمشى عطول ، فالمفروض والواجب نورولهاكرمنا
 اللى على اصله.....
 حلموس معاك حق ياراضى وكلنا محققين لك ولست الدكتورة...
 يا أهلا وسهلا بالدكتورة يا أهلا. يا أهلا.....

مشهد (34) - نهار - داخلى

مكتب الضابط وليد

وليد يجلس الى مكتبه يفكر ويبدو عليه الحيرة..... يدخل عليه
 صديقه الضابط ممدوح فيجده هكذا مهموما.....
 ممدوح ايه يا وليد مالك.. شكلك فيه حاجة شغلاك
 وليد والله يا أخى مش عارف.. اللى اسمها وهج دى حكايتها
 محيرانى
 ممدوح ليه ياعم ماهى فهمتك انها مجرد باحثة وبتحضر رسالتها
 عن مشاكل الجيل
 وليد اهه ده اللى قالقنى رسالتها دى مداها لحد فين وتقصد بيه
 ايه ؛ مش بس كده طب ده ماشى بسيط لكن المشكلة
 الأصلية بقى ان معهاش اوراق تثبت ده او اى حاجة عنها
 ومطلعة لى شريحة غريبة مصممة ان عليها كل اللى
 يثبت شخصيتها وكلامها
 ممدوح طب ماشفتش اللى عليها ليه عشان نتأكد

وليد	هو انا خلّيت كذا موبايل وكمبيوتر حتى الالاب تسوب بررضه مافيش فائدة مافيش جهاز بيتعرف عليها
ممدوح	معقول أد كده البلد اللي جاية منها متقدمة التقدم ده كله
وليد	لأ والاغرب انها بتقول كلام مش مألوف وغريب علينا
ممدوح	زى ايه ؟
وليد	زى انها بتحضر رسالة درجة العُلما ، واحنا ما عندناش حاجة اسمها كده
ممدوح	وانت مزعل نفسك ليه حطها تحت المراقبة
وليد	وانت بتقول فيها ما ده فعلا اللي حصل لحد مانشوفوا نيّتها وأخرتها معاها ايه

مشهد (35) نهار - داخلي

حجرة مكتب الزمن

باهر	مع عطا امام شاشة المكتبة حيث يطفئها باهر للتو.....
باهر	كده خلاص اتسجلنا فى برمجة المكتبة ونقدروا ندخلوا فى اى وقت
عطا	ايوة بس وهج هى اللي بتبحث وتدور واحنا يا ضوب بنفترج
باهر	مين قال كده ؛ احنا حنمشوا معاها خطوة بخطوة ونسجلوا كل اللي حتمله على الذاكرة الالكترونية بتاعتنا
عطا	وهج مش سهلة وهى الوحيدة اللي ضدنا من ساعة ماجينا مدينة العُلما ، فمش معقول تسبينا بسهولة كده ناخذ بحثها وننسبه لينا

- باهر الموضوع مش صعب زى مانت فاكر .. وهج سهل
نبعدا عنا وبكده البحث حيكون لينا مية فى المية....
وبعدين مش دى شورترك من الاول
- عطا كنت فاكر الحكاية ابسط من كده.... اوعى تكون بتفكر
تقتلها
- باهر (يضحك) اقتل ايه ... هو انا مستغنى عن عمرى؛ ثم ان
القتل ده كان زمان والضعيف قليل الحيلة الغبى هو اللى
بيلجأله
- عطا اومال ايه ؟
- باهر ابدأ قبل ماينتهى معاد رجوعها اللى محداده نعمل لها
مشكلة تانية فى الزمن اللى هى فيه.....
- عطا ازاي..؟
- باهر ايه يابو الافكار مخك بدأ يتعطل ليه
- عطا مانا مش فاهم قصدك بالظبط...
- باهر يعنى حادثة بسيطة تقعدا فى مستشفى كام يوم ؛ مشكلة
صغيرة تخلص البوليس هناك يحجزها كام يوم خصوصا
ان معلوماتى عنه انه لايحل ولايربط بسرعة فى
البلاغات والقضايا واليوم بسنة.... وساعتها.....
- عطا (يكمل) ساعتها ييجى معاد رجوعها للمكتبة ويعذى
وماتقدرش ترجع فتتوه بين العصور فى المكتبة لآخر يوم
فى عمرها
- باهر يضحك ثم يضربه كفه بكف عطا فرحا على ماتوصلا اليه....
- باهر برافو عليك ...
- عطا ايه شغل الف ليلة وليلة ده يخرب عقلك...

مشهد (36) ليل - داخلي

شقت راضى الصالح

راضى يجلس مع وهج يتحدثان....

راضى فيه جملة قولتيها ادم الظابط انا مافهمتهاش

وهج جملة ايه دى؟

راضى تقريبا مافيش امريكا ، انهارت واتفككت من زمان ؛

انهى زمان ده

وهج لأن دى الحقيقة امريكا بقت دولة ضعيفة معدومة فى كل

شئ وتعتبر من الدول النامية دلوقتى

راضى (يفرح) لأ لأ لأ ياماشاء الله ، ياماشاء الله ماتقوليش...

احكىلى احكىلى.. وايه ياعينى اللى دهور حالها كده ؛

دى كانت فى عز شبابها ياخواتى (تضحك وهج)....

الكلام ده من امتى.....

وهج من 20.. 25 سنة كده تقريبا كنت أيامها صغيرة

حوالى.....

راضى مش مهم انتى كُنتى اد ايه وللا فين المهم ايه اللى

حصل لها

وهج شوف ياسيدى التاريخ والابحاث بتقول ان امريكا

بعد ما استولت ع العراق والكويت وقطر.....

راضى (يقاطع) احتلثهم يعنى.....

وهج احتلث ايه ؛ فكرة الاحتلال دى اقدم من كده

استولت عليهم فكريا واقتصاديا وثقافيا.....

راضى آآآه.... وبعدين....

وهج ودخلت كمان على البحرين وفردت شباكها ع الامارات
وكانت فى سكتها داخلة على عُمان....

راضى يخربيتها كل ده... دى زى الجراد...

وهج وقتها اسرائيل اتضايقت لأنها لاقت امريكا بنتجح فى كل

حيلة وحيلة عشان تستولى بيها ع البلد اللي عايزاها...

وعشان امريكا تتقى شرها اتفقت معاها تاخد هى دول

الشام الاربعة والسعودية لكن اسرائيل بقى كان كل

همها ازاى تستولى علينا قبل امريكا لأنها مؤمنة ان مصر

هى ارض الميعاد فوعدها امريكا انها تسهل لها الاستيلاء

على مصر.....

راضى كل ده بيحصل من ورائنا ياولاد الـ.....

كلمى . كلمى...

وهج فضلوا ع الحال ده سنين لحد فعلا مارجعت اسرائيل تحط

ايدها بطرق غير مباشرة على حطة حطة فى مصر سواء

مؤسسات او مصانع او شركات او عقول تجارية فزة....

راضى طب وامريكا...

وهج امريكا طبعا باقت مبسوطه ان اسرائيل بعيد عنها وملهية

فى حطة العظمة اللي رميته لها وقجأة ومن غير مقدمات

صححت اسرائيل من غيوبيتها وبدأت تاخذ بالها ان امريكا

مستولية على كل البترول ، يعنى استعبطتها واديتها الشام

ومصر اللي حتموت عليها واخذت هى الخليج ببترول

راضى وكل ده احنا قاعدين نتفرجوا...

وهج استيلائهم علينا مش واضح لينا كده زى مانت فاكر...

لكن بعد كده وضع خصوصا لما بدأت تظهر بينهم

الخلافات ووكالات الانباء العالمية فضحتهم ان فيه مشاكل
بينهم ع البترول... كانت فرصة كويسة وهم ملهين
فى خلافاتهم دى اننا نبدأوا نفكروا ونتفقوا ونخطوا ايدينا
فى ايدين بعض

الله اكبر .. أيوة كده.. اخيرا صحينا من النوم... ياااااه
دى كانت غيبوبة مش نومة .. كملى... فرحينى

راضى

خططنا ورتبنا واتفقنا اننا مش حنرضوا بالمهزلة دى اكتر
من كده عشان عيب ولازم نخطولها حد..... فرؤساء
الدول وشعوبها باقوا ايد واحدة ووقفنا فى وشهم واعلنا
الحرب عليهم، مش بأسلحة طبعاً لكن بالترهيب والتطفيش
فى البداية ؛ ولما حاولوا يغدروا بينا ويفدوا نفسهم أدام
بعض بينا طلعنا عليهم بقوتنا الجبارة مسحناهم من
اراضينا كلها بعدها انهاروا واتفرقوا لأنهم اتعاجنوا
بقوتنا دى

وهج

واسرائيل راحت فين دلوقتى ؟

راضى

رجعت تانى تأيهة بين دول العالم متشحطين محدش
طايقهم سمعتهم زى اللفت كل ما يروحوا بلد اهلها
يطردوهم منها ؛ اما امريكا فخلاص رجعت دولة بدائية
زى الاول رعاة بقر لا ليهم اصل ولا جذور ولا حضارة
هم من الاساس عمرهم ماكان عندهم حضارة.....
المهم طب احنا

وهج

راضى

احنا... احنا اقوى دول العالم ؛ باقينا كتلة وقوة واحدة
تحت علم وشعار واحد....

وهج

احنا مين ؟

راضى

وهج

احنا دول الاتحاد العربى ؛ كلنا ماشيين على نظام ومنهج
واحد اهمه مصلحة الدول والشعوب وعشان كده لازم
يكون فيه اجتماع كل اول شهر بين الرؤساء العرب
لمراجعة كل اللى حصل طول الشهر اول باول وايه
المفروض يتعدل او يتغير

راضى

و12 مرة فى السنة مش كثير

وهج

لأ طبعا دى مشاكل ومصالح شعوب واهم حاجة فى
الاجتماعات دى مصلحة البلاد والناس ولازم الكل
يحضرها عن طريق جهاز التسجيل الضوئى بالموجات
الفوق صوتية عشان يعرف اللى بيحصل فى الاجتماع ع
الهوا وكأنه حاضرمعاهم وممكن يدلى برأيه عن طريق
اشارات ورسايل ضوئية ويجب الرد عليها فوراً
ياسلام... انا كان قلبى حاسس برضك ان دمنأ حر لايمكن
نستسلموا بسهولة كده ابدا

راضى

مشهد (37) نهار - داخلى

شفت راضى

يرن جرس الباب صباحاً..... يأتى راضى كى يفتح

فيكون فتحى.....

راضى

فتحى!

فتحى

صباح الخير...

راضى

صباح النور... تعالى يافتحى ادخل ادخل

- قطع -

نفس المكان:

أجرت شقتك! ... ليه كده يافتحي	راضى
أهه العيشة باقت صعبة ، واللى بيحى احسن من مافيش	فتحي
والمحل اللي احنا شركا فيه؟	راضى
مش لما تبقى تفتحته ياراجل ؛ انت مش باين لك فيه	فتحي
بينة.....	
اصبر يافتحي على رزقك... اصبر	راضى
حاصبر اكتر من كده ايه.... خلاص باقيت مقشفر....	فتحي
فلوسك يافتحي على يدك كلها اندفعت أدامك لـ.....	راضى
عارف ياراضى.. عارف ؛ انا مش جاي اسألك عليهم أو	فتحي
أطلبهم منك ، المهم انا معاك وحنفضلوا صحاب وشركا ،	
واول ماتفتح المحل ابعتلى بس وانا حنيجي نقف معاك فيه	
وحتسكن فين ؟	راضى
اللى أجروا منى الشقة أدونى شقة لقطة فى كيلوباترا	فتحي
حمامات	
هم مين دول ؟	راضى
رجالة أبو النجا.....	فتحي
أبو النجا مين... ده معروف اوى كده يعنى	راضى
أبو النجا بتاع الكريمات والشامبوهات والحاجات اللي	فتحي
بتستعملها الستات دى	
آه بقال جديد يعنى حيفتح عندنا	راضى
بقال ايه ياراضى انت لسة ماصحيتش أبو النجا صاحب	فتحي
اكبر شركة استيراد فى اسكندرية ؛ اللي مغرفة السوق	
كله	

- راضى آآآ.. مستحضرات تجميل أبو النجا اللى بيقولوا انها
اصح وارخص مستحضرات فى مصر
- فتحى الله يفتح عليك.... شوف بقى لما شركة أبو النجا تاجر
شقتى
- راضى واديتاله بكام فى الشهر....
- فتحى (بفخر) بـ 150 جنيه فى الشهر....
- راضى (باستخفاف) بس... 150 جنيهه بس ؛ ليه ؟ انت
مابتسمعش عن الايجارات الجديدة وللا ايه... المفروض
تاخذ من شركة زى دى مشهورة مش اقل من 300 جنيه
ايه ياعم انت مش شايف الحارة اللى واخدين فيها
- فتحى وراجل زى ده غنى ومشهور ومبسوط يأجر شقة فى
المكان ده ليه
- فتحى وانا ايشعرفنى ياأخى ، مايعملها زى مايعملها مخزن ،
سكن هو حر
- راضى والايجار ده حيتجدد كل اد ايه...
- فتحى مافيش.. العقد مدته 15 سنة
- راضى ايه 15 سنة انت اتجننت... انت عايزه يستولى عليها
طب والسعر ؟
- فتحى ماقلت لك 150
- راضى طول ال 15 سنة
- فتحى أيوة اومال ايه
- راضى انت غبى... لأ انت اكيد غبى ومابتقكرش ؛ عامل معاه
عقد لمدة 15 سنة وبنفس السعر... انت مش شايف كل
يوم الدنيا بتغلى ازاي طب كُت خليه يتجدد كل 3

سنين ... انت حمار يالة ، ضيعت من ايديك فرصة
عمرک ، لازم العقد ده يتغير

فتحى (بندم) يتغير ايه ياراضى.....

راضى يتغير على انه يتجدد كل 3 سنين ع الاقل تزودك الايجار
100 او 150 كل مرة ع الاقل

فتحى (بحسرة) للأسف ياراضى العقد اتسجل واللى حصل
حصل...

راضى يخربيتك.... يخربيتك ايه... مانت خلاص خربته
بايدك.... 150 جنيه على 15 سنة يامفتري

فتحى خلاص بقى ياراضى ماتحسرنش

راضى احسرك.. هو انت بتفكر وللا عندك مخ اساسا وزعلان ع
ال7000 جنيه العُمى اللى عطيتهمولى.... جائك خيبة
اتوكس

فتحى طب.....

راضى بلا طب بلا ماطبش... امشى يافتحى مع ألف سلامة...
روح الله يسهل لك... روح....

مشهد (38) نهار - خارجى

بورصة حلموس

حلموس يجلس مع راضى بالقهوة....

حلموس ماتزعلش ياراضى ياابنى... اذا كان صاحب الشقة
راضى وموافق انت مزعل نفسك ليه

راضى

صعبان عليا ؛ حاسس انه اتاخذ على قفاه واستغلوا طبيته..... شقة بالمساحة دى _ صحيح هى فى حارة _ بس من بيوت زمان اللي تجرى فيها الخيل ، يفرط فيها بالسهولة دى وبالسعر الأهل ده

حلموس

سيبك من فتحي وخليك فى نفسك شوف مصلحتك انت ، حتفضل شايل هم غيرك وزعلان عليه ليه بس ياأخى

راضى

طب اعمل ايه يامعلم، ماهو كله على يدك المحل واقف حاله من بعد خناقتى مع بتاع التراخيص وقاعد ع القهوة لاشغلة ولا مشغلة.... والواد حمدى أخويا اللي حاله يصعب ع الكافر أخذ شهادة السياحة بتاعته من المعهد بقاله سنتين وبيشتغل ع الكافيتيريات اللي ع البحر ومتبهدل كل يوم والثانى مع شرطة الازالة ومش عارف ياخذ حقه من صاحب الكافيتيريا..... ورانيا اللي حالها يغمُ أمى مخلصه خدمة اجتماعية من 3 سنين وحفت على شغل فى أى مدرسة مافيش وانتازلت عشان تبقى بياعة فى محل حتى مانفesch ولحد دلوقتى ماجلهاش نصيبها.... وأمى اللي شايلة كل ده فى قلبها وساكتة.... عايزنى نشوف كل ده وننسى ونفرح

حلموس

لأ... بس تفكر.... تفكر بمحك الالكترونى اللي اتعودنا عليه

راضى

أنا خلاص أسلاك وفيوزات مخى ضربت ماباقيتش عارف نفكر

حلموس

طب واللى يدلك على حاجة تفتحك باب رزق ثانى يمكن تفك عليك همك

- راضى (بدون اهتمام) وایه هی دی یامعلم
 حلموس نكلموك سيد يكلمك حد من صحابه السواقين يشوفك
 تاكسى وللا مشروع او تئاية حتى تشتغل عليها
 راضى مشروع وتاكسى ايه بس يامعلم ؛ وبعدین سيد ربنا تَاب
 عليه من الشغلانة الهباب دی وبقي سواق لوا بحرى لولا
 كده كان زمانه دلوقتى بيتعالج فى المعمورة وانا مش
 حمل ده وانت عارف كده كويس
 حلموس وایه عيبها بس دول بيكسبوا دهب
 راضى عيبها انها عايزة الصايغ اللي لسانه طويل وحتى لو
 مؤدب بيتقلب بعد كده ويبقى قليل الأدب ؛ يعنى ده مرض
 ودابر عليهم عشان بيجيلهم صرع ع الفلوس
 حلموس بس انت غيرهم ياراضى والفلوس انت محتاجها
 راضى برضك لأ يامعلم.... اطلع ع البحر كده - وللا بلاش
 بص ع البلد كلها حتلاقى المشاريع والتاكسيات زى
 الصراصير اللي طالعة من البلاءة جعانة كل همها مين
 يسبق ويلحق يخطفه زبون قبل التانى وللأسف ناسيين ان
 الرزق ده بتاع ربنا وهو اللي بيقسمها لكن المخ التعبان
 بقى تعمل ايه
 حلموس انا عارف انهم ولاد أبالسة مشيهم فى الشوارع ممكن
 يلبس العربيات فى بعض ويودى فى داهية بس صوابك
 مش زى بعضيها
 راضى عموما يامعلم الشغلانة دی بالذات عمرى ماحنشتغلها
 حتى لو كات آخر شغلانة وحنشحتوا بعدها

مشهد (39) نهار - داخلي

شقت راضى الصالح

وهج تجلس مع رانيا.....

وهج معقول 3 سنين متخرجة ومالاقيتيش شغل

رانيا تمسك ببعض اللولى والخرز والاحجار وتلضمهم بخيط من النايلون
حيث انها تصنع عقدا....

رانيا هو انتى مش عايشة فى البلد وللا ايه... صحيح!!! انتى
دكتورة وليكى شغلك ووضعتك

وهج مش فاهمة....

رانيا ايه ياذك.... انتى ماتعرفيش ان بلدنا ماشية بالكوسة

وهج (بتعجب) كوسة!!!!!! يعنى ايه بياكلوا كوسة بس

رانيا ياكلوا كوسة ايه.. مش باقول لك انتى مش من هنا

وهج طب فهمينى.....

رانيا بصى ياستى... انا قدمت فى مدراس البلد كلها من

حضانة لثانوى ومن حكومة لخاص للغات وكل واحدة

فيهم تطلع لى القلط الفاطسة.....

هنا تبدأ رانيا التحدث بسخرية

ان كات خاصة لازم اكون دارسة تربوى واذا لغات لازم

اكون ياطالعة من مدارس لغات ياخرجة آداب او تربية

لغات حتى الحضانات اللى ماطلعوش من البيضة

مشرطين انى ماتكلمش ولاكلمة عربى وكلهم طالعينلى

فى موضة النظام الامريكانى اكننا مش مصريين؛ وكله

كوم بقى والمدارس الحكومة كوم... لازم يكون معايسا

ورق متأثر عليه من الوزير..... بذمتك انهي وزير ده
اللى فاضى وماوراهوش حاجة غير انه يأشر على اوراق
تعيين كام مليون واحدة زى عايزة تشتغل مدرسة كل يوم
يمكن هو ده النظام...

وهج

رانيا

لأ طبعا لأنى عرفت بعد كده انه لازم واسطة حد مهم
يكون معرفة الوزير يتكرم ويأشر عليها... لأ واه كمان
كل لون امضا وله معنى ؛ يعنى امضة القلم الازرق
يستنى والاسود لأ والاخضر مش عارفة ايه أما الاحمر
بقى فيتعين فورا

وهج تنتظر اليها بألم.....

مين عارف يمكن ربنا شايل لك حاجة احسن او تتجوزى
راجل يرحمك من الشغل وبهدلته اللى على ايامكوا دى

وهج

يظهر على وجه رانيا التحسر....

وانا كُت باتعلم واسهر واتعب واهلى يصرفوا عليا ليه ؛
مش عشان اتخرج واشتغل وأردلهم جزء من جميلهم ده
ونساعد نفسى شوية بدل ماالحمل كله يبقى عليهم.....
وبعدين عريس ايه ده اللى حنستاه ونحط املى كله عليه
مش يمكن مايجيبش خالص

رانيا

ياشيخة حرام عليكى ، بلاش التشاؤم ده

وهج

وانا فى آخر سنة فى الكلية بدأت نعلم بالعريس اللى
حييجى يطلبنى... بشكله.... مواصفاته... وبعد ما
اتخرجت فضلت برضك مستتياه وعندى امل انه لازم
حييجى خصوصا ان كل يوم والتانى واحدة من صحباتى

رانيا

يا بئتخطب يا بئتجوز فكت متأكدة انه قرب اوى.....

لكن دلوقتى وبعد 3 سنين خلاص شلت الحكاية دى كلها
من دماغى

وهج عامة الحاجات دى بتاعة ربنا فبلاش اليأس ده

وقولى دايما لنفسك انه اكيد شايل لك الاحسن عشان
يجيلك الخير كله

رانيا تبتم بخجل.....

مشهد (40) نهار - داخلى

حجرة رزين

مقبل بجانب رزين يراجعا معا بعض الرسومات البيانية والارقام

على شاشة امامهما.....

رزين ماقولتليش يامقبل ايه اخبار رسالة وهج

مقبل كله تمام يا عالما وتحت الاطلاع

رزين والاتنين اللى بيضايقوها....

مقبل تحت المراقبة والسيطرة...

رزين لازم تاخذ بالك منهم كويس وتشد المراقبة؛ ملفهم بيقول

انهم بيقوموا دايما بعمليات تخريبية وغير متوقعة

مقبل ولايهكم سيادتكم.... باهر وعطا تحت عينيا انا شخصيا

وأجهزة المراقبة مش غفلة عنهم؛ وفى الوقت المناسب

حنكشفهم.... بس خليه يلعبوا ويفرحوا شوية قبل العقاب

الكبير

رزين خلىنى على اطلاع اول بأول يامقبل عشان وكيل سيادة
الريس مهتم جدا بالحكاية دى ومتضايق ان ازاي المدينة
يحصل فيها خلل زى ده
مقبل اتضمن سيادتك وسيادة الوكيل، بينى وبين وهج اشارات
موجبة طول الوقت

مشهد (41) ليل - خارجى

كافيتيريا الانفوشى على البحر

راضى ومعه وهج يقتربان من كافيتيريا متراصلة الترابيزات
والكراسى على رمال الشاطئ امام مياه البحر مباشرة.....
راضى هنا بقى القعدة ترد الروح وتنعش الواحد.... انا لما
بنزهق بنيجى نقعد هنا، وخدى بالك احنا لينا واسطة هنا
وهج واسطة..! واسطة ايه !!؟؟
حمدى يأتى مقتربا منهما من بعيد وهو مبتسما.....
راضى وهو يشير نحو حمدى اخيه.....
راضى آهى الواسطة آهى.....
تضحك وهج.....
وهج حمدى اخوك....
حمدى يا أهلا.. يا أهلا.. اتارى الكافيتيريا منورة
راضى بس واضح انها زحمة النهاردة..... انا مباحشدش.....
حمدى يقترب من ترابيزة بالقرب من مياه البحر ثم يجذب كرسيان الى
الترابيزة.....
حمدى اتفضلوا... احلى مكان لأحلى أخ وديكتورة....

يجلسان راضى ووهج

حمدي ها... تشربوا ايه بقى ؟

راضى تشربى ايه يادكتورة

وهج أى حاجة.... اللى عندك....

حمدي يبقى ليمون....

. احلى اتنين ليمون هنا ثوانى.....

يذهب حمدي.....

وهج تنظر الى البحر وتستنشق رائحة اليود بقوة ولكنها بمجرد ان تستنشق الهواء تبدأ فى السعال بشدة وكأنها قد استنشقت ترابا او هواء ملوثا.....

راضى (بفرعة) مالك ... فيه ايه ؟

وهج ايه الريحه دى انا مش قادرة اتنفس

راضى ليه ده حتى المكان مفتوح وكله هوا

وهج هوا مسموم يجيب اختناق.... ايه كمية الدخان الكثيرة دى

رغم ان المكان زى مانت شايف مفتوح ، لأ ده ع البحر

علطول كمان.....

راضى آآه...قصدك الشيش... (بسخرية) ماهى دى موضه

العصر والتحضر بتاعة النومين دول واللى مايعملهاش

يبقى متخلف

وهج معقول... معقول.. فيه ناس حابه تموت نفسها.... مع

انى اعرف انها بطلت من زمان

راضى عايضة تفهمينى ان مافيش ولا شيشه واحده فى عصر كوا

وهج أبدا... مطلقا ولا سيجارة حتى...

راضى ازاي ده... اومال الناس بتتكيف ازاي

وهج (باستهزاء) تنكيف !!! قصدك تتنيل وتعياء.... الحاجات
دى اتمنعت من البلد بقرار وزارى من وزارة صحة
الشعب ويتنطبق فى كل دول الاتحاد بموافقة رؤساء الدول
عشان صحة شعوبهم

راضى (بتعجب) ياسلام...!!! طب واصحاب المصانع والتوكيلات
الاجنبية والمستوردين

وهج كلهم الدولة اتعاملت معاهم باللى يرضيهم ؛ يعنى اصحاب
المصانع طلبت منهم الدولة تغيير مواد التصنيع فى مدة
محددة مع مساهمة الدولة معاهم، والتوكيلات اتلغت
واتغيرت تحت اشراف الدولة، اما المستوردين فعوضتهم
الدولة عشان يستوردوا مواد تانية مفيدة فى الصناعات
المختلفة اللى عندنا

راضى ووافقوا كده بسهولة...؟
وهج ده قرار دولة محدش يقدر يعترض عليه وفيه قوانين
صارمة اللى يخالفها عقابه يبقى شديد خصوصا ان ده فى
مصلحة الشعب

هنا تنظر وهج حولها فتجد رجل وزوجته يجلسان وفى يد كل منهما شيشة
ومنسجمين ومستمتعين.....

وهج وهج تشير نحوهما.....
وهج يعنى ده راجل ده يسمح لمراته تقعد تسحب من الشيشة
كده زيبا زى الراجل دى اكيد ارجل منه

تنظر لترابيزة اخرى فتجد رجلا يجلس وعلى رجليه طفل بيدو انه ابنه
حيث لم يكن قد تم العام الكامل فيسنده باليد اليسرى ويمسك بالشيشة
باليمنى ، اما زوجته فتنطعم ابنتها اكبرى التى لم يتعدى عمرها الثلاث

سنوات فكل الدخان الصادر منه يواجه وجهي الطفلان ويتخلل فتحات
انفيهما الصغيرة....

وهج وللا ده الى عايز الحرق... منتهى الجهل والتخلف ولاده
لارقين فيه وهو شغال مدخنة ومخه ممسوح منه انه
ممکن يخرّب صدورهم ورثاتهم بالدخان المسموم ده

ثم تتظر الى مجموعة من الشابات يجلسن معا منهن اثنتان ترتديان
الحجاب وكل واحدة منهن بجانبها شيشتها الخاصة....

وهج (بأسى) وللا البنات اللى لسة فى عز شبابهم وبداية
حياتهم... أد كده وقتهم فاضى جدا ومش عارفين يملوه
ازاى وبياه ، فين اهااليهم سايينهم كده ازاى

راضى تلاقيهم بيعملوا انيل من كده... ماهو اللى زى دول
اهاليهم تايهين وقدرتهم اضعف من انهم يربوا فرموهم فى
الشوارع عشان مايتحملوش مسئولية التربية

وهج وبعدين ازاى الحجاب يمشى مع المنظر ده.. لبسته ليه
اساسا ده مالوش علاقة بأفعالها واخلاقها

راضى (بتحكم) لآآآ... اصل حجاب اليومين دول موضه اللى
بتلبسه تبقى حاجة من الاتنين يالما شافت وشها فيه احلى
وصحابها وللا صاحبها خدعها بكده يالما عشان تخبي بيه

شعرها الاكرت وتوفر مصاريف كوافير ، لكن اللى
بتتحجب عشان ترضى رينا دى باقت زى العملة النادرة
فى الزمن ده..... على كده لسة عندكوا اللى متمسكين
بالحجاب

وهج الدين عندنا اساس وعماد الدولة وفرض ع الكل احترامه
من اكبره لأصغره....

(وهج تشمئز) هو ده المكان اللى يرد الروح ده ياخد

الروح

هنا تأتى سيارة نقل كبيرة مليئة من الخلف بالترابيزات والكراسى وغيرها،
وامامها سيارة شرطة...

ينزل الضابط وبعض العساكر خلفه.....

الضابط لموا الكراسى والترابيزات كلها وهدوا المطبخ ع الللى
شغالين فيه

صاحب الكافيتيريا يجرى مهرولا نحو الضابط.....

ص. الكافيتيريا خير ياباشا فيه ايه ...؟ زى ماسيادتك شايف المطرح

مليان ناس حنودوهم فين... معقول حنكرشوهم

الضابط مش شغلى.. انت عارف من الاول ان المحافظة مانعة

قعدات البحر دى لأنها مظهر مش حضارى

حمدى يقترب.....

حمدى ازاي ياباشا مش حضارى اذا كان كل زبايينا سواح

واجانب وبينبسطوا اوى هنا عندنا؛ وبعدين دى لقمة عيش

الكام شهر بتوع الصيف وبعدها بنهدوا كل حاجة

باقيت السنة

الضابط لم ينظر لهما ولم يهتم بكلامهما حيث بدأت العساكر فى جمع

الكراسى والترابيزات واخلاء المكان فتبدأ الناس تشمئز مما يحدث

وتتعالى اصواتهم.....

اصوات الناس ايه ده مافيش ذوق.....

روحوا اتشطروا ع الللى ناهيين البلد وامسكوهم.....

ليه كده قليتوا راحتنا ربنا يقل راحتكو يابعدة.....

ص. المكان ياباشا مش كده ياباشا.... حرام عليك الناس ذنبها ايه....

الضابط اللوائح والقوانين واضحة وصريحة
حمدي طب يعنى نطردوا الناس ياباشا.... ينفع كده... طب حقنا
وفلوسنا.. يقعدوا ويطلبوا طلبات وانتوا تيجوا تمشوهم
ومايدفعوش تمن الخدمة حتى

الضابط (بزق) برضه مش شغلى... ياللا ياابنى انت وهو خلص
صاحب المكان يخرج بعض النقود وهو يطلب من احدى العاملين....
ص. المكان هات يالة حاجة باردة هنا للباشا
يأتى احدهم مباشرة بالمشروب البارد.....
ص. المكان اتفضل ياباشا حاجة بسيطة كده لزوم الضيافة... وبرضك
عشان تروق اعصابك
(ثم يمد يده ببضعة مئات الجنيهات مكمل).....
وسيادتك الخير والبركة برضك... احنا مانقدروش
نستغنوا عنك.....

الضابط ايه دول يالة.. رشوة...!!
ص. المكان العفو ياباشا دى غرامة المطرح بدل ماتهدا سيادتك علينا
والباقي عشان نحلوا بيهم بق العساكر اللي دايرين فى
الشوارع طول اليوم وتعبانين
كده....

الضابط ثم يمد يده ويأخذهم فيضعهم بجيبه مباشرة قبل ان يلمحه احد.....
الضابط خلاص ياابنى انت وهو خلوا الناس تكمل قعدتها ورجعوا
الى اخدتوه (يلتفت لصاحب المكان)..... (يهمس) بس
ابقى وطى صوت الكاسيت شوية فيه ناس بتشتكى
ص. المكان (فرحا) بس كده ياباشا انت تؤمر كتر خيرك والله.. ربنا
يخليك لينا... كلك ذوق والله ياباشا...

وهج ترى ماحدث وتكاد تُجن مما يدور امامها.....
 راضى قبل مائقولى اى كلمة ... والنبي تنقطينا بسكانك وتندارى
 شوية لحد ماينكشحو من هنا
 الضابط يغادر ومن معه....

وهج (بغيط وانفجار) دى إتاوة... معقول ده ظابط محترم ده...
 ازاي يقبل على نفسه كده ؛ هم دول آكلين السحت الللى
 ربنا قال عليهم دول آخرتهم سودة
 راضى (باستهتار) هم بتوع الازالة ماشيين كده تدفع اسيبك
 ماتدفعش اجيبك هو مرتبهم ايه يعنى غير ملائيم وموسم
 الصيف ده هو موسم لم الفلوس لكن يطبق القانون صح
 مافيش هو جاي وعايذ فلوس من الاول

مشهد (42) ليل - داخلى

داخل تاكسى بطريق البحر

وهج مع راضى وقد استقليا تاكسى حيث ان سائقه ملتحميا بلحية
 طويلة وعلى جبينه زبيبة الصلاة ويضع بالكاسيت شريط قرآن مفتوح
 وهو يتلو.....

السائق عصبى المزاج يقود السيارة بعصبية حيث يكسر نحو
 اليمين بسرعة تارة ونحو اليسار بسرعة تارة اخرى ولم يعطى
 اية اشارات لمن خلفه او حوله فجميع السيارات يعطونه انذارات بآلات
 التنبيه.....

راضى يتعجب مما يصدر من ذلك السائق الذى يبدو على مظهره
 التدين فهو لم يعجبه ما يحدث.....

راضى
السائق
بالراحة ياسطى مش كده..... قلبتلى معدتى...
معلش بأستاذ... اصل السواقة فى الزمن ده لازم تكون
كده عشان الحق وقتى والحق اوصلك واركب غيرك
برضه لامواخدة

راضى
السائق
انت كده حتموتنا ومش حتلق لاتوصلنا ولاتأخذ
غيرنا.... غيرك هو اللي حيوصلنا المستشفى
(يضحك) أعوذ بالله... فال الله ولا فالك ياأخى...
ماتخافش... امسك نفسك انت كويس بس

راضى
وهنا يضغط السائق على الفرامل فجأة... فينزله من خلفه بواسطة آلة
التنبيه بشدة.... يخرج السائق يده من الشباك ويلوح له بقرع وعدم
اهتمام.....

السائق
وهج
ياعم روح.. انت مش شايف بنعدى المدام
وهنا تعبر الطريق امرأة منقبة فيعاود السير مرة اخرى...
(تهمس) هو اللي زى ده سايبينه ليه ؛ ده لو كان عندنا
كان زمانه يافى السجن يافى مستشفى الامراض النفسية
والعساكر اللي مالية الشوارع دى مافيش واحد فيهم
يحاسبه او يعاقبه

راضى
لاآآآ... العساكر عندنا واقفة زى الطرايطير لابتش
ولايتنش مالهاش لازمة اساساً....

وهنا تظهر سيارة تقودها امراة محجبة ولكن على الطريقة الاسبانية
الحديثة تسير بجانبهم ولكنها متقدمة عنهم قليلا فيفاجئها مشروعا مسرعا
يكسر امامها عنوة فتحاول مفاداته فتكسر قليلا امامه ثم تشير اليه معتذرة
عما فعلته حيث انه من المؤكد قد رأى ماحدث امامها.....

فیتقدم بسرعة ويسد عليها منفذ المرور من امامها ومن بعدها يتمايل
مكاسرا يمينا ويسارا كى يضايقها بل ويبطئ امامها ويقف فجأة حيث انه
يريدها ان تصطدم به وذلك تأديبا منه لها على ما فعلت.....

راضى ليه كده ياأخ كده انت ممكن تخطبها
السائق اصل اللى زى دى مابتعرفش تسوق دى كانت حتمدخل
 فيها وساعتها مين كان حينفعنى لما التاكسى يتخرشم وفى
 الآخر تطلع مسنودة وابقى انا الغلطان

راضى انت خلاص ألفت قصة واخرجتها وحكمت عليها من غير
 ماتشوف وشها حتى

السائق مش شايف حضرتها عملاى نفسها محببة ورابطة لى
 حثة أثاربة شبه المنديل بذمتك ده حجاب ربنا ده
 وهج تحاول الرد وهى بيدو على وجهها الاستفزاز منه...

وهج هى مش الست اعترتلك وللا يعنى عايزها تبوس ايديك
 عشان تصفح عنها يعنى لو العكس اللى كان حصل
 عمرها ماكانت حنتصرف تصرفك العيالى ده، ده يمكن
 كنت انت اللى بجحت فيها كمان

راضى استنى انتى.... ياشيخ عيب على دقك والزبيبة اللى على
 قورتك دى ؛ عمال تكاسر وتسابق وتزعق فى ده وتشوح
 لده ومافيش اى صبر؛ هى دى لحية وللا حلية؟!!!

السائق انت زعلان ليه يااستاذ كل ده عشان بنقلوا الحق

راضى حق !! يظهر ان الدين والتدين بقوا مظاهر اليومين
 دول...حثة دقن وزبيبة سودا وقفطان وللا بنطلون قصير
 وباقيت كده ماشى ع السنة... لآآ يااسطى الدين اهم
 واكبر من كده بكثير

وهج الست اللى انت ضايقتها دى ممكن تكون عند ربنا احسن
بكثير من المنقبة اللى انت عديتها وعطلت الطريق كله
وراك عشانها،،، واضح ان اللى انتوا فيه ده من البطالة
والجهل وضيق التفكير

السائق ينظر اليها شظرا.....

انت بتاخذ بالظواهر وناسى ان ربنا بياخد بالبواطن
راضى (بقرف) اقف هنا ونزلنا.. الله الغنى عن توصيلتك دى
ياشيخ....

يقف التاكسى بوسط الطريق ثم يفتح راضى الباب كى ينزلا منه وقبل ان
يغادرا.....

وهج كمان معطل المرور ومنزلنا فى وسط الشارع ده انت
رايح فى داهية

راضى دول فاكرين ان الطريق ملكهم ياماما ومحدث سائل انتى
بتقولى ايه بس ياللا ياللا..... ياريتك تراعى ربنا وتسمع

القرآن اللى انت مشغله ده بدل ماتشاكل فى خلق الله
ينزلا الاثنان ويقفا بالشارع وقبل ان يضغط السائق على البنزين
للرحيل.....

وهج (بصوت عال) ابقى احلق دقنك عشان مش لايقة على
اخلاقك

راضى ووهج يضحكان

مشهد (43) ليل - خارجى الحارة

يدخلا راضى ووهج الحارة وهما مازالا يضحكان على ماحدث
من ذلك السائق المعتوه..... رانيا تكون واقفة بالبلكونة منتظرة اخيها
ووهج.....

رائيا يسسس . يسسس. يسسس

راضى يرفع رأسه ليرى ماذا تريد رانيا منه....

رائيا ككيلو رز، وكيلو سكر، ووربع جبنة تركى

يقتررب راضى من البقال الذى لم يبعد عنه سوى بضع خطوات....

راضى سلام عليكو يا عم احمد...

عم احمد اهلا ياراضى ازيك....

راضى تعيش يا عم احمد ؛ والنبي عايز 5 كيلو رز وكيلو سكر

وربع تركى بس ارخص حاجة عندك

يدخل عم احمد بالدخل ثم يأتى بما طلبه راضى.....

عم أحمد أهُم ياسيدى اتفضل...

راضى تشكر يا عم احمد كام ؟

عم أحمد 43 جنيه...

راضى (ينتفض) كام ؟ 43 جنيه ، هى دى ارخص حاجة!!!!

عم احمد ابوة والله ياراضى...

راضى يخرج النقود بأسى ثم يعطيه النقود ويده ترتعش.....

راضى ليه كده يا عم احمد.....

عم احمد أصل الدولار والبنزين غلوا.... مالك ياراضى ايدك

بتترعش ليه...

راضى اصلها حثثشل من ثقل الفلوس... وبعدين انت مالك بالدولار انت تعرفه أصلا وللا عمرك شفته ، ومالك بالبنزين هو انت بتركب عجلة حتى.... انت حثقرع عليا عم أحمد ماكل الناس ماشية كده وكل يوم يقولوا الكلام ده فى الدش...

راضى ياسلام ، واخذت وقت اد ايه عشان تحفظ الكلمتين دول.... هات . هات منكوا لله ياللى فى بالى....

عم أحمد مين دول ياراضى؟....

راضى خليك فى حالك ياخويا....

تضحك وهج....

راضى يتوقف فجأة بعد ان سارا مسافة قليلة....

راضى إلا بالحق أخبار الدولار عندكوا ايه ؟

وهج مافيش حاجة اسمها دولار من ساعة ماوقعت امريكا....

راضى يكمل سير ومعه وهج....

راضى آه. تلاقيها عاملة زى عملة العراق دلوقتى باقت ملاليم

وهج تتوقف ثانية....

وهج مابقاش فيه دولار من اصله

راضى يتوقف بالتبعية من وقع الكلمة....

راضى او مال ايه العملة الاولى فى العالم ؟

وهج العملة باقت موحدة على مستوى العالم بعد انهيار امريكا

واتحاد دولتنا فرضنا ع العالم توحيد العملة وانها مانتقاش

لمموسة لأنها عبارة عن شريحة صغيرة اسمها الشريحة

المالية هى اللى بنتعاملوا بيها

راضى يعنى مابتمسكوش فى ايديكوا فلوس خالص

- وهج بأقولك شريحة مالية الفلوس فيها مش ملموسة معنوية بس
يابيدخل لك فيها رصيد ياتطلع منها رصيد
- راضى طب بتقولوا عليها ايه .. ؟
بيدو على وجه وهج عدم فهم المقصود من السؤال.....
- راضى يعنى مثلا اللي جيبته دلوقتي ده بـ 43 جنيه... عندكوا بقى
تقولوا بـ 43 ايه ؟
- وهج آآه ... نقطة...
- راضى أفندم....
- وهج نقطة... تعاملات العالم والناس والدول مع بعض بالنقط
راضى (باستكار) نقط نقط ايه...
- وهج يعنى اشترى اللي عايزاه وفي الاخر اطلع الشريحة
المالية وأسأل بكام فيقولوا لى مثلا 50 نقطة فياخذوا من
الشريحة عن طريق جهاز مخصوص ليها 50 نقطة
- راضى طب دى العملة الكبيرة اللي هي الجنيه القروش بقى
اسمها ايه يعنى 50 نقطة و35 ايه قرش النقطة مثلا
- وهج مافيش كسور كله صحيح 50 يعنى 50 ، 100 يعنى 100
احنا لسة حندوخوا روحنا بالكسور كمان ايه الهيافة دى
- راضى تصدقنى ان انا اللي جات لى نقطة.....
أدامى ع البيت....

مشهد (44) ليل - داخلي

منزل باهر

باهر يجلس الى مكتبه الالكتروني المجهز بشاشة على مسطحه
وبعض الازرار التي تعمل باللمس وبجانبه عطا.....

باهر ياللا يا عطا نلحقوا نسلجوا ع الذاكرة الالكترونية الحاجات
التي وصلت لها وهج طول المدة اللي فاتت

عطا طب مليوني.....

باهر سجل عندك...

يعتدل عطا في جلسته امام الشاشة الموجودة على سطح المكتب المعلق
على الحائط ثم يمسك بعصا صغيرة رفيعة زجاجية أشبه بالقلم يلمس بها
بعض الازرار التي تحت الشاشة حيث تعمل باللمس بينما باهر يبدأ املائه
ماسيسجله.....

باهر وصلنا ان الزمن ده كان فيه مشاكل ونقائص كثيرة هي...
زحمة ودوشة وعوادم عربيات ومصانع زعيق وشتايم
واخلاق تكاد تكون معدومة...

تلوث بيئي وشيئش وسجاير وامراض خطيرة علاجها
صعب بسبب اهمال المسؤولين في اكتشاف العلاج....
شوارع مش نظيفة كلها زباله وحشرات وحيوانات ضالة
اهمها الكلاب ده غير الحمير والحصنة...

المشكلة الاكبر بقى الغش والرشاوى وبوليس ضعيف
قليل الحيلة قدام المشاكل كل همه ازاي ياخذ فلوس من
الناس سواء له حق او لا مافيش قوانين قاطعة تواجهه
الغلط واللى بيغلطوا.....

بطالة وعنوسة بنسبة كبيرة يأس مالى حياتهم بدل التفكير
فى حاجة مفيدة.....

آخدين التدين بالمظهر وهُم من جواهم مايعرفوش حاجة
عنه اساسا... زائد معيشة بتغلى كل يوم عن التانى
على الناس

عطا (بتأثر) دى مأساة... الناس دى عايشة ليه مايروحوا
ينتحروا احسن.....

باهر ولسة اللى جاى أنيل وماخفى كان اعظم.....

مشهد (45) نهار - خارجى

بورصت حلموس

راضى يجلس مع المعلم حلموس....

حلموس إلا اخبار شركة ابو النجا ايه؟

راضى أهه بقالهم يومين عاملين دربكة فى الشقة... يظهر انهم
بيرصوا فرشها

حلموس تصدق ان حاجات ابو النجا دى ارحص حاجات مستوردة
فى السوق

راضى مش حاجة غريبة يامعلم تبقى كل حاجة بتغلى كل يوم
ومستحضرات ابو النجا المستوردة هى الوحيدة اللى

سعرها رخيص لأ وعليها عروض دايمًا

حلموس أنا اسمع ان ابوالنجا ده راجل تأى يعرف ربنا....
ده عامل مساجد وملاجئ ايتام مشاريع كلها خير

للناس الغلابة

راضى الله اعلم...
هنا يأتى سيد مهرولا نحو راضى ويبدو عليه الفزع.....
سيد استلحقنى ياراضى....
راضى يهب واقفا.....
راضى خير ياسيد فيه ايه ؟
سيد استعالى معايا حالا دلوقتى...
راضى على فين ؟
سيد فى السكة حنستقولوك.....

مشهد (46) نهار - داخلى

شغف اللواء هاشم

وبهبو شقة فخمة تتكون من طابقين بأحدى العمارات الراقية حيث
يكون صاحبها هو اللواء البحرى هاشم الذى يعمل سيد لديه سائقا.....
يقف سيد وامامه على منضدة السفرة الفخمة الطويلة ثلاث تلفزيونات
وراضى يقوم بفك واصلاح احدهم حيث يقفا سيد واللواء بجانبه.....
سيد راضى ده ياباشا ابن حنتى وايديه تستلف فى حرير...
ده خلى التلفزيون عندى بقى الوان
اللواء هاشم (بدهشة) ايه؟؟!!
راضى كده تمام ياباشا... ال3 تلفزيونات والريسيفر والكمبيوتر
رجعوا احسن من الاول
هاشم تسلم ايديك ياراضى ؛ اول مرة تحصل عندى قفلة كده
فى الكهربا.. انا قلت ان الاجهزة دى كلها اتحرقت

راضى لا ياباشا.. حصل خير.. تلاقى بس التحميل كان زيادة
شوية ع الكهرباء حاولوا ماتشغلوش اجهزة كثيرة مع بعض
فى وقت واحد وعامةً احنا فى الخدمة

هاشم تُشكر ياراضى تعبك معانا... انت خريج ايه ؟

راضى ماتقولش كده ياباشا... انا خريج معهد لاسلكى
هنا تدخل نانا ابنة اللواء البحرى هاشم.....

نانا هاى بابى ... هاى اسطى سيد

هاشم ايه الاخبار يانانا....

نانا انا تعبت جدا النهاردة ومعرفتش احبب اى حاجة.. مافيش
ركنة فى اى مكان ، كل ماجى اركن فى حنة يطلع لى
عسكرى وللا امين زى العفريت يقول لى (بطريقة
ساخرة) ممنوع الوقوف هنا.... اومال اقف فين عشان
انزل اشترى اللى عايزاه

هاشم (بضيق) ومابتوريهوش الكارنيه بتاعى اللى معاكى ليه..
ماكانش حد فيهم قدر يفتح بقه؛ ما هم مابيجوش
غير بالسك

راضى ينظر الى سيد حيث لم يعجبه الكلام.....

نانا مانت عارف يابابى مابحش اطلع الكارنيه بتاعك ع
الفاضى والمليان..... المهم.... لاقيت اللى قللتك عليه

هاشم اللى هو ايه ده ؟

نانا أوام نسيت كده...

راضى طب ياباشا نستأذنوا احنا بقى عشان

نانا مين ده يابابى.....

سيد ده راضى صاحبى وابن حنتى جه عشان

نانا (بفرحة) طب مش تقول كده من الصبح انا متشكرة اوى
يااسطى سيد.... اتاريك يابابى عامل نفسك ناسى وانت
عامل لى مفاجأة ؛ ميرسى.. ميرسى اوى يابابى
الكل ينظر لبعضه فى حيرة واندهاش....

هاشم ميرسى على ايه يا حبيبتي....
نانا ع السواق الجديد اخيرا لاقيت حد...
(تنظر الى سيد).... قولت لى اسمه ايه....
سيد (بدهشة) هو مين ده يا هانم....
هاشم نانا إلهى

نانا لم تعطى فرصة لوالدها وتعطى مفاتيح السيارة لراضى ثم تبتعد عنهم
مغادرة البهو وهى تصعد الدرج الى اعلى
نانا المفاتيح آهى..... بعد ساعة حانزل تكون شيكيت ع
العربية وجهزتها.... ماشى
راضى فى يده المفاتيح وعلى وجهه علامات التعجب والحيرة.....
راضى هو فيه ايه ياسيد... ايه الحكاية ياباشا

مشهد (47) نهار - خارجى

امام عمارة اللواء هاشم

سيد وراضى يقفان امام احدى سيارتى اللواء هاشم.....
سيد أصل الست نانا اليومين دول بتستجوز نفسها عشان
حتستجوز...
حتستجوز مين بقى... ظابط بحرى من اللى شغالين عند
ابوها فى الهيئة
راضى (باستفهام) هيئة؟

سيد آآه هيئة مينا اسكندرية.. فعشان كده كل شوية وكل يوم
نازلة طالعة تستشترى فى جهازها وكات استطلبت من
ابوها ومنى نستشوفولها سواق خصوصى ليها عشان
وقتها كله بيستضيع فى الاستدوير على مكان ركنة
فعازة حد يستقد يستناها فى العربية لحد ماتستخلص
مشاويرها

راضى (بضيق) يووووه مانت عارف ياسيد ان موضوع
السوافة ده _____

سيد عارف... عارف مش لادد عليك ، بس دى لقمة عيش
وفرصة ليك أستوعاك تستضيعها.... دى اللى حتستخليك
تعرف تستفتح محل الصيانة بتاعك ده مرتبهم كبير غير
المكافآت والعدييات وحلويات كل موسم والذى منه
ماتستترفضش... وبعدين انت حتستكون سواق خصوصى
لناس لاف هايف مش على تاكسى وللا مشروع ولعياذ
بالله لكل من هب ودب

هنا ينزل هاشم ويقترب منهما...

هاشم ها ، فهمته ياسيد....

سيد كل حاجة ياباشا....

هاشم خلاص انت حتستلم الشغل من دلوقتى وبعد ماتخلص
مشاوير مع نانا بنتى ومامتها حتطلع لى فوق عشان
عايزك.. ياللا يا سيد

ثم يتجه الى سيارته كى يركب....

راضى (باستياء) أيوة ياباشا ... لكن _____

سيد يشير لراضى بيده كى يسكت ويرضى بهذا العرض المغرى وتلك
الوظيفة الفرصة واللقطة من وجهة نظر سيد

مشهد (48) مساء - داخلي

مكتب هاشم بالبيت

هاشم بص بقى ياراضى.. انا سألت عليك سيد وهو يشكر فيك

وفى اخلاقك جدا وانا كمان ليا نظرة فى اللى اداى فى
الغالب مش بتخيب..... انت بتشتغل ايه ياراضى.....

راضى يعنى ياباشا ايه بالقط رزقى من اهل الحنة والمنطقة
وباصلحهم اى جهاز بيبوظ ، كده زى ماحصل عند
سعادتك النهاردة

هاشم آآه.. يعنى مع نفسك مافيش شغل ثابت فى شركة او هيئة
او حتى عندك محل

راضى لاياباشا عندى المطرح.. المكان يعنى بس لسة مااشتغلش
ليه.....

راضى أهه ياباشا بقى سيادتك عارف الروتين عندنا والاشهار
والتراخيص وعيشة وكل ده مايبتمش غير بالرشاوى
أو زى مايسموها اكراميات

هاشم آآآه.... وانت معاكش تدفع....

راضى لاياباشا انا دفعت ودفعت لحد ماأشرفت وبرضك
ماخدناش حاجة واتخانقت فى الاخر مع الموظف...

يضحك هاشم.....

هاشم ولايهكم ياسيدى التراخيص وغيره وكل اللى انت عابزه
حيكون خالص وفى اقرب وقت ومن غير ماتروح
ولاتيجى كمان.... ايه رأيك بقى....

يفرح راضى.....

راضى بجد ياباشا... ربنا يخليك... انا برضك بأقول ان سعادتك
كلك خير

هاشم انت بتعرف تسوق ياراضى....

راضى ابوة من ايام ماكان سيد سواق على تاكسى كُت كل ليلة
نطلعوا نتمرنوا معاه شوية

هاشم على كده معاك رخصة.....

راضى الحقيقة لأ ياباشا... اصلى ماغنديش عربية... دى كات
كده شوية تفاريح مع سيد

هاشم بص ياراضى نانا بنتى مرتاحة لك وهى اليومين دول فى

زنقة وداخله على جواز فمحتاجة لسواق مدة ال4 شهور

الى جايين وبعدها ياتكمل سواق عندها لو تحب ياتشوف

مصلحتك انت حر.... وبكرة او بعده بالكثير رخصتك

حتجيك وانت قاعد فى بيتك معزز مكرم حاطط رجل

على رجل من غير ماتروح المرور وتبهدل هناك

ويقرفوك عبال ماتطلعها، ومرتبك حيبقى 650 ج فى

الشهر عشان انا عارف مشاوير نانا كتيرة اد ايه.....

راضى يقف مبهورا مما سمعه لا يستطيع الرد

مشهد (49) ليل - خارجى

بورصة حلموس

راضى وسيد وحلموس يجلسون معا بالقهوة.....

سيد واللة واستفتحتك ابواب السعد يالة

راضى سعد ايه يا اهل انت....

حلموس ايه ياعم راضى إحمد ربنا انه بعثلك راجل واصل زى ده
حيفتح لك المحل ويطلع لك رخصة سواقة وفوق كده
وكده مرتب ماكُتَشَّ تحلم بيه يوقفلك المحل على رجله
فى البداية

راضى انا حامذه ومش متبطر يامعلم ، بس انتوا مش فاهمين....
حلموس وسيد طب فهمنا.....

 طب استفهمنا....

راضى انا زعلان على حال البلد واللى زى من الناس ،
يعنى لو كُتَشَّ قابلت اللوا ده كان زمانى عايش فى نفس
الدوامه اللى كُت فيها.... صحيح الراجل ده عمل فى كذا
جميل النهاردة لكن مش لله طبعاً ده عشان مصلحته
ومصلحة بته..

حلموس يعنى ايه؟

راضى يعنى البلد ماشية بالكوسة والوسايط... ولو كُتَشَّ قابله
لاعمري كُت شفت رخصة سواقة ولا عمر المحل كان
حيثفتح.... ذنب غيرى اللى حيموت على شغل
وما عندووش واسطة ايه....

سيد هو كده ياصاحبى ربك اللى بيستقسم الارزاق ومش كل

الناس زى بعضيتها فيه اللى يستاهل فيستدليه زيك وفيه
المفتري فيبيستتقم منه حتى ولو استغنى شوية لازماً فى
الآخر يستأخذ جزاؤه

حلموس ماتر علش ياراضى هى بلدنا كده ناس كبيرة غفلانة وناس
صغيرة متداسة وغلبانة عايزين معجزة تحصل عشان
الميزان يتساوى.....

وبينما هم جالسون هكذا يرون رجلان كل منهما يحمل شوالان على
ظهريهما ويدخلان به منزل فتحى.....

راضى يقف ويحدق النظر ناحيتهما....

سيد فيه ايه يراضى ؟

راضى اصلى اتخايلت باتنين داخلين بيت فتحى ومعاهم شولة....

حلموس آاه دول كل ليلة يججوا فى المعاد ده ومعاهم الشولة دى

ويدخلوا بيت فتحى ويخرجوا بيها فاضية

راضى والشولة دى فيها ايه ؟

سيد لاتستكون جثث وريا وسكينة استرجعوا من ثانى....

حلموس جثث ايه يالة وريا وسكينة ايه... ياشيخ تف من بك

سيد يمزح وكأنه يبصق مثلما طلب منه حلموس.....

راضى (بجدية) انت بتقول كل يوم....

حلموس آاه....

راضى حاجة غريبة... ومحدث يعرف اللى اجرؤا شقة فتحى

دول بيعملوا فيها ايه

سيد (مازحا) شكلهم استعملوها مقلب زبالة

سيد يضحك....

راضى (بنفس الجدية) انت بتقول فيها مش بعيد... شكل اللى

شايلين الشولة شبه الزبالين... ده شكلهم الزبالة

نفسها.....

مشهد (50) ليل - داخلي

صالح شفت راضى

راضى يجلس مع وهج.....

وهج (بانزعاج) معقول كل ده يحصل النهاردة وانا ماكونش
معاك

راضى ومعايا حتعملى ايه....

وهج انت ناسى رسالتى.... لازم اخلصها واسلمها فى اقرب
وقت

راضى ماقولتليش اخبار الرخص والتراخيص والموظفين عندكوا
ايه....

وهج ابدأ بالنسبة للتراخيص والتسجيل فى السجلات او اى
معاملات بنكية او حكومية بتبقى عن طريق الشريحة
الالكترونية الخاصة بكل فرد يدخلها فى جهازه المتصل
بشبكة الاتصالات الدولية وعن طريقها بيتم معرفة
البيانات اللى عليها ويتعمل فحص عن صاحبها فى ثوانى
وبعدها يدوك الصلاحيات اللى انت محتاجها لو كانت
شريحتك سليمة وبالتالي مافيش رشاوى ده غير ان كل
شبكة الاتصالات دى متراقبة كويس بالموجات الفوق
صوتية وضوئية عشان لوحصل تلاعب من عميل للشبكة
يتفصل فوراً ويتسجن

راضى طب والرخص.....

وهج ممنوع منعاً باتاً حد ياخذ رخصة سواقة بسهولة ومن غير
اختبارات مهما كانت واسطته مع ان مافيش حاجة اسمها
واسطة.... ولأن دى ارواح ناس فلازم يخرج معاك

مسئول من جهاز تأمين البلاد ويقعد جنبك فى عربيتك
ويراقب سواقتك واحترامك للنظام والمرور ويدّى اشارات
موجية لرئيسه فى الجهاز اول باول من غير رشوة لأن
الطرق كلها مترقبة برضه بنفس الموجات وساعتها يقرر
اذا كنت تستحق رخصة وللا لا وتتسجل لك على اسورة
البيانات واى مخالفة للمرور حبس وغرامة بس فى سجن
خاص بمخالفين قواعد المرور وبرضه من غير وسايط
سواء كان سواق او وزير

راضى ماينفعش تاخدينى معاكى لدنياك ياوهج
لأسف... مكتبة الزمن بعد ماتخلص المدة المحددة
للباحث جواها لازم يرجع لزمته تانى ولوحده عشان
مايتوش بين العصور مدى الحياة يعنى اللى فى 2010
لازم يفضل فيها واللى فى 2100 لازم يرجعها
هنا تخرج رانيا مذهولة لما سمعت وعيناها ملوعتان بالدموع.....

رانيا ايه اللى سمعته ده.....!!!!
وهج وراضى يقفان بارتياب....

راضى اللى سمعته ده أكنك ماسمعوش ؛ واوعى تفتحى بقلك
بكلمة ولو حتى لنفسك فى المراية

وهج استنى يراضى انا حافهما كل حاجة
رانيا (بذهول) تفهمينى ايه... ومخى حيصق ايه وللا ايه.....

مين فينا الحقيقة ومين الخيال.... انهو حياة هى اللى
ماشية صح وحقيقية 2010 وللا 2100 مين اللى صح
ومين اللى غلط.....!!!!

وهج تقترب منها وتربت على كتفها مهدئة لها.....

راضى وطئ صوتك حنودينا فى داهية
وهج اهدى وتعالى ندخلوا اوضتك وانا حنفهمك كل حاجة ،
تعالى .. تعالى ..
معلش ياراضى سيبنا لوحدنا شوية....

مشهد (51) نهار - داخلى

مكتب الضابط وليد

وليد يجلس الى مكتبه يقرأ بعض الاوراق....
يدخل عليه ممدوح.....
ممدوح صباح الخير....
وليد صباح النور... اقعد ياممدوح....
ممدوح يجلس.....
ممدوح خير يا وليد.....
وليد يرفع رأسه وهو فى حيرة....
وليد التقرير اللى اداى بيقول ان الدكتور وهج دى ماله اش
اي بيانات فى اى كلية فى الجامعة ، ده غير ان السفارة
ماسمعتش عنها خالص
ممدوح (باستغراب) ازاي... شفت فى سجلات المسافرين
والمغادرين الشهر اللى فات
وليد لأ.....
ممدوح خلاص سيب الموضوع ده عليا وانا حنشوفه لك

مشهد (52) نهار - داخلي

مكتب هاشم بالبيت

هاشم يجلس الى مكتبه وراضى يقف امامه..... هاشم يخرج بعض الاوراق ويمدها بيده الى راضى.....

هاشم آدى ياسيدى كل اوراق التراخيص بتاعة محلك.....

ثم يخرج بطاقة صغيرة يعطيها لراضى.... وآدى رخصة

السواقة باسمك وصورتك اللي اديتهاالى عليها كمان

راضى (بفرحة) انا متشكر لسيادتك اوى ياباشا انا مش عارف

من غير سيادتك كُت عملت ايه....

هاشم وهو يقف ثم يلف حول مكتبه مقتربا من راضى.....

هاشم قول الحمد لله انك عرفتتى فى الوقت المناسب.... محلك

تقدر تفتحه من بكرة لو حبيت لكن حاسأذذك تأجله الـ4

شهور دول لحد مانتجوز نانا عشان تبقى فاضى

لمشاويرها وبعد كده لك مطلق الحرية فى الاختيار

راضى خلاص ياباشا وانا تحت امرك..... أهه ع الاقل نردوا

جمال سعادتك علينا.... عن إذك ياباشا....

يبتسم هاشم من فرحة راضى بما فعله من اجله.....

مشهد (53) نهار - داخلي

حجرة نوم رانيا

رانيا تجلس على سريرها.... وهج تطرق الباب ثم تدخل.....

وهج صباح الخير يارنرون...

رانيا (بهدهو) صباح النور.....

نتقدم وهج نحو رانيا ثم تجلس على السرير امامها.....

وهج ايه الاخبار.... لسة مذهولة من اللي سمعته امبارح....

رانيا لا ابدأ خلاص ، وماتخافيش سرك محفوظ ومافيش جنس

مخلوق جيعرفه

وهج انا عارفة ومتأكدة... اهل بيت راضى كلهم اصل وكرم

واخلاق

رانيا (تبتسم) ماترعليش منى اذا كُت اتخلقت عليكى شوية

وهج ابدأ احنا اخوات.....

رانيا اخوات ايه بقى.... انا كده ابقى جدتك بحكم الزمن

(تضحك الانثتان).....

وهج نشتم رائحة قوية تملأ الحجرة.....

وهج ايه الريحه دى.... ريحة صابون مش كده!

رانيا ايوة... الريحه دى بقالها كام يوم كده

وهج بس دى فى أوضتك انتى بس

رانيا ماهى الريحه طالعة من الشباك هنا....

وهج (باشمنزاز) بس ريحته غريبة !!!

رانيا تحسى صابون مغلى زى بتاع زمان

وهج تمط شفتها السفلى للخارج دليلا على عدم وجود اجابة لديها....

مشهد (54) نهار - داخلي

مكتب مقبل

مقبل يجلس الى مكتبه وامامه يقفان كل من باهر وعطا.....

مقبل

أخبار أبحاثكوا ايه....

عطا

احنا اتقفنا نشتركوا فى بحث واحد وحنقدموه قريب

لحضرتك

مقبل

وانت يا باهر.... مابتكلمش ليه....

باهر

ابدا يا بروفييسور زى ماقال عطا لحضرتك

مقبل

طب عظيم.. ادونى معاد نهائى تسلمونى فيه بحثكوا

باهر وعطا ينظران لبعضهما فى حيرة لايعرفا بماذا يردان.....

مقبل

محدث بيرد يعنى...

باهر

ايوة يا بروفييسور مقبل....

عطا

الحقيقة احنا لسة فى بداية البحث واول مانقربوا من نهايته

حنبلخوك فورا بالتاكيد

مقبل ينظر لهما بخبث.....

مقبل

كده... خلاص بس عايز تقرير اول بأول عن نتايج

البحث وليكن مرتين فى الاسبوع

باهر ينظر ثانبة لعطا ولكن عطا لم ينظر اليه ويرد مباشرة.....

عطا

طبعا... طبعا يا بروفييسور..... نستأذنوا احنا بقى.....

مشهد (55) نهار - خارجى

محل راضى

راضى يقف امام محله الموجود بمدخل الحارة الخارجى حيث معه بعض العمال بعد ان يفتح باب المحل فيدخل العمال الى الداخل ، اما راضى يقف على باب المحل يلقي لهم الاوامر.....

راضى ياللا يا جماعة شدوا حيلكوا معانا كده وربنا يقويكوا ... عايز المحل يكون جاهز فى خلال شهرين بالكثير مش عايزين نتأخروا عن كده

احد العمال ايوه يا استاذ بس المحل عايز شغل كثير

راضى معلى يا اسطى كلك همة كده وهو يخلص بسرعة

العامل طب تحب ندهنوك لون واحد وللا نضربوك لونين....

راضى لا والنبي ابعد عن الضرب احنا عايزين كل حاجة بالهداوة... وادينى اللون مفرحة كده

العامل يعنى لون وللا اتنين.....

راضى يفكر قليلا.....

راضى ممكن لونين ، يعنى مثلا اصفر فى ازرق - اصفر فى

بنى - وللا اقولك اصفر فى اخضر... بص المهم يكون

فيه اصفر وخلص....

العامل شكلك بتحب الاصفر....

راضى اوى....

هنا يتركه العامل ويدخل الى المحل لمتابعة عمله.....

راضى يخرج الموبايل ويطلب رقم فتحى....

راضى ألو... فتحنى حببى ، ازىك يالة ، عندى لىك مفاجأة مش
 حصدقها المحل فاتحه وباوضبه.....
 ابوة والله انا حنضحك عليك ليه.....
 كله كله التراخيص والتسجيل والاوراق كلها خالصة
 ومعايا.....
 حابقى احكى لك بعدين؛ المهم انت تجينى حالا عايز
 اشوف همتك معايا عايزين نفتحوه قريب يالة.....
 طيب وانا مستنيك ؛ مع السلامة...

مشهد (56) غروب - خارجى

شوارع واحياء مختلفت بالاسكندريه

وهج مع راضى يتقلان من شارع لآخر ومن حى لآخر وهى
 تراقب الاحياء و الشوارع والناس وكل شئ من حولها وهى تضغط على
 زر بالاسورة المعدنية التى بيدها بين الحين والآخر.....
 فهى تارة بشارع ابو قير.....
 وتارة بالاحياء الشعبية كالحضرة وكرموز والعصافرة
 وباكوس.....
 وتارة بالاحياء الراقية كرشدى وسموحة ولوران وجليم وكفر
 عبده.....
 وتارة تتمشى وتراقب الترام.....
 وتارة بمناطق الاسواق والمحلات والمولات كمحطة الرمل
 والمنشية والابراهيمية ثم جريرين بلازا وسان ستيفانو وكارفور
 (سيتى سنتر).

مشهد (57) ليل - خارجى

بكافيتيريا ملحد مثلجات على البحر

اخيرا يستقرا بمحل به كافيتيريا مظلة على البحر بمنطقة بحرى
يتناولان الايس كريم وهما يتضحكان.....

وهج معلىش ياراضى اكيد تعبتك معايا النهاردة بقالنا اكتر
من 6 ساعات بنلفوا البلد

راضى ولايهكم بالعكس انا مبسوط جدا.. النهاردة اليوم كان
جميل... ده انا شفت معاكى حاجات فى البلد اول مرة
نشوفها

وهج عوما انا اعتبر جمعت كل اللي عايزاه للرسالة
بتاعتى... والنهاردة انا سجلت (وهج تشير الى الاسورة
التي بيدها).... حاجات كتير ع الذاكرة الالكترونية هنا

وبينما هما كذلك يفاجئا بغلام صغير ومعه رجل يرتديان ثيابا قذرة جدا
وارجلهما ويديهما ايضا قذرة جدا وكل منهما يمسك بشوال كبير جدا حيث
ان كل منهما يتولى البحث عن شئ ما بصندوقا من صناديق القمامة
باهتمام ويفرز ما بها وكأنهما يفرزان بضاعة ما او بعض الخضروات او
الفاكهة الطازجة عن المعطوبة، وهنا يضعوا الاوراق والكرتون بشوال اما
الزجاجات والمواد البلاستيكية بأخر بينما يخرج الغلام كيس اسود كبير
يبدو انه مملوء بشئ ما ثم يضع به بقايا الخبز الملقى بالقمامة.....
راضى ووهج يذهلان ويصعقان من ذلك الفعل المقزز.....

وهج ايه ده بيعملوا ايه دول.... انا كنت فاكرهم غلابة
وبيدوروا على اكل وكنت لسة حاقوم اديهم حاجة
تساعدهم... لكن واضح ان دى شغلتهم

راضى يقوم من مكانه متجها نحوهما اما وهج فتنادى عليه كى يعود ولكنه
لايلبى نداءها.....

وهج راضى.. راضى.. رايح فين تعالى.... مالناش دعوة
بيهم.....

راضى يقترب منهما وينظر اليهما محدقا فيما يفعلوه وهو يسد
انفه باصبعيه من الرائحة الكريهة مع ارتسام القرف والاشمزاز
على وجهه

راضى انتوا بتعملوا ايه...!!!!

الرجل بنقلبوا عيشنا....

راضى بنقلبوه فى صندوق الزبالة... انتوا مش شامئين الريحه....

الغلام اتعودنا عليها ياعم الحاج... فيه حاجة

راضى انا برضك اللى فيه حاجة... ممكن اعرف انتوا مدلوقين

جوة الزبالة بتتقوا ايه وأكنكوا بنقلبوا فى شوية طماطم....

ايه القرف بتاعكوا ده

الرجل وانت مالك ياأخيئا ماتسيينا فى حالنا وابعد عنا بقرفتك

دى... احنا مبسوطين بالريحة رُق كعبك بقى

الاولاد العاملين بمحل الاليس كريم يقتربون من راضى كى يجنبوه بعيدا
عنهما.....

راضى (بغضب) استنوا بس لما نشوفوا مقلب الزبالة ده ماله بيرد

يقول ايه

الرجل احنا مقلب زبالة ياخسرى.... انت مالك احنا بنعملوا

ايه....,ابعدوه عنا ده بدل مانشرحوه ونكوموه فى الزبالة

ثم يخرج من جيبه مشرطا صغيرا كى يهدد راضى به فيغتاظ منه

ويُستفز اكثر ثم يمسك برقبة زجاجة ماء بلاستيكية شبه فارغة

من على احدى الترابيزات ويحاول كسرها كما يحدث بالافلام بالملامى
الليلية والبارات.....

راضى طب قرب كده وانا نقطعك برقية الازازة دى
الكل يضحك حيث ان راضى قد اندمج فى انفعاله ولم ينتبه بأن الزجاجة
التي بيده بلاستيكية.....

وهج وهج تقوم وتجنبيه بشدة.....
راضى ياللا بينا من هنا... سيبك منهم ... انت عايز
منهم ايه...

يهنئه من حوله ويبعدوه عن الرجل والغلام حيث هما ايضا يرحلان اما
راضى يعاود الجلوس مع وهج فى مكانه ومازال الزجاجة بيده.....

وهج اهدا وسيب الازازة احسن تعور حد بيها
راضى بفيق وينظر للزجاجة التي بيده فيجدها بلاستيكية.....
راضى ايه ده..... دى بلاستيك!!!

ثم يضحك وتضحك وهج والنادل الواقف بجانبهما.....
وهج او مال كنت فاكرها ازاز بجد

راضى معلش اصلى اتحمقت شوية وخدتنى الجلالة وحببت اعمل
زى ما بيعملوا فى الافلام وابقى واد شبحطجى

النادل حصل خير يافندم... تحب نجيبوا لحضرتك قطن
وميكروكروم وشاش عشان الجروح اللي سببتها الازازة

راضى انت حتتريق ياخويا.....
النادل آسف يافندم باهزر معاك...

راضى يمسكه من ذراعه ثم يقربه اليه ويهمس.....
راضى الا قول لى... ماتعرفش الاتنين دول بيعملوا ايه بالزباله

دى.....

النادل دول كل يوم ييجوا فى المعاد ده وساعات وخرى عن كده
ويفتشوا فيها ويقليبوها....

راضى وليه بيعملوا كده....

النادل يخفض من صوته.....

النادل ده شئ بقى عادى دلوقتى وماشى فى البلد وباقت شغلانة
عيال سريحة كتير عشان بيبيعوها وبيكسبوا منها
حلو اوى

راضى (بتعجب) بيبيعوها!!! يبيعوا ايه الزبالة !! ولمين ١١٩٢

النادل يعنى الحاجات البلاستيك ياإما للمصانع عشان يعيدوا
تصنيعها وتعبيتها تانى ياإما لبتوع العصير والكشرى
وخلافه لوكانت سليمة ده بعد ماينضفوها ويروقوها طبعاً
والمحلات ماتصدق تلاقى الحاجة السهلة الرخيصة

وهج تشعر بانقلاب فى معدتها...

اما بقى الورق والكراريس الكرتون والذى منه فدول
يروحو لبتوع الفول والطعمية عشان يلفوا فيها للزباين

راضى ازاي وهى طالعة من الزبالة معفنة كده

النادل ماقلت لك ليهم طريقتهم فى تنضيف الحاجة بقى

راضى ده ايه القرف ده.... قرفتني من الازاييز والكوبايات
والطعمية

النادل لأ ولسة العيش المرمى فى الزبالة ده كله بيودوه برضه

لبتوع الطعمية عشان يحطوه لعجينة الفلافل

راضى بيتسم ابتسامة عريضة تنم عن قمة فرحته بالقرف المنتشر
من حولهم...

راضى لا ياراجل برضك... بتوع الطعمية دول مرزقين اوى
وهج وكأنها ستتقيأ.....

وهج لما اقوم بسرعة اروح اجيب حاجة مطهرة للمعدة.....
(تقف وهج).... وهارينا كل يوم فول وطعمية فطار
وعشا..... ياع

ثم تأخذ بعض المناديل كى تمسح بهم لسانها من كثرة النقرز التى تسعر
به.....

اوعى تكون المناديل دى كمان من الزبالة.....

مشهد (58) نهار - خارجى

محطة ترام كليوباترا حمامات

راضى يقف منتظرا فتحى عند محطة الترام حتى يأتى فتحى
مهرولا.....

فتحى ايه ياعم ماجينش ليه مالىيت قريب أهه خطوتين من هنا
راضى لا معلىش مرة ثانية اصلى ورايا مشاوير..... المهم

فتحى عقد تأجير شقتك مش مكتوب فيها الشقة حتتأجر لإيه
لأ... بس قالوا لى سكن وممكن يستخدموا منها اوضة
تبقى مخزن لحاجتهم

راضى أيوة حاجتهم دى اللى هى ايه بقى؟؟؟

فتحى فيه ايه ياراضى انت قلقتنى كده....

راضى ياراجل.. وكل اللى حكيتهم لك ده مايفلقكش واللى داخلين
بشولة محملة وطالعين بيها فاضية، وشكلهم ازبل من
الزبالة والروايح الغريبة اللى طالعة علينا كل ليلة.....

افرض فيه مصيبة بيعملوها مش حضرتك اللى حتمسك
فيها عشان انت صاحبها وتحقيق وسين وجيم وعلاقته
ايه بيهم

انت تحخوفنى ليه مايمكن

فتحى

مافيش يمكن انا حبيت اعرفك اللى بيحصل فى شقتك
وانت حر وع العموم ياسيدى انا حاراقبهم كام يوم
كمان وابقى اقولك آخر الاخبار

طب تعالى اتفضل عندنا شوية والله

فتحى

يبدأ فى الابتعاد عن فتحى ومقتربا من التزام التى وقفت للتو امامهما
بالمحطة

معلش يافتحى ... مستنيك فى المحل لسة فيه شغل كثير

راضى

راضى يركب الترام

فتحى (بلوح) ماشى... حكنونا عندك ع المغرب كده....

مع السلامة...

راضى يقف على باب الترام وقد بدأت تتحرك سائرة فى طريقها....

مشهد (59) نهار - خارجى

سيارة نانا بشارع ابو قير المرحم

راضى يقود سيارة نانا ولكن اللواء هاشم هو من معه

بالسيارة

معلش يارضى حندوخوك النهاردة بكام مشوار ليا عشان

هاشم

سيد خليته يودى العربية الميكانيكى يشوفها

ياخير باباشا سيادتك تؤمر

راضى

هاشم انت طيب واخلاق اوى ياراضى.... نانا بتشكر فيك وفى
سواقتك بتقول انك بتخاف ع العربية جدا....

راضى طبعاً ياباشا ماهى مش عربيتى دى امانة بين ايديا
هاشم اللي زيك قليل النهاردة... ماعادش حد بيعمل زيك يحترم
الناس والمرور انك تمشى بالهدوء والعقل ده كله

راضى والله مش ده السبب الاساسى ياباشا ده عشان كمان البلد
المبهذلة المكسرة كل يوم والتانى فى كل حنة ، خربوا
للناس عربياتها منهم لله..... البلد كات جميلة ونضيفة
بهذلوها البُعدة

هاشم فعلا انا كنت حاجيب لنانا عربية جديدة من كام شهر ،
رفضت عشان ماتتبهذلش وتتحرب بسبب الشوارع عموما
دى اكيد خطة جديدة لنضافة وتنظيم البلد

راضى ازاي ياباشا بقى ده كلام يتعقل.... البلد كلها تتكسر
وتتحفر السنة اللي فاتت واللى قبلها والسنة دى كمان نفس
الرواية هى هى بتتعاد كل سنة والنبي هى لحقت

هاشم ايه بقى رزق وجايلهم يرفضوه.... دى الحاجة الوحيدة
اللى يقدرُوا يسلكولهم منها قرشين

راضى (بأسى) كده عيني عينك... سرقة علنى.. طب بدل
ماتضيع الفلوس فى الشوارع يعملوا بيها حاجات تانية
اهم.....

هاشم زى ايه بقى ياسى راضى.....
راضى يعنى يدخلوا للمناطق العشوائية ماية وكهربا وصرف ،
يصلحوا ويرصفوا الشوارع الجوانية المكسرة ، يجددوا
المستشفيات والمدارس والهيئات الحكومية يحطوا اجهزة

تراقب الموظفين الى مش قايمين بشغلهم وفالحين يمدوا ايديهم للغلبة ينهبوا منهم اللي يقدروا عليه

(باستهزاء) واللى بتقول عليه ده بقى حيطلعوا منه فلوس ليهم ازاي وللا حيستفيدوا منه بايه خليك فى حالك ياراضى ومانقولش كلام كبير عليك انت مش قده

هاشم

(بتحسر) كده.. يعنى نخلونا ساكتين وواقفين نتفرجوا ؛ ماهى سلبيتنا دى اللي مخلياهم يسرقونا وينهبونا براحتهم حتى قانون المرور الجديد اللي حاطه فايق ورايق اوى وشكله مش من البلد اساسا مايفكروش غير ازاي يطلعوا فلوس بأى طريقة من جيوب الناس.... كل كام يوم يقفولهم فى زقراية ويصطادولهم شوية عربيات وادفعوا ودول طبعا اللي حظهم مهيب فى اليوم ده

راضى

طب يعملوا ايه.... بذمتك مش فيه ناس تستحق تتسجن فعلا

هاشم

انا معاك سعادتك فى دى... بس لازم يكون فيه دوريات واقفة 24 ساعة فى اماكن محددة تعاقب الغلطان على حق وتخالفه خصوصا سواقين التاكسيات والمشاريع اللي آزحين فى البلد وآخدينها بالدرع وساعة مايتخالف يعيط ويولول واكنه غلبان ماهو لو واحد فيهم اتسك على قفاه صح محدش حيقدر يغلط تانى لكن كل هم بتوع المرور الفلوس وبس

راضى

هى بلدنا كده ياراضى..... يعنى مثلا لو باقيت رئيس مجلس ادارة شركة مهمة عايز تفهمنى انك حتمشيتها بالحق وبمايرضى الله ومش حتحاول تطلعك بقرشين كويسين قبل ماتسيبها

هاشم

راضى أعوذ بالله ياباشا....

هاشم يضحك بقهقهة....

هاشم أهه كل واحد شبهك يقول كده ولما يدوق طعم القعدة ع الكرسى ينسى ضميره وربنا وياخد فلوس على قد مايقدر قبل مايسيب مكانه وحجته ساعتها بتبقى انه تعب كتير ومافيش تقدير من الدولة يبقى ده بقى حقه هو وعياله عشان يعيشوا لآخر يوم مستورين وكل مسئول على قد مكانته بتكون هبرته.....

خليك على قدك عشان ماتتعبش ؛ بلدنا كده ناس فوق اوى وناس تحت اوى ما فيش حتى وسط فأرضى ياراضى وعيش على قدك عشان تعرف تعيش راضى ينظر اليه بغيظ مستتر ويقول فى نفسه.....
صوت راضى طبعا لازم تقول كده مانت من اللى فوق وواكلها والعة وعايذ اللى زينا يفضل تحت عشان نخدموكوا....

مشهد (60) نهار - خارجى

سوق الميذان

ام راضى بسوق الميذان بالمنشية تبتاع بعض الخضراوات والاسماك صباحا... بعد ان تنتهى من شراء السمك وتدفع ثمنه تضع كيس السمك بحقيبة السوق البلاستيكية ثم تحملها من فوق الارض وبينما هى تشكر البائع وتستدير كى تغادر.

أم راضى متشكرين ياخويا... سلامٌ عليكموا
هنا أحدى رجليها تنزلق من فوق الرصيف باحدى الحفر الموجودة به
والناتجة عن عمليات الحفر والتخطيط المتكررة دون اعادة اصلاحها فى
الحين او التنبيه لها للمارة والسيارات فبالنالى تنم عنها الحوادث
المختلفة.....

تقع ام راضى على الارض وهى تصرخ مما حدث لها فيلتف المارة
حولها كى يساعدوها ان تقف مرة اخرى ولكنها تصرخ اكثر من شدة الالم
فقد يبدو انه قد حدث كسر فى قدمها.....

احدهم حد يا جماعة يعمل خير ويوقف تاكسى نودوها ع
المستشفى.....

مشهد (61) نهار - داخلى

مستشفى الجامعة

راضى يدخل المستشفى مهرولا ومعه وهج واخته رانيا وهو يسأل
كل من يقابله عن امه اين هى.....

راضى فيه ست كبيرة جات من شوية وقعت على رجليها فى
الميدان...

تمرجى 1 والله معرفش اسأل الاخت....

راضى يهرول ناحيتها ومن خلفه الاثنان.....

راضى فيه ست كبيرة جات شايلينها من الميدان وقعت
على رجليها

ممرضة 1 اسأل هناك....

ثم ترحل.....

راضى (محتار) هناك فين؟
يرى تمرجيا آخر آتيا من أمامه ويبدو عليه التوهة والغثيان فيقترب منه
ولكن من دون الاثنتان.....

راضى والنبي يأخ نسألوا فين عن حالة لسة جاية دلوقتى
تمرجى 2 (وكأنه فى دنيا اخرى) والله! جات دلوقتى....
طب هي فين ؟

راضى انت متأكد انك شغال فى المستشفى دى
تمرجى 2 هي دى مستشفى!!؟

راضى يخربيتك... انت بتعمل دماغ على قفا المستشفى وسايينك
تمرجى 2 شششش... انت حتفضحنى سيبنى فى حالى يا عم الله
يسهل لك.....

هنا رانيا تتادى على راضى من بعيد ومعها وهج.....
رائيا ياراضى ... تعالى... لاقينا ماما... تعالى....
يجرى راضى نحو رانيا.....

مشهد (62) نهار - داخلى

عنبر مرضى بالمستشفى

وبداخل عنبر ملئ بالأسيرة والمرضى من مختلف الانواع
والاعمار وأقربائهم تكون أم راضى لمقاء على سرير وبجانبها تجلس
امراة حامل ويبدو عليها انها على وشك الولادة حيث انها تصرخ من شدة
الالم راضى يدخل فيرى ذلك المنظر المروع ورائيا تقف بجانب
والدتها حائرة لاتعرف ماذا تفعل أما وهج فتتظر لجميع من بالعنبر متأثرة
بحزن وأسى شديدين على هذا الحال المتدهور.....

راضى يجرى نحو أمه مستفسرا....

راضى أمى.. أمى.. سلامتك ألف سلامة إيه اللي حصل لك
رائيا فيه واحد كلمنى ع البيت وقال لى اللي حصل فاتصلت
براضى ع الموبايل علطول
أم راضى ابوة ماهو ده الراجل اللي جابنى هنا كتر خير
بعد ما وقعت

راضى ووقعتى ازاي...

الحامل تصرخ من الألم.....

وأم راضى يبدو عليها الأعياء الشديد....

أم راضى ابدا يا ابنى زى مانت عارف اللرصفة مكسرة وشايلينها ،
فأنا نازلة من ع الرصيف وينسند رجلى على طوية
كبيرة اتحدرت بيا وقعت

راضى منهم لله اللي ساببين الشوارع كده مافيش ضمير....

بيهدلوا الدنيا ويسيبوها ويمشوا

رائيا إله وانت جاهى يقعوا فى الحفر اللي عمليتها مايقوموا
منها تانى يارب

وهج معقول الحاجة مابتخلصش فى وقتها بسرعة عشان سلامة
الناس

رائيا وقتها إيه.... دى اجيال بتعدى عبال مايفتكروا يصلحوا
الحاجة اللي نيلوها

راضى ياريت على كده وبس ولما بيصلحوا بنقولوا ياريتهم
ماصلحوا لأنهم بدل ما بيكلوها بيعموها.....

أم راضى تتألم بوجهها دون صوت....

راضى او مال فين الدكتور اللي هنا.....

المرأة الحامل مستمرة فى الصراخ.....

راضى حد يشوف اللى حتولد دى..... (ينظر للمرأة الحامل)

..... فين اهلك ياستى.....

الحامل (وهى تصرخ) بيدوروا ع الدكتور آآآه

راضى كلهم بيدوروا عليه.....

هنا تمر ممرضة بسرعة البرق من جانبهم....

راضى انتى ياأختى.... يانيرس....

تلتفتت اليه بضيق...

الممرضة فيه ايه ياأستاذ....

راضى يعنى أمى بقالها عندكوا هنا اكتر من ساعتين وجاية واقعة

على رجلها ومش عارفين عندها ايه

الممرضة طب وانا مالى... ماتشوف دكتور... (ثم تمضى).....

راضى (بتعجب) وانتى مالك!!! اومال مين اللى ماله هنا... دى

مصابة ايه دى

يقف راضى على باب العنبر وهو يصيح عاليًا.....

راضى مافيش دكتور فى أم المستشفى دى وللا ايه.... ايه البرود

اللى انتوا فيه ده

يأتى التمرجى التائه عن الوعي....

التمرجى شششش... انت برضك..... ياأستاذ صوتك.. صوتك...

حتصحى الناس

راضى اصحى مين يامخبول انت... روح إصحى انت الاول....

باللى هنا.... يادكاترة... ياللى بيقولوا عليكوا ملايكة

الرحمة....

(يهمس) الله يخر بيوتكوا.....

يأتى احد دكاترة الامتياز وينظر الى راضى بكل هدوء وابتسامة....

الطبيب ابوة ياأستاذ افندم...

راضى ياسلام.... ايه الروقان اللي سيادتك فيه ده.... كل الناس هنا بتموت وانت لسة بتسأل فيه ايه

الطبيب عادى... ده عادى واتعودنا عليه خلاص..... كل يوم نفس المناظر والاشكال

راضى وهو انا باقولك تعالى اتفرج على فيلم قديم.... انا باقولك تعالى قوم بواجبك

وهج اما انتوا ماعندكوش دم صحيح ، يعنى لو حد من دول من اهلك حتبقى واقف بارد كده

الطبيب لالا لالا ياآنسة انا ماسمحللكيش... انا كنت جاى اساعد بس يظهر انكوا ماتستاهلوش....

طبيب الامتياز يغادر المكان...

راضى عاجبك كده.....

رانيا (تصرخ) ماما بيغمى عليها

وهج تجرى نحوها كى تساعد رانيا فى اسنادها.....

راضى ياناس حرام عليكوا امى تعبانة اوى

راضى يجد ممرضة تمر من امام باب العنبر فيجذبها من ذراعها بلهفة الى داخل العنبر.....

راضى والنبى ياستى... ياهانم.... يارب اشوفك دكتورة

الممرضة ايه ده كله ياأستاذ فيه ايه....؟

راضى أمى بتموت منى.... بصى اعتبريها امك وهاتى لنا حد يشوفها.... خدى....

يخرج بعض النقود من جيبه ويضعهم بجيب البالطو الذى ترتديه....
تقترب الممرضة من والدته مهتمة ثم تنظر اليها.....

الممرضة مش دى الست الحاجة اللى وقعت على رجلها
رائيا ايوة ياختى....

الممرضة طب ماالدكتور شافها وقال ان رجلها مكسورة
وماتحركش لحد ماييجى يجبسها

وهج والكلام ده من امتى....

الممرضة مش عارفة يمكن من ساعة كده

وهج ياسلام... ده لايمكن يكون دكتور... وكل ده حضرته
مختفى فين وبيعمل ايه

الممرضة اصل فيه حالات زيها جات قبلها فبالدور استنوا شوية

رائيا هو ده اللى ربنا قدرك عليه يا حبيبتي... هو مافيش
غيره هنا؟

الممرضة تنتظر لها من فوقها لتحتها...

راضى (بصلح) معلىش دى بنتها وخايفة عليها اعزريها، لو كُتى

مكانها كُتى حتعملى اكثر من كده .. وللا مش حتعملى؟!

الممرضة ايه ياأستاذ ، انت محسنى اننا مهملين فى شغلنا....

مع اننا هالكين روحنا عشان العيانيين طول اليوم

راضى لأ ربنا يقويكوا فعلا... احنا ماعدناش رافة

هنا تأتى ممرضة زميلة لها وهى تضحك بشدة...

ممرضة 2 الحقى .. الحقى.. البت نوال عاطت الراجل حقنة الست

بتاعة النزيف غلط (مازال تكرر)

الممرضة (تضحك) يخرّب عقلها.... وهى فين دلوقتى

ممرضة 2 طلعت تستخبي فوق (تضحكان).....

يبدو على وهج القرف والغضب والانزعاج.....

وهج أد كده ضمائر كوا مينة... مافيش قلب... مافيش احساس

ولا رحمة.... حياة الناس وامراضهم باقت عبارة عن

نكت بينكوا

راضى يجذبها مهدئا....

راضى وهج... دكتور وهج الله يخليكى اهدى.... احنا عايزين

نخلصوا

المرضتان تتظن لهما وكأنها مجنونة تتحدث....

وهج (مغتاظة) بص البجاجة وعينهم اللي تتدب فيهم

100 رصاصة

راضى (بتأكيد) يا وهج....

المرضة 2 ايه يا أختى ... واحنا كنا غلطنا فيكى وللا كنا غلطنا فى

حد من اهلك

وهج (بصوت عالٍ) انتى.....

راضى يمسكها من كتفها ويديرها الى الناحية الاخرى كى لاتراهما

وتصمت وهو ينظر لرائيا....

رائيا تعالى خليكى معايا....

راضى معلى امسحها فى اصلها بنتها الثانية وقلقانة على امها

برضك..... خدى.....

ينظر فيتذكر انهما اثنتان....

راضى يكمل قصدى خدوا....

ثم يخرج بضعة نقود مرة اخرى ويعطيها لكل منهما.....

يكمل: انا مش حاوصيكوا.... معلى ياختى ربنا يخليكى خلصينا

من الحدوتة دى بسرعة وليكى عليا بعد ما الدكتور يتكرم

ويتعطف علينا ويشوف امى ليكوا حلاوة ثانية بس بشرط
حالا

الممرضتان (بفرحة) خلاص...

مشهد (63) ليل - خارجى

بورصت حلموس

راضى يجلس وهو يبدو عليه الحزن الشديد.....

حلموس يقترب منه.....

حلموس مالك ياراضى ياابنى.... ايه الحكاية... مش خلاص

الست أم راضى باقت كويسة ونايمة مرتاحة فى بيتها
معززة مكرمة

راضى انا مش قلقان عليها... هى الحمد لله احسن دلوقتى ؛

لكن انا زعلان على حال الناس

حلموس عشان اللى حصل فى المستشفى يعنى..

راضى يعنى هو الواحد مش لو كان معاه شوية فلوس كُت دخلتها

مستشفى خاص وكانوا عاملوها احسن معاملة لكن بقى
بقلتها بنتبهدلوا ولا اكننا رايعين نشحتوا وللا نطلبوا حاجة
مش من حقنا

حلموس معلى ياراضى لازم برضك يكون فيه فرق بين الحكومة

والخاص

راضى على رأيك مع ان يعنى برضك هم مابيعملوش حاجة لله

وقبل ماتطلب اى حاجة ولوحتى حنة قطنة لازم يتدفع
حقها..... خلاص الناس ماباقتش بتتكلم غير بالفلوس
من غيرها مافيش اى رحمة حتى فى المرض مافيش قلب

حلموس طب ما الحكومة كده برضك انت اللى بتجيب كل حاجة بنفسك لزوم الطبية

راضى أهه كله دفع فلوس فى النهاية والسلام.. تقدر نقول لى الغلابة اكتر مننا يعملوا ايه.... هى مش مستشفى الحكومة دى الدولة هى المسئولة عنها والمفروض توفّر فيها كل حاجة للعيانين

حلموس ده انا سمعت ان التمرجية والمرضات ببسرقوا كل حاجة من المستشفى والاجهزة العهدة ويبيعوها ويطلعولهم منها بقرشين

راضى طب اديك قلت... لو فيه رقابة بقى وقانون صح بيعاقب الاشكال دى من غير رحمة زى ما هم ما بيرحموش العيانين والغلابة حيمشوا زى الجزم بعد كده.... لكن نقول ايه بقى... انا ملاحظ ان الناس فى البلد دى بقوا ماشيين على كده بيتفننوا ازاي يطلعوا فلوس بأى طريقة ومش مهم ازاي... دى باقت مجزرة ومافيش لادين ولا ضمير

حلموس معلىش... معلىش ياراضى هى الدنيا كده المهم حمد الله على سلامة الوالدة...

هنا يأتى سيد....

سيد مساء الخير عليكموا..... ايه يا جماعة ماكلوا.....

حلموس اصلك ما عرفتش اللى حصل.....

سيد لا استعرفت كل حاجة... المهم سلامة الحاجّة وماتستشيلش فى نفسك يا عم بكرة لما تستفتح المحل ان شاء الله حتستحلّو وتستزهره معاك ولا الحوجة لمرافئ الحكومة..... قوم معايا...

راضى (بتناقل) على فين بس.....
سيد
عندى فرح بتاع ناس قراينا ، وأم العيال مش مسترايحة
عشان حمادة مستعفى شوية تعالى بس معايا استفرش
واستهيص واستريح من على قلبك الهم والنكد
راضى
معلش ياسيد اعفينى مش حاقدر..... ماليش مزاج
وشكلى حيبقى وحش فى الفرع
سيد
(يجذبه بشدة) ولاوحش ولا حاجة قوم بقى يالة.. قوم ياللا
معايا.. مانت حستتجى يعنى حستتجى....

مشهد (64) ليل - داخلى

قاعة الفرع

القاعة ممثلة بالمعازيم من اقارب واصدقاء واحباء حيث ان معظم
من بالفرح من سيدات منقبات ترتدين اللون الاسود او الكحلى الداكن اما
رجالهم فمعظمهم ملتحيين وكل منهم بجانب من القاعة حيث الرجال
بجانب والنساء بالجانب الاخر والكل فى انتظار قدوم العروسين.....
سيد وراضى يدخلوا معا القاعة فيفاجأ راضى بمن بالداخل.....
راضى (بانزعاج) انت متأكد انه فرح وللا حاجة تانية
سيد يضحك

سيد
زى ايه....
راضى
مش عارف.. يكونش عزا مثلاً... وللا تنظيم وانت فهمت
غلط
يقهقه سيد.....

سيد
لا ده.. ده.. ده فرح بنت ابن عمى... استعالى
اما نستعرفوك عليه

فيذهب معا الى رجل ملتحي يرتدى بدلة قصيرة البنطلون قليلا.....

سيد ده حسن ابن عمى وابو العروسة

راضى يسلم عليه.....

راضى الف. الف مبروك ياأستاذ حسن وربنا يتم بخير

حسن (بجدية) متشكرين... جزاك الله كل خير اهلا بيك ياسيد ،

اومال فين ام العيال

سيد معلشى ماستقدرتش تستنجي ، اصل السواد مستتعبان

فاستجبت صاحبي معايا

حسن (على مضض) اهلا بيك وبصاحبك....

ثم يميل بالقرب من اذنه مكمل.....

(يهمس) انت مش عارف انه فرح عائلى

سيد ينظر اليه بحيرة.....

حسن يكمل عامة اهلا بيكوا... اتفضلوا . اتفضلوا

سيد استعالى يارضى نستعدوا

هنا يدخل العروس والعريس فى زفة دينية على موسيقى برنامجى الشيخ

الشعرواى والعلم والايمان.....

تكون المفاجأة ان العروس ايضا منقبة وترتدى الفستان الابيض كالعباءة

واسع فضفاض وعليه طرحة طويلة مسدلة على ظهر العروس مع نقاب

يظهر عيناها فقط حيث انهما فى كامل زينتهما وعلى النقاب بعض

التطريز الخفيف.....

راضى يندهش ويبدو على وجهه الضحك ولكنه متماسك....

سيد استشاييف... دى بنت حسن ابن عمى..... ايه رأيك

فى العروسة...؟

راضى هو انا شايف حاجة... تقصد ايه رأيك فى عينيها.....

واضح ان العريس ماشافش غير عينيها برضك عشان

كده اتجوزها

يجلس العروسان ويبدأ الاحتفال بهما مع وضع بعض الاغانى الدينية

لسامى يوسف وهشام عباس وغيرهما ممن غنوا دينى.....

سيد وهو فرحان.....

سيد فرح حكاية ع الموضة.....

راضى (بسخرية) فعلا.....

يأتى الشربات فيمسكان العروسان بالكؤوس ثم تُشرب العروس عريسها

الشربات اما العريس كاد ان ينسى ان العروس ترتدى النقاب وسيشربها

من فوقه ولكن سرعان ما تذكر نقابها فيرفعه بهدوء ويعطيها هى الكأس

كى تشرب بمعرفتها بنفسها من تحت النقاب بعد ان اضطرب مما

هى عليه.....

راضى يبدو عليه النوم حيث يسند رأسه على يده وعينه تغفل من وقت

لآخر وسيد كلما يراه هكذا يوكزه حتى يفيق.....

تبدأ المعازيم فى الالتفاف حول العروسان أسرة أسرة كى يتم تصويرهم

معهما وهنا يفيق راضى.....

راضى فيه ايه ياسيد هُمُ وفقوا ليه ؟

سيد اصل المعازيم حتستصور مع العروسة والعريس

راضى ويتصوروا ليه ، هو فيه وش حد فيهم باين..... وبعدين

انا اعرف ان الناس دول مابتعترفش بالتصوير وبتقول

عليه بدعة وحرाम

سيد آهى مرة وحتستعدى... فرح بقى عقبالك

راضى (بفزعاً) ايه... لاياعم لو عقبالى بالطريقة دى ببقى مش
عايز اتجوز

وكلما وقفت اسرة بجانب العروسان كى نتصور معهما يكون فيهما سيدة
او اثنتان منقبّتان.....
سيد يشرح لراضى.....

سيد دى أم العروسة.....

دى بقى أم العريس.....

دى بنت عم العروسة بنت حسين.....

ودى كمان بنت عمها الثانى عثمان.....

اما دى بقى بنت خالتها هنية اللى استصورت معاهم من
شوية وكانت مستلايسة كحلى.....

راضى ارحمنى ياسيد ، ماكلهم لابسين يااسود ياكلحلى...

سيد (يكمل) دى بقى تبقى.....

راضى (مقاطع بسرعة) ابوس ايديك كفاية... هو انا عارف حد

فيهم ؛ وبعدين انت عرفتهم من بعض ازاي ... ده كلهم
شبه بعض لابسين زى موحد

سيد اللة... مش قرايينا ياأخى

راضى اومال شكلك غريب عنهم ليه.... انت متأكد ان الفرحة ده

تبّعكوا.... ليكون فى القاعة الثانية وانت ناسى ؟؟؟

ماتيجى نروحوا نشوفوا

سيد خلاص ياراضى البوفين حيستفتح أهه..

راضى ينظر اليه باستغراب ويضرب خده بكفه.....

مشهد (65) نهار - داخلي

مكتب هاشم بالبيت

راضى يجلس امام مكتب هاشم....

راضى انا الحقيقة مش عارف اقول لحضرتك ايه....

هاشم خلاص ياراضى عايز تمشى وتسيبنا بعد ما تعودنا عليك

وارتحناك

راضى ينظر بخجل للارض....

راضى والله ياباشا كان بوڊى افضل معاكوا علطول بس الحمد لله

الانسة نانا اتجوزت على خير من اكثر من شهر وانا

مارضيتش اسبيكوا علطول وكمان المحل بتاعى قربت

اشطبه وافتحه فعايز أفضاله

هاشم بص ياراضى انا عن نفسى لو انت السواق بتاعى

ماكنتش استغنيت عنك لكن طبعا الراى الاول والاخير

لنانا...

نانا تدخل...

نانا ياترى جايبين فى سيرتى بتقولوا ايه...

راضى ياستى عايز يتفرغ للمحل بتاعه ويسيبنا

هاشم (بجدية واهتمام) لا ياراضى الله يخليك انا محتاجك معايا

نانا

الفترة اللي جاية....

هاشم ينظر اليها باهتمام واستفسار...

اصلى بادرس اليومين دول مشروع مهم جدا وفيه

مشاوير كتيرة ضرورى اعملها قبل ما ارسى ع المكان

ونظام المشروع ، فمعلش ياراضى لازم تستنى معايا

راضى ينظر اليها والى هاشم على مضض وكأنه يقول ماباليد حيلة....

مشهد (66) ليل - خارجى

كافيتيريا الانفوشى

حمدى يقف مع ابراهيم صاحب الكافيتيريا.....

حمدى يعنى ايه مافيش.... انا داخل ع الشهر التانى أهه
وماالنتيش مرتبى والموسم خلاص ادامة اقل من شهر
ويخلص

ابراهيم طب اعمل لك ايه بس ياحمدى.... ماهو على يدك أهه ،

بتوع الازالة مطلعين عين اللي جابونى.. كل يوم والتانى

ناطين على دماغى عايزين يهدوا الكافيتيريا ع اللي فيها

حمدى طب وده ماله باللى باقوله ياابراهيم...

ابراهيم يعنى مقشطينى اول باول اكنهم صعبان عليهم نكسبوا

ويبقى معانا فلوس.. ده غير الزباين اللي قلّت وبدأت

تطفش

حمدى محدش ضربك على ايدك وقالك ادفعله ، انت اللي عودته

على كده وهو سايق فيها ومستعبطك.... انت مش فاتحها

سبيل ياخويا لاجل خاطره

ابراهيم ماهو لو ماعملتش كده حيقفلهاانا

حمدى (بغيط) مايقفلها ياأخى ، ع الاقل احسن من الخدمة

والتعب والسهر اللي ع الفاضى..... بأقولك ايه

ياابراهيم من الآخر احنا ماينشتغلوش هنا ببلاش ياتدينا

حقنا يانسيو هالك تشتغل فيها لوحداك وتبقى ندى

المصروف لسيادة الظابط بتاعك

ابراهيم طب اعمل له ايه يعنى ياحمدى....

تشتكيه... تشتكيه يا ابراهيم بدل ما ينط لنا كل شوية زى
 العفريت وفارض على قفانا اتاوة....
 اشتكى ضابط انت اتجننت.. ده يوديني فى داهية ويقفل لى
 المطرح.... استهدى كده بالله وكل شئ حيتحل بالهداوة
 من الآخر كده... كلامى واضح ومفهوم ياتدبنى مرتبى
 المتأخر شهرين يا انا اللى حنقفلهاك

مشهد (67) ليل - خارجى

بورصة حلموس

راضى يجلس مع اخيه حمدى بالقهوة.....
 راضى كام مرة قللتك سيب ام الكافيتيريا اللى مش جايبة همها
 معاك دى
 حمدى (بأسى) وانا اعمل ايه بس.. مانت شايف وعارف كل
 حاجة ، مافيش شغل واللى تلاقيه احسن من مافيش.....
 بقالى كام سنة مخلص معهد... كات عجبك قعدتى فى
 البيت زى امك واختك وانت اللى شايل الحمل كله لوحذك
 راضى وانت دلوقتى يافرحتى أخذت ايه تشيله معايا.....
 حمدى ينظر الى الارض.....
 راضى يا عبيط انا ما قصدش ، انا نقصد انك مضيع وقتك
 وجهدك ع الفاضى من غير اجر وبشتغل شغلانة مالهاش
 دعوة بشهادتك
 حمدى وهو مين بيشغل بشهادته، ده لو كل واحد قال كده محدش
 حيشغل وكله حيقد ع القهاوى زى خيبتهها..... تصدق

... انا مازعلان ع الفلوس قد مازعلان ع الكافيتيريا اللي
 حنتقل كمان كام اسبوع دى ؛ أدبنى كُت باعمل حاجة
 مفيدة برضك بدل قعدة البيت زى المستهبلين فيها
 وفأكرين ان الشغل ببيجى يخبط ع الببان
 معلىش ياحمدى أهه خليك ورا ابراهيم لحد ماتاخذ حقك
 انشالله تشتغله فى الازرق وبإذن الله ربنا حيعدهالك
 ونحاولوا نشوفوك حاجة بديلة....

راضى

مشهد (68) ليل - داخلى

شغّت راضى

وهج تجلس مع رانيا تشاهدان التلفاز حيث يوجد امام رانيا صينية
 مقسمة الى اجزاء كل جزء منها به نوع ولون معين من الاحجار والخرز
 واللؤلؤ ويدها خيط من النايلون تدخل به مابالصينية بتنسيق معين
 هنا اعلان بالتلفاز يقول.....

التلفاز ياللا بسرعة اتصل او ابعت رسالة اوام عشان تكسب
 جائزة معانا

وهج ايه كم الفراغ اللي عند الناس ده هو مافيش فى التلفزيون
 غير اتصل وابعت... هو فيه ايه

رانيا اوامل حيكسبوا ازاي - خلاص مابقاش فيه شغل فى البلد
 زى مانتى عارفة ومافيش حل اداهم لكسب الفلوس
 اسهل من كده

وهج وفيه فعلا ناس بتكسب ومصدقة الكلام ده
 رانيا الله اعلم ، أهه كل كام يوم يقولوا اسم حد فاز وماتعرفيش
 اذا كان حقيقى وللا مفبركيه..... ولو حتى بجد أهه

حيكون واحد من آلاف بيتصلوا ويكسبوا من وراهم
ملايين والهبل كثير

وهج والناس عارفة ان ده ابتزاز وقمار وبيتصلوا برضه
رانيا الناس تقولك أهه بنتسلوا بدل مالنا مش لاقين حاجة
نعملوها ، وفيه ناس تانية بتدمن الحكاية دى لعل وعسى
تضرب معاها وتكسب

وهج آآه يعنى الناس فاهمة ومستهلة فيها وبندل مايوفروا
فلوسهم لحاجة اهم لأ بيضيعوها ع الكلام الفارغ
والقمار ده

يبدو الحزن الشديد على وجه وهج....

التلفاز ولوعندك اى مشكلة حياوبلك عليها الدكتور النفسى
عليوة الرايق.... ولو فيه حاجة فى الدين عايز تستفسر
عنها اتصل بالشيخ الدكتور فتاوى ابو الليل

وهج كمان الطب والدين دخلوا اللعبة دى كمان ؛ بقى ينفع
السؤال فى الطب من غير كشف وللا الشيخ الجليل ده
يوافق على كده ازاي حتى معلومات ربنا بيستغلوها
بالفوس استغفر الله العظيم

رانيا ياشيخه انتى بتصدقى انهم دكاترة وللا بتوع دين فعلا....
دول يالما عاملين نفسهم كده عشان يكسبولهم قرشين
يافعلا هم كده بس مش لاقين شغل ومحدث يعرفهم
وعايزين يشتغلوا ويتعرفوا

وهج تضحك بسخرية.....

وهج خلاص اعملى لك انتى كمان كده واطلبى من الناس
تتصل بيكى وقولى انا باعمل اطقم اكسسوارات اشترى
طقم وخد عليه حلق هدية

وهج ورائيا تضحكان بشدة.....

رائيا يا حبيبتي اللي ماشى دلوقتى الصينى مش المحلى

ويهج ايه !!!؟

رائيا يعنى الصناعة الصينى لأن ثقيلها انضف وصناعتها تشد

عين الزبون ده غير انها ارخص مع ان عمرها قصير

بعكس بقى المحلى صناعة زفت من غير ضمير تفرفى

تبصى عليه وغالى؛ عشان كده محدش بيشتريه

ويهج عندنا بقى مافيش حاجة اسمها صناعة دخيلة علينا كله

مصرى او عربى.... وكل دولة عربية عندها اكتفاء ذاتى

بصناعتها ممكن يحصل تبادل بيننا وبين بعض.... لكن

الصينى ده غير معترف بيه نهائى لأنه ثبت من زمان انه

غير مطابق للمواصفات وغير صالح للاستخدام الآدمى

رائيا ياسلام... يعنى احنا باقين احسن ناس فى العالم....

ويهج قصدك حقيقوا احسن ناس فى العالم....

مشهد (69) ليل - خارجى

بكافيتريا مطلت على البحر

راضى وسيد يجلسان على احدى الترابيزات المنتشرة على

الرصيف المواجه للبحر بمنطقة العصابة....

النادل يضع امامهما كوبان من الشاي.....

سيد (باستكار) ايه !!!؟ تستسيب الشغل عند بنت سيادة اللوا

راضى اعمل ايه ياسيد.. المحل كده مش حيتفتح فى سنته،

مشاوير نانا دى كتيرة اوى وما بتخلصش واننا اساسا

مش فاضى

سيد برضك ياراضى.. استوعاك تستضحى بشغلك عندهم.....

الى زينا فى البلد دى من غيرهم مالوش لازمة

راضى (مستنكرا) ليه بقى ان شاء الله.....

سيد كده....

راضى ينظر اليه بعدم اقتناع حيث انه غير معجبا بكلامه.....

سيد مش عشان فلوس والله.... لكن عشان نفوذاتهم ، دى ناس

واصلة ، دول ضهرنا يالة....

راضى مازال يبدو عليه عدم الاقتناع.....

سيد يكمل: طب بلاش.... تستقدر تستقولى من غير الباشا كان

ممکن استطلعت رخصة سواقة وللا كان محلك بقى

مستجهز ع الاستفتاح -لأ طبعا ، شفت بقى مش مستقدر

ترد ازاي

راضى ياسيد انا مش مصلحجى....

سيد ومين استقال كده بس... أدبك استشفّت بنفسك الناس فى

البلد دى يافوق اوى ياتحت اوى ، واللى زى وزيك

مستلزم يستبقى تحت طوعهم عشان يستكفوا شرهم عنا

وعن السامعين..... طول ما هم مسترضيين عنك طول

ما انت فى نعيم يا صاحبى

راضى يفرك رأسه....

سيد استوعاك تستفكر تستسيبهم... انت ماتستعرفش ان كثير

بيستحسدونا ع الشغلانة دى... يالة احنا مع السلطة والنفوذ

(بتأكد) والفلوس.... احنا من غيرهم حيستداس علينا

عشان اى استشكال يحصللنا هم اللي حيستخرجونا منه

راضی

طب وبعدين ياسيد انا ماصدقت ان بقى عندى محل
وحافته وابقى سيد نفسى

سيد

مايستمنعش برضك صدقنى ، ده خير ليك ولعيلتك زى
ماحصل مثلا مع الست الحاجة لما استوقعت كان يستقدر
يستوديهالك احسنها مستقشى لو كُت استطلبت منه كمان
تستقدر تستطلب منه شغل بالأخوك بالأختك..... ده
بإشارة منه يستخلى البلد كلها تحت امرك.... ده انا
استثقت اماكن عمرى ماكُت استحلُم استعدى من ادمها
حتى

راضی

سيد

قصدك من الآخر ان اللى ليه ضهر فى البلد دى.....
(يكمل) عُمر ما باب يستقل فى وشه ابداء، استخدها منى
نصيحة ياراضى واستخلك معاه حتستكسب كتير
وماتستضيعش فرصة ذهب زى دى من بين ايديك ؛
ألوفات بيستحسوك عليها مش احسن مانمشوا مشى بطل
العياذ بالله....

راضی

سيد

طب اعمل ايه ياسيد.....؟
حاسنقولك تعمل ايه.....

مشهد (70) - نهار - داخلي

مكتب هاشم بالبيت

راضى يجلس امام مكتب اللواء هاشم....

هاشم مالك ياابنى بقالك ساعة قاعد ادامى ومانيش عارف انت عايز ايه بالضبط

راضى اصل الحقيقة..... المحل بتاعى.....

هاشم خلاص عرفت اسطوانة كل اسبوع، انا قربت افتحه وعايز اسيب شغلانة السواعة

راضى لاياباشا والله ابداء... انا اقصد لو ممكن اطلب طلب تانى خالص بس محرج من سيادتك....

هاشم يابنى اتكلم طلعت العفاريث تتطط ادامى

راضى حاضر ياباشا خلاص حامشيهوملك أهه.....

هاشم نعم !!!؟

راضى قصدى زى ما حضرتك عارف الشتا ع الابواب وكنت قلت لسعادتك اخويا ببشغل فى.....

هاشم ايوه عارف وحيقفلوا فى الشتا... ايه المشكلة ، عايز واسطة للكافيتيريا تفضل فاتحة فى الشتا كمان

راضى لاياباشا مش للدرجة دى..... انا كل اللى باتمناه من سعادتك انك توافق لو تشغل حمدي اخويا بدالى

هاشم بدالك.... بدالك يعنى ايه ؟....

آه سواق لنانا بنتى....

راضى يرجع للخلف مستندا بظهره على الكرسي يتنفس بعمق.....

راضى الحمد لله اخيرا وصلت المعلومة لسعادتك

هاشم وانت كنت اتكلمت من الاول وللا قلت حاجة عشان افهم
للى انت عايزه..... ماعلينا اخوك ده ظروفه ايه ومعاه
ايه واخلاقه زيڪ وللا.....

راضى لاياباشا اتظمن خالص تقدر تقول عليه انا ، وعامة انا
حنجيبه لسعادتك ولست نانا تشوفوه وتمتحنوه زى
ماحضر اتكوا عايزين

هاشم يهز رأسه موافقا....

هاشم خالص يراضى وهو كذلك عشان برضه ماقولش اننا
بنضغطوا عليك طالما ربنا فتحها عليك خلى اخوك برضه
ياكل عيش

راضى (بفرحة) تشكر ياباشا... الف . الف شكر... ربنا بخليڪ
لينا ياباشا

مشهد (71) ليل - داخلى

بهو شقت هاشم

نانا تجلس مع والديها وهى تبكى بحرقة.....

أم نانا يابنتى حرام عليكى ده انتى ماکملتيش 3 شهور متجوزة
لحقتوا يبقى فيه بينكوا مشاكل

هاشم ده طبعى فى اول سنة جواز وبعد كده الامور بتهدى
والزوجين بيبقوا متفاهمين

نانا لا يابابا لاياماما... انا استعملته بما فيه الكفاية.. ده انسان
انانى فاكر انه امتلكنى والمفروض اعيش خدامة تحت
رجليه ماليش رأى فى اى حاجة وماقولش غير طيب
وحاضر من غير اى مناقشة

ام نانا

يا بنتى حاولى تتفاهمى معاه يمكن انتى مش عايزة تسمعيه
او تفهميه

نانا

ده مش طبيعى بيتقلب ويتفرز فجأة من غير اى سبب
ومن ساعة ماعرف المشروع اللى عايزة اعمله وهو
بيعاملنى زى الزفت وكل شوية يتهمنى بالغباء وعدم
تحمل المسئولية وان عمرى ما حوصل لمستوى مخه
الخارق الذكاء

هاشم

لااااا مش معقول كده... ازاي جوزك يطلع منه كل ده ،
المفروض انه ابن ناس ومن عيلة

نانا

مش هو ده اللى انتوا اخترتوه وفرضتوه عليا عشان
مستواه ومستوى عيلته وتعليمه العالى... مش ده اللى
فضلتوا تزفوا على دماغى عشان اوافق عليه.....

هاشم يبدو عليه الغيظ....

هاشم

بس انتى كمان كنتى فرحانة بيه وعاجبك وبتبهاى بيه
ادام الناس....

نانا

أهه طلع فى الآخر معقد فاكرك نفسك اذكى انسان فى العالم
وكل اللى حواليه أغبية واولهم انا مراته خريجة تجارة
انجليش جيد جدا

أم نانا

اهدى طب يا حبيبتي.. اهدى.... (تتوجه الى هاشم).....
انت لازم تكلمه يا هاشم وتشوف بيعمل كده ليه....

نانا

انت لسة حتكلمه... انا خلاص زهقت منه.... اللى زى
ده ما يتعاشرش لحظة

هاشم

لااااا.. الحكاية دى لا يمكن نسكتوا عليها ابدأ هو فاكرك
نفسه ابن مين... ده انا اشتريه ونوديه ونجيبه ونغسله

فى البحر هو وعيلته كلها العرة دى هو مش عارف انا
ممکن نعمل فيه ايه.....

يرببت على كتف ابنته بلطف....

مانز عليش نفسك ياناا وكل شئ حيتصلح ان شاء الله.....

مشهد (72) نهار - داخلى

اللهفت راضى

يرن جرس الباب فتفتح وهج.... تجد فتاة تدعى ايمان....

ايمان رانيا موجودة....

وهج ايوه اتفضلى....

تدخل ايمان....

رانيا تأتى من الداخل وهى تسأل....

رانيا مين يا.... ايمان !! ازيك وحشتينى... كل ده

مااشوفكيش.....

تتصافحان وتقبلان بعضهما البعض....

رانيا اعرفك... دى وهج قريبتنا...

ايمان اهلا وسهلا....

وهج اهلا بيكى....

ايمان معلى يارانيا اعزىنى كُت مشغولة شوية بسبب فرحى...

رانيا تنظر لوهج وكأنها تقول لها شايقة حنتجوز.....

اصله كمان 3 نيام وانا جاية نعزمك عليه اوعك ماتجيش

ألف . ألف مبروك

ايمان الله يبارك فيكى.... عقبالك

رائيا شكرا يا حبيبتي... وجهزتي كل حاجتك خلاص الفستان والطرحة والذي منه

ايمان الحمد لله كله كله، صحيح كنا مزنوقين اوى لييجي معاد الفرح ومانلحقوش نخلصوا لكن كنا بنعملوا ونحضرنا كل حاجة بسرعة

رائيا طب الحمد لله... وحجزتي الكوافير

ايمان طبعا دى اول حاجة

رائيا والفستان جاهز بقى وللا تفصيل...

ايمان جاهز ايه وتفصيل ايه.... دى ليلة والسلام ومش حنلبسوه تانى ندفعوا فيه اد كده وبعدين نرموه فى الدولاب... اجرته بس ايه ايجار اول لبسة ... برضك تمن الفستان الجاهز احنا اولى بيه.... بس فيه مشكلة.....

رائيا ايه.... خير...

ايمان اصل الفستان اختك اختارته مفتوح ومقوّر حبتين عشان يبين البياض للعريس

وهج تنظر لرائيا وتبتسم على ماتقوله ايمان.....

رائيا طب ودى فيها ايه....

ايمان استنى.. اصلى عايزاله كولىه حلو كده وببيرق، وانا عارفة ان انتى عندك حاجات حلوة باشوفك لابساها فى افراح صحباتنا فلو ممكن تسلفينى واحد من بتوعك

رائيا (بخجل) الحقيقة انا مااعزى عليكى حاجة بس اصل.....

ايمان ماتخافيش محدش حيلمسهم غيرى والله

رائيا الحكاية مش كده خالص بصراحة اصلى اللى بنسلفه مايبرجعش، عفاف ونجلاء اسئلوا منى قبل كده

ومارجعوش الحاجة وزى مانتى عارفة دى بتاعتى انا
شغل ايدى يعنى..... طب مافيه ايجار عند
الكوافيرات....

ايمان
مانا كُت حنعمل كده بس اللي عندهم اَكْنه مِصْدَى من
كتر الاستعمال..... عامة انا مابنفرضش عليكى حاجة مع
انى اوعدك انى حنرجعوك تانى.....
خلاص تاهت ولقيناها....

وهج
رانيا وايمان تتعلق عيناها على فم وهج....
انتى يارانيا شاطرة فى عمايل الاكسسوارات وعندك افكار
جميلة.... ايه رأيك لو تعملى لايمان طقم وبسعر رمزى
هدية فرحها وبكده الطقم بيقى بتاعها ومش ملزمة
ترجعوك

ايمان
فكرة تجنن.... انا موافقة...
وهج وهى تنظر الى رانيا بمعنى ان توافق.....
ها... ماردنيتش يارانيا....
رانيا
بس انتى بتقولى كمان 3 نيام

وهج
وفيها ايه تعالى على نفسك واقعدى عليه لحد ماتخلصيه
ايمان
هو فيه زيك.... انتى شاطرة وايدىكى واخدة ع الحاجات
دى من زمان يعنى حنبقى سهلة وسريعة بالنسبة لك
رانيا
خلاص اتفقنا تعالى خديه يوم فرحك الصبح.....

ايمان
لا... انا حنستاكى تلبسهولى بايدىكى وانا بنلبس عند
الكوافير.... وتمنه اللي حنقولى عليه حيكون عندك قبل
الفرح بيوم.....

نقوم ايمان متجهة نحو باب الشقة كى تغادر.....
وهج
طب مش تتقى الشكل اللي يعجبك....

إيمان وهى تفتّح الباب...
 إيمان أنا وثقة فى ذوقك يا حبيبتي... ياللا سلام عليكوا....
 بعد ان تخرج إيمان..... تنتظر رانيا لو هج.....
 وهج إيه رأيك فى الفكرة دى بقى..... أدى شغلانة طلعتك
 أهى وانتى قاعدة فى بيتك معززة مكرمة ومرتاحة
 كمان.... فرصة وجات لحد عندك مش معقول ترفضها
 رانيا تبتسم بفرح.....

مشهد (73) نهار - خارجى

بورصة حلموس

راضى يجلس مع حلموس....
 حلموس شفت.... عشان تعرف ربنا ما بينساش حد بيقطع من هنا
 ويوصل من هنا.... أدبك حتفتح دكانك واخوك مش
 حيقعد عاطل وحيشغل عند ناس واصلة كمان
 راضى ايوة ياعم حلموس ماتعرفش دلوقتى اد إيه انا ارتحت
 وحاسس انى مبسوط
 حلموس طب يا ابنى ربنا يبسطك ويرحك دايمًا يارب اومال
 الافتتاح امتى ؟
 راضى خلاص كلها أيام إن شاء الله ، فات الكثير
 وهنا يجدا ثلاث شباب يخرجون من بيت فتحى وكل منهم يحمل حقيبة
 كبيرة على كتفه ويتضح انها مملئة اشياء ما.....
 حلموس انا مش فاهم العيال دول كل يوم فى المعاد ده يججوا
 يحملوا الشنط دى ويطلعوا ما يرجعوش غير تانى يوم
 فاضيين ده غير ان شكلهم نضاف مش من هنا

راضى يمكن يقربوا لصاحب الشركة...
 حلموس علمى علمك والله ياابنى... يمكن يكونوا ببيجوا ياخدوا
 بضاعة ويطلعوا يلفوا بيهاع الاجزخانات
 والسوبرماركوهات يبيعوها لهم....
 راضى يمكن ... بس انا اعرف طالما حاجات مستوردة وده
 مخزن يبقى لازم يكون فيه عربيات تيجى تنزل بضاعة
 وتحمل برضك منها.....
 راضى مازالت عينية على تلك الشباب حتى ينعطفوا خارجين
 من الحارة....
 راضى يكمل طب عن إذك خمسة كده يامعلم....
 ويقوم راضى مهرولا خلفهم.....
 حلموس اتفضل ياخويا....

مشهد (74) نهار - خارجى

خارج أكارة

راضى يتتبع احدهم حتى يصبح بمفرده ويتفرق عن معه ثم
 يقترب منه...
 راضى سلام عليكموا ياأخ....
 الشاب وعليكوا السلام...
 راضى معلش لو فيها رزالة، مش انت شغال تبغ شركة
 ابو النجا....
 الشاب (باستغراب) ايوة.. فيه حاجة...
 راضى (بتردد) لأ ابدأ... بس اصل بصراحة انا خالى شغل
 وكانوا ولاد الحلال دلونى ع الشركة دى انهم طالبين

- الشباب موظفين ومن غير وسائط فلو تدلنى ازای ینوبك ثواب
والله یاكابتن كل اللی اعرفه انهم كانوا عایزین شباب
یشتغلوا مندوبین ویتهیألی انهم اکتفوا بدلیل اننا بقالنا فترة
فی الشغل ومحدث جد علینا
- راضی طب معلى قوللی وخلاص الله یخلیك ویاصابت یاخابت
... انا عارف انك اکید حتس بیا لما کت خالی شغل کده
زى والشباب لبعضیهم برضك...
- الشباب خلاص یاعم انت تروح لمکتب ادارة الشركة اللی فی
العطارین وتسال اذا عایزین مندوبین یمکن یمکن عندهم
عجز فی منطقة معينة
- راضی طب ماتآخذنیش فی السؤال یعنی.... انتوا بتوزعوا ایـه
عشان نکنونا علی علم برضك
الشباب ینظر لراضی بعلامات استفهام.....
- الشباب انت مش عارف ابو النجا بیشتغل فی ایـه.....
- راضی لا عارف بس عایزین نتأكدوا زی ماانا عارف وللا لا
- الشباب عموما هی بتوزع شامبوهات وبلاسـم وشاور جل
وکریمات شعر وبشرة وماکیاجات کده یعنی
ومارکتها ایـه....
- الشباب دی کذا ماركة بیستوردوها وكلها مشهورة وعالمية إشی
من فرنسا وإشی من ايطاليا وإشی من لندن وغيرها
- راضی طیب یاأخ احنا متشکرین لیک جدا وآسفین اننا
عطلناک.....
- الشباب لا ولایهمک احنا نحیوا نخدموا مش اکثر.....
- ثم یمضی.....

مشهد (75) نهار - داخلي

شقت اللوا هاشم

نانا مع والديها وزوجها يتناقشون....

أم نانا يابنتی مش كده... بلاش نشوفية الدماغ دى.....
هاشم استی انتی... قعدتتا دى عشان كل واحد يعرف حدوده
كويس ونعرفوا اذا الاستاذ كريم شارى بجد وللا ايه
بالظبط

نانا وانا بقى مش خارج فى كلامى جاتطلق يعنى حاتطلق
وعشان كده صممت ان الدكتور العالم الذكى الفطین كريم
يكون موجود معنا

كريم شايغين... شايغين التريقة....
نانا بأقولك ايه... شويتين المسكنة واسلوب الضحية ده مش
علينا... انا فهماك كويس اوى... لحد كده وكفاية ياكريم
بيه

هاشم استی يانانا كل شئ بالتفاهم.....
نانا مافيش تفاهم.. خلاص عدی وقت التفاهم، لحد امتی

حفضل خاضعة لأسلوب الامر ده... فبالذوق كده ياريت
كل واحد يروح لحاله وابقى دورك على واحد جاهلة
تبقي تحت طوعك تحطّلها للجام وتمشيها زى مانت
عايز لأن واضح انك مش قادر تعيش مع واحدة متعلمة
ومتفكة مستوى تفكيرها ومخها احسن من مخك وتفكيرك
كده .. كده يانانا دى آخرتها....

كريم

نانا

سورى ياكريم بيه انا ست عملية وبدل مايبقى فيه عيال
يبقوا ضحيّتنا انا باعفيك واعفى نفسى من ده... ولو
سمحت عايزة اخلص بسرعة عشان ورايا مشروع مهم
لازم انهى دراسته وابدأ فى تنفيذه فى اقرب وقت

كريم

ماهى دى مشكلتك انك مش عايزة تقضى غير لأحلامك
وطموحك ومشاريعك وانا فى الآخر

هاشم

وانت بكده انانى مش شايف غير نفسك وبس.... لكن
اسمع ياكريم بنتى هى كل حاجة فى حياتى، انا ربيّتها
وكبرتها وعلمتها احسن علّام وخليتها احسن بنت فى الدنيا
عشان تكون مسئولة عن نفسها و صاحبة قرارها
بس فيه حاجة مهمة جدا نسيتها ياسيادة اللوا.....

كريم

تبرق عينا هاشم له.....

كريم

ان حضرتك دلعتها زيادة عن اللزوم لدرجة انها اتعودت
تؤمر وكلامها مايتعارضش حتى لو غلط فماتعلّمش
يعنى ايه مسئولية وده مش اسلوب تربية

هاشم

نعم ياخويا... حتة واد ابن امبارح حبيجى يعلمنى ازاي
اعلم واربى.... بص يالة ، اوعى تكون فاكر عشان
لايسلى بدلة الضابط البحرى واتجوزت بنتى خلاص
حتلوى دراعى وللا تعمل راسك براسى ، تبقى بتعلم
ياحبيبي... يظهر انك ماتعرفش اللوا هاشم كويس وطالما
ده ردك عليا فأبقى استنى ردى انا بقى بس مش بالكلام
.... بالفعل

مشهد (76) ليل - داخلي

شقة راضى

وهج مع راضى بالصالة....

وهج طب وليه لسة شاكك طالما الولد صارحك بشغله

فى الشركة دى

راضى معرفش ليه مش مرتاح، ماننتى عارفة وشايقة وشامة كل

حاجة من البداية

وهج طبيب قول لى ايه شكوكك يمكن اقدر افكر معاك

واساعدك

راضى مش عارف.. اربطى كده الزبالين والشولة اللي داخله

خارجة كل يوم بالليل متأخر... السدخان والروايح

الغريبة اللي مش معروف اذا كات صابون وللا

نفتالين.... اصوات ثقليب فى حل طول النهار وفى

الاخر مندوبين شياكة محملين شنط مش عارف رايحين

بيها على فين، ولا فيه عربيات بتحمّل ولا بتنزّل بضاعة

وهج ع العموم أدينا بنفكروا نشوفوا حل للموضوع ده قبل

مايطلع النهار

مشهد (77) نهار - خارجى

امام بيت فتحنى بالحارة

وهج وراضى يقفان امام باب بيت فتحنى من الخارج بالحارة حيث
يتفقان ماذا سيفعلان.....

راضى ادخلنى انتنى زى مالتفقنا وانا حنلف نشوف ايه اللى
بيحصل من شباك المنور الورانى محدش يعرف يدخله
من ورا غير فتحنى وانا بس بطريقتنا
وهج تهز رأسها بالموافقة ثم تدخل البيت.....

اما راضى فيلتف حول البيت حتى يذهب مراقبا من الشباك الخلفى المطل
على مناوور البيوت.....

مشهد (78) نهار - داخلى

باب شققت فتحنى من الخارج

وهج تطرق الباب عدة مرات حتى يفتح الباب....

عندما يُفتح الباب تظهر اصوات النقلاب بالالوعية مع صوت وهج
نيران عالية وخروج ابخرة ودخان متصاعدين من داخل الشقة ذات رائحة
نفاذة.... حيث ان من فتح الباب يبدو من هيئته انه عامل لأنه يرتدى بذلة
خضراء اللون وكذلك وقفازات مطاطية.....
العامل افندم.....

وهج وهى تتطلع بالداخل.....

وهج ممكن لو سمحت يعنى أقابل المسئول هنا
العامل (بزهق) عارفين حقولى الريحه والدخان خنقاكوا...
خلاص بطلنا نشغلوا بالليل ده من المغرب كمان وللا
بلاش نشغلوا الصبح كمان ونشوفوا اكل عيشنا

وهج لا ابدأ انا جاية لحاجة تانية خالص، اصل فيه شاب معرفة
 بيشتغل عندكوا هنا عرفت منه انكوا عايزين مندوبين
 شاطرين فجيت اسأل على شغل.....
العامل ابوة... لحظة عندك ادخل اديله خبر
 تنتظر وهج امام الباب قليلا حيث تتطلع برأسها محاولة ان ترى شيئا مما
 تسمع او تشم ولكن بلا جدوى.....
 يعود العامل ويفاجئها.....
العامل اتفضلى المدير من هنا....
 وهج تدخل ويغلق الباب.....

مشهد (79) نهار - خارجى

مم ضيق بين بيوت أكارة

راضى يلف حول بيت فتحى ثم ينعطف الى ممر ضيق خلف
 البيت وهو عبارة عن ممرا مشتركا بين بيت فتحى وبيت آخر خلفه فهو
 يبدو كالمنور يسير بهذا الممر حتى يصل الى سور من الحجر القديم
 الابيض البالى الذى يربط بين المنزلين من الخلف حيث انه مرتفع عن
 طول راضى بحوالى متر تقريبا فيتوقف عنده وهنا يمسك احدى تلك
 الحجارة وهى كبيرة الحجم وملتصقة بأخرى بنفس حجمها فيحاول جذبها
 للخارج فهما ليسا بحجارة ثقيلة او ضخمة بالمعنى المفهوم بل هى قشرة
 سمكية للحجارة قد انفصل عنها باقى الحجر حتى تصبح سهلة التحرك من
 مكانها من دون عناء، فيزيلها راضى بكل سهولة فتكشف عن فتحة كبيرة
 نوعاما يستطيع شخص العبور منها وفعلًا يدخل راضى من خلالها حتى
 يصبح بالجانب الاخر وهنا نجد ان باقى الممر قصير ولم يوجد به سوى

شباكان لشقة فتحي تطلان عليه.... احداهما لجرة المدير المسئول الذى دخلت اليه وهج اما الآخر فلجرة اخرى شاسعة يكون شبّاكها مواربا فينظر من خلاله فيجد الآتى.....

مجموعة من السيدات والفتيات ويتضح انهن غير متعلمات تجلس امام طوافير موقدة وموضوع عليها اوعية كبيرة اشبه بالبراميل وهناك رجل يقف كى يضيف اليها سوائل مختلفة الكثافة فمنها الخفيف ومنها الثقيل ومنها اللزج ومنهم مايسكبه من زجاجات كبيرة ومنهم مايسكبه من اكياس بلاستيكية مصقولة سوداء اللون اما تلك السيدات فليس عليهن سوى الثقليب الجيد المستمر ووضع بعض النقاط من زجاجات اخرى من المعدن المصقول موضوعة بجانبهن بالارض يبدو انها زجاجات لزيوت عطرية، كما توجد فتاتان اخريتان تجلسن الى منضدة كبيرة بجانب الحجره الآخر حيث يقوموا بتعبئة الاوعية الباردة بزجاجات بلاستيكية ملصق عليها اوراق مطبوع عليها علامات الماركات العالمية المشهورة زائد فتاة اخرى بجانبها تقوم بجمع كل ثلاث زجاجات مختلفة الماركات والانواع معا وتلف حولهم ورق لاصق شفاف ثم تضعها جانبا.....

راضى الله يخریبوتکوا... غش على مية مية والناس تصدق
وتشترى اتاريك ياابو النجا منتجاتك ارخص منتجات فى
مصر.... انا برضك ماكتش مرتحالك.... تعالى يافتحى
شوف وكر العصابة الى محتلة شفتك...

مشهد (80) نهار - داخلي

حجرة المدير المسئول

- وهج تقف امام مكتب الرجل المسئول بالشقة وكان يتحدث بالموبايل.....
- الرجل لا اتضمن سيادتكم.... عموما نسبة المبيعات هائلة ،
دى حاجة ماكُنْاش نحلّموا بيها..... خلاص.. ماشى..
مع السلامة... (يلتفت لوهج).... افندم... العامل بلغنى
انك عايزة تشتغلى، انتى عارفة احنا بنشتغل ايه هنا
(بثقة) طبعا يافندم... وعلى فكرة انا كنت بنشتغل مندوبة
لشركة ادوية كبيرة وكنت بادخلهم مكاسب بالهبل بس
الى يقدر ولما عرفت انكوا طالبين وبمرتب ثابت جيت
علطول..... انا أطول لما اشتغل فى شركة ابوالنجا اكبر
شركة استيراد مستحضرات تجميل فى مصر.....
- الرجل يتعجب من اطرائها واعجابها الشديد وشكرها بهم...
- الرجل طب وانتى مؤهلك ايه؟
(يتردد) [..!..!..! خدمة اجتماعية....
- الرجل حلو اوى.. ده المطلوب.. عايزين بقى لبافتك واسلوبك
المقنع الجميل ده فى الكلام للزبون عشان يمد ايده فى
جيبه ويطلع الفلوس ويشترى منتجاتنا...
- وهج طب لوسمحت حضرتك حاوزع فين
الرجل مافيش اماكن معينة كل اللى عليكى تشيلى شنطة فيها
منتجاتنا واى بيت اى شقة اى محل يقابلك اعرضى عليه
منتجاتنا وشوية من الكلام الحلو ده الزبون حيشترى
علطول وهو مغضض

وهج والكمية اللي فى الشنطة....
الرجل مغلش هي حيتبقى ثقيلة فى الاول لكن بعد كده انتسى
وشطارتك ياتخليها تخف بسرعة يااستحملى شيلها بقى ،
ده غير بقى انك تحاولى بقدر الامكان انك تطلّعى من كل
زبون بأى ازايىز او علب فاضية لأى منتج استعملوه
وتعرفيهم ان فيه سحب وجوايز
(بغيط غير واضح) اتفقنا... أقدر استلم امتى
الرجل دلوقتى لو حبيبتى... سعد... ياسعد
يدخل سعد العامل...

سعد ايوة يابيه....
الرجل إدّى الانسة شنطة... حتبداً الشغل معانا من النهاردة
سعد حاضر يابيه... اتفضلى معايا...

مشهد (81) نهار - داخلى

شفقة راضى

وهج مع راضى ورانيا يجلسون جميعا حيث تُخرج مابداخل
الحقيبة وتضعه على الترابيزة امامهم.....
وهج شفتوا النصب....
راضى انا مش قادر اصدق اللى شففته تحت
رانيا انا مش مصدقة ان فيه ناس أد كده ضميرها ميت
راضى فيه يارانيا فيه... آدى ابو النجا اللى اعلانات شركته
مغرفة الدنيا..... والناس من طبيبتها بتشتري عطلول
طبعا ماهى فرصة ، حد يلاقى حاجات مستوردة زى دى
وبالملايم دى ويرفض

وهج وبرغم الحياة اللي بتغلا كل يوم فى زمانكوا إلا ان
الحاجات دى رخيصة جدا.... ازاي الناس ماشكتش فيها
راضى ممكن أوى الناس تكون حاسة وشاكة ويمكن عارفة بس
عايزة تصدق وخلص عشان يبقى اسمها بتستعمل
الماركات المستوردة

رانيا اومال خير ايه ومشاريع خير ايه اللي عمال يعملها دى
وموايد رحمن كل سنة وكام ملجأ ماسكه يفطره طول
رمضان معقول ده واحد يعرف ربنا ده

راضى ماهو الخير فى بلدنا كتير بيسرقوه وينهبوه الصبح
ويعملوا بيه خير بالليل

وهج المواد والخامات المصنوع بيها المستحضرات دى خطر
جدا ع الصحة والبشرة والشعر لأنها بتتخط بنسب مش
محسوبة دى كده تجيب امراض خطيرة

راضى انتى مش دارسة تاريخ واجتماع ايشعرفك بالكيميا

وهج عندنا مافيش حاجة اسمها ادرس منهج معين يؤهلنى
للشغل او العمل لازم كل فرد عندنا يدرس كل شئ وكل
حاجة عشان يكون ملم بكل حاجة من حواليه مايققاش
عامل زى الاطرش فى الزفة... وبعد كده انت تزود
وتنقل دراستك فى المجال اللي تحبه وتختار تشتغل فيه
من غير اكراه او اجبار

رانيا ليه؟ مافيش امتحانات ودرجات ومجموع

وهج لأ فيه طبعا امتحانات ودرجات ومجموع بس مافيش غش
مافيش حاجة اسمها مجموعك حيدلك هنا بالعافية.. فيه
مراقبة جامدة طول الامتحان من خلال اجهزة المراقبة

الموجية، واللى مش حابب الدراسة بتأعته يشوف غيرها
الاقرب لنفسه لحد مايوصل للى عايزه

ده كده عمره ماحيشتغل وحيسوق فيها ويفضل يدرس
راضى طالما على حساب الدولة

مين قالك... طالما الفرد وصل 17 سنة لازم لازم يشتغل
وهج والدولة مسئولة توفله شغل وتشوفه ممكن يدى فى ايه
احسن انتاج للبلد وبالتالي مافيش حاجة اسمها عاطل
مايشتغلش عشان كمان يبعد عن مخه اى افكار شاذة
ممكن تدمر نفسه او البلد

ياسلام... حاسة ان الحياة عندكوا هادية ومنظمة جدا
رائيا
وهج هى كده فعلا.....

مشهد (82) نهار - خارجى

امام محل راضى

راضى وسيد يجلسان امام المحل حيث ان راضى يتابع العمال
وهم يقومون بتركين الرفوف والدواليب....

راضى معقول... معقول كل ده يطلع من اللوا هاشم وينتأه
الرقيقة دى

سيد استصنفت بقى... من برة هلا هلا ومن جوة يعلم الله

راضى عندك حق والله... لكن انت عرفت منين اللى حصل ده

سيد اصلى كُت مستنعد فى المطبخ عندهم باستغدى فاستمعت

كل حاجة.... راجل واصل وقادر خلى الجدع استطلقها

بالعافية واستكتبه شيكات بألوفات... آى والله... واستأخذ

منه الشقة وكل ده عشان خاطر البرنسيمة استشاورت
واستأمرت

راضى

ايووه ياساتر على قلوب الناس وطمعها
والجدع ياعينى مستطيب ومستغلبان وابن ناس
مايستتاهلشى اللى عملوه فيه.... لأ وايه استحلف بعد
مااستمشى من عندهم انه حيتوصى عليه فى شغله
يستصلوه، استثقت القدرة....

سيد

والله حرام عليهم كده.. ده مايرضيش ربنا ابدأ ايه مش
خافين من ربنا خالص

راضى

ببنى وبينك هاشم ده مستطلع بنته برضك ع الآخر.... كل
مستطلباتها اوامر مااستقترش النعمة اللى كات فيها....
والنبي الكابتن كريم ده من خيرة الشباب والله

سيد

تصدق زعلتنى، اصله فعلا ذوق وكريم جدا تلاقيها هى
اللى جننته استقوا عليه ولاد المفتريين، ده ربنا مش

راضى

حيسيبهم

عشان لما نستقولوك خينا فى ضلهم نكسبوا؛ كويس ان
حمدى اخوك استعرف يستثبت نفسه عندهم..... هم دول
سندنا وضرنا فى البلد اللى مايعلم بيها الا ربنا فى الزمن
المهيب اللى احنا فيه ده....

سيد

راضى يهز رأسه بأنه قد اقتنع بوجهة نظر سيد اخيرا.....

مشهد (83) ليل - داخلي

شقة فتحى بكليوباترا

فتحى يمسك بالموبايل على اذنه حيث يتحدث فيه باهتمام شديد
وقلق وهنا يقوم فجأة مفزوعا من مكانه....
فتحى ايه... يتقول ايه ياراضى.....
معقول الكلام ده.....
كل ده بيحصل فى شقتى وانا مش دريان.....
تخرج جلييلة زوجة فتحى مفزوعة هى الاخرى على صوت زوجها.....
جلييلة فيه ايه يا فتحى... مالها الشقة...
فتحى يشير اليها بضيق بأن تنتظر اما هى فتقف بجانبه كى تحاول سماع
او فهم مايدور بالمكالمة.....
فتحى انا دلوقتى فهمت ولاد الابالسة بيعبوا الازايز اللى بيلموها
من الزبالة ويدوها للناس تانى اتقوو عليهم وقعتهم سودة
انا جاى معاك للبوليس من النجمة....

مشهد (84) نهار - داخلي

شقة فتحى بالكارة

جميع العاملين بالشقة كما هم يقومون بعملهم كالعادة.....
فجأة بطرق الباب فيأتى سعد العامل كى يفتح.....
يدخل افراد الشرطة بسرعة فيجرى سعد مهرولا الى مكتب المدير.....
سعد الحق يابيه... الحق يابيه بوليس
هنا يدخل كل من فتحى وراضى ووهج.....
يخرج المدير من الداخل....

- المدير فيه ايه حضراتكوا....
- الضابط فيه امر بتفتيش الشقة....
- المدير ليه بس احنا عملنا ايه.... ومين جابكوا
- الضابط (بحدة) انت حتحقق معنا ولا ايه...
- المدير ابدا . ابدا يافندم والله بس ممكن يكون فيه سوء فهم
- الضابط صاحب الشقة اللي بلغ انكوا بتديروها فى صناعات خطر على صحة السكان
- المدير ابدا والله يافندم دى كلها مطابقة المواصفات القياسية المصرية
- راضى (بسخرية) آه طالما مواصفات مصرية تبقى عكّ وليس كله كويس مش كده
- أمين الشرطة يأتى من الداخل بعد جولة فيها ويبيده بعض الاكياس ومن خلفه عسكرى يحمل صندوقا من الكارتون به بعض الزجاجات الداكنة اللون.....
- الامين لاقينا الحاجات دى جوة وغيرها ع النار شغالين بيه
- الضابط اجمعها كلها وهاتها وهاتوا كل اللي فى الشقة.....
- (ينظر الضابط للمدير)....
- وانت صاحب المصنع المخالف ده.....
- المدير (بقلق) لا يابيه...لأ... الشقة دى متأجرة باسم شركة أبو النجا، انا ماليش دعوة خالص بأى حاجة انا مجرد مدير مسئول عنها
- الضابط مش شغلى ابقى قول اللي انت عايزه فى النيابة...
- المدير يلطم ويصرخ....
- المدير نيابة هى وصلت للنيابة....

الله يخربيتك يا ابو النجا وديتتى فى داهية

الشرطة تخرج ومعها كل من بالشقة.....

فتحي ياللا يازباله يارمم... تضحكوا عليا ب150 جنيهه فى

الشهر عشان تقبلوا الشقة مزبلة يا حرامية البلد....

راضى الحمد لله اخيرا حترجع تانى بيتك يا فتحي وتنوره وتنور

الحارة وتبقى معايا؛ خلاص يالة الافتتاح كمان اسبوع ان

شاء الله...

مشهد (85) ليل - داخلى

حجرة رانيا

رانيا بحجرتها مع وهج بعد ان عادت من فرح صديقاتها حيث

انها سعيدة ومسرورة جدا وذلك بعد ان بدلت ملابسها فى التو....

رانيا مش قادرة اقولك انا مبسوطه اد ايه.... الطقم اللى عملته

لايمان كل المعازيم اتهيلوا عليه وافتكروها جايباه

من صايغ

وهج ده خبر حلو اوى... وعرفوا ان انتى اللى مصمماه

وعملاه...

رانيا طبعا.... ايمان قالتهم... وعلى آخر الفرع كانت ثلاث

ترباع ستات وبنات الفرع اتفقوا معايا انى اعملهم إشي

عقاد وإشى كوليهات واساور وحلقان ماباقيتش ملاحقة

ع الطلبات....

وهج شفتى فكرتى نفعتك ازاي وآهى جابتلك شغل كمان بعد

ماكنتى قاعدة فى البيت من غير شغل متضايقة

رائيا ابوة بس خايفة يكون كلام فى الهوا ومحدث يطلب منى
اعمله حاجة ويكون حلم وخلص
وهج لا... انا متأكدة ان حتى لو محدش طلب حاجة تعملها
اليومين دول يبقى بعدين شغلك عمرهم ماينسوه
وحيجوا ومعاهم زباين كمان ، المهم تكونى مستعدة
رائيا يارب... يارب ياوهج يارب
وهج ايه تشتغلى الاول فى البيت وشوية شوية تكبرى ويبقى
عندك اتيليه لتصميم وتصنيع الاكسسوارات وتبقى سيدة
اعمال ويرزقك ربنا بابن الحلال ان شاء الله
رائيا أهد ده اللى بعيد عن انه يكون حلم....
وهج اوعى تقولى كده زى مالى انتى فيه دلوقتى عمرك
مافكرتى فيه يبقى الخطوة الثانية ان شاء الله العريس
ولازم تعرفى ان كل شئ قسمة ونصيب وبتاع ربنا
تتظر رائيا اليها حيث انها قد اقتنعت بكلامها ويبدو على وجهها
الارتياح.....

مشهد (86) نهار - خارجى

جليم على البحر

وهج تجلس مع راضى على سور البحر بمنطقة جليم.....
وهج خلاص هانت وقربت اخلص الرسالة وكلها كام يوم
وارجع زمنى
راضى (بحزن) ماتفكرنيش..... انا قصدى ان احنا اتعودنا على
وجودك معنا وأكنك واحدة منا

وهج (تبتسم) بس انت لازم تتعامل مع الحقيقة والواقع ولازم

تهياً نفسك من دلوقتي على انى مش موجودة لحد ما.....

راضى (يقاطعها) لا الله يخليكى اوعك تقولى امتى بالظبط ماشية

عشان ماكرهش اليوم ده قبل ماييجى

وهج كل حاجة فى أولها صعبة وبعد كده بتخف وتهدا مع الايام

راضى طب ماينفعش آجى معاكوا زمانكوا؛ العصر اللي عايش

فيه ده انا مش عايزه خلينى اعيش فى عصركوا اللي

مليان خير وحب وضمير واخلاص

وهج زمناك محتاجك ومحتاج اللي زيك ببحبوا البلد ويخافوا

عليها عشان يغيروها للاحسن وتوصل بيكوا للى باقيناه فيه

2100..... وبعدين مين قالك ان زماننا مافهوش مجرمين

وخارجين عن القانون لأ فيه... فى كل زمان ومكان فيه

الخير والشر لكن الفرق هو الكم او النسبة يعنى عندكوا

واضحة وكثيرة عشان مافيش قوانين صارمة توقف

الغلطان عند حده وفيه كوسة زى مايتقولوا لكن عندنا

قليلة لان الدولة متابعة ومهتمة بكل فرد فيها

راضى يعنى برغم كل التقدم اللي انتوا فيه ده ومش عارفين

تخلوا الواحد يختار الزمن اللي عايز يعيش فيه

وهج ياريت ياراضى ؛ لكن مين عارف يمكن الجيل اللي بعدنا

يقدر يوصل لده لأن زى مانت عارف ممكن تتوه بسين

العصور لآخر عمرك.... عموما انا كمان حبيتكوا اوى

واتعودت عليكموا وحافتكوا جدا

ياريتك كُتّى فى زماننا....

راضى

وهج اشمعنى.....

راضى كُت اتجوزتك علطول....
وهج مرة واحدة كده...
راضى اومال على 5 مرات.... (تضحك).....
وهج بكرة تلاقى اللي احسن منى الف مرة وتسيك وهج
راضى انا لايمكن انساكى.... المهم هو احساسك بيا يكون زى
احساسى بيبكى (وهج تنظر اليه بخجل).... مابترديش
ليه.... ربحينى وقولى لى ان احساسنا واحد
وهج تبتسم بمعنى انها تتفق معه فى احساسها به.....
يبتهج راضى....
راضى ابوة كده ياشيخة فرحينى.....

مشهد (87) نهار - خارجى

ارض فضاء بالكينج مريوط

وعند ارض فضاء خالية من المباني تقف سيارة نانا التى يقودها
حمدى اخو راضى ثم ينزل منها نانا وحمدى ومن جانبه المهندس المدنى
المسئول عن تنفيذ المشروع الذى ستقيمه نانا على تلك الارض.....
يتوغل الجميع الى داخل الارض قليلا مبتعدين عن مكان السيارة.....
نانا هى دى الارض ياباشمهندس ومساحتها مناسبة لمشروع
القرية اللى درسناه
المهندس وحضرتك عايزانا نبدأوا فى خلال اد ايه
نانا من النهاردة لو تقدر... كل اوراقها وترخيصها خالصة
وجاهزة ع التنفيذ... انا عايزاها تبدأ تشتغل على اول
الصيف الجاى بالكثير وياريت لو قبل كده كمان

المهندس بس كده.... بسيطة جدا... خلاص الرسومات والتصاميم
 تكون عند حضرتك قبل آخر الشهر

نانا تمام كده... شد حيلك معانا وورينا همتك ياباشمهندس....
 المشروع ده مهم جدا بالنسبة لى

المهندس طب اسمحى لى اتمشى فى الارض شوية
 نانا اتفضل....

يبعد المهندس عنهما كى يشاهد الارض عن كثب.....

حمدى لامواخذة يعنى يامدام نانا... هى الارض دى حتتعمل
 عليها قرية لإيه

نانا حنعملوها قرية سياحية ع الطراز الريفى وحنفقوا مع كام
 شركة سياحية مهمة فى اسكندرية والقاهرة عشان بيعتولنا
 افواج سياحية

حمدى دى فكرة ممتازة يامدام... تعرفى ان 90% من السياح
 بيبجوا مصر مخصوص عشان يشوفوا الريف المصرى
 فى المرتبة الثانية بعد الآثار الفرعونية عطول

نانا (باهتمام) فعلا يا حمدى تعرف ان المعلومة دى انا لسة
 عارفاها قريب لما كنت بادرس المشروع؛ انت خريج ايه
 يا حمدى

حمدى معهد السياحة والفنادق....

نانا معقول!!! شوف بقالك كام اسبوع معايا ومعرفش.. على
 كده رأيك حيبقى مهم معايا فى المشروع ده.... وبعد
 ماينتهى ان شاء الله حاعينك المشرف العام على النشاط
 السياحى فى القرية

يبتهج حمدى جدا ويفرح وكأنه لم يصدق ماسمعه.....

حمدى بجد... بجد يامدام ناننا... انا مش عارف اشكر حضرتك
 ازاي.....أخيرا حلم حياتى حيتحقق وحاشتغل فى نفس
 مجال دراستى
 ناننا كده... طب الحمد لله ان انا السبب فى تحقيقه.... اللى
 يصبر لازم ينول وكله بوقته....

مشهد (88) ليل - داخلى

شغقت راضى

رانيا تجلس الى المنضدة بالصالة وامامها اشكالا والوانا من
 الاحجار الزجاجية والبلاستيكية والخشبية والخرز وايضا اشكالا والوانا
 متنوعة من الخيوط.....

ام راضى تقترب تقترب منها وهى تستند على عصا حيث انها قد حلت
 الجبس ولا تزال بفترة النقاهة....

رانيا (نفاجاً) ايه اللى قومك من السرير ياماما..

أم راضى زهقت يارانيا من الرقدة قلت اتمشى شوية زى مالدكتور
 طلب منى

رانيا أبوة ياماما قال لك 10 دقائق مرتين فى اليوم... لكن انتى
 من ساعة مافكتيها اول امبارح وانتى بتجهدىها مش كده
 احنا ماصدقنا انها خفت

وهج تأتى من الداخل حيث تحمل صينية بها بعض الساندويتشات وثلاث
 اكواب من الشاى باللبن...

وهج رانيا عندها حق ياطنط لازم ترتاحى....
 أم راضى تجلس الى المنضدة بجانبها.....

أُم راضى يا حبيبتي انتوا صعبانين عليا من ساعة ما تجبست وانتوا
الاتنين شايلين البيت كله من تنضيف وتوضيب وطبخ
وكل ده فوق شغلوكوا اللي المفروض يكون هو اللي واخذ
كل وقتكوا....

رائيا ولايهمك ياست الحبايب....

وهج محدش فينا حاسس بتعب عشان ايدينا بايدين بعض....
عندنا كده لازم كل واحد يساعد التاني باللى يقدر عليه
ما فيش حاجة اسمها كل واحد مسئول عن نفسه وبس
ومالوش دعوة بالتاني

أُم راضى (بتعجب) عندكوا فين يا حبيبتي....

رائيا (تتنحج) قصدها فى البلد اللي كات فيها

أُم راضى آآه... ع العموم ربنا يخليكوا ليا..... وينجحك ويرزقك

يا وهج بالخير كله لولا افكارك ما كانتش رائيا اشتغلت

وبقالها دخل الله اكبر فى عينيا الطالبات مش ملاحقة

عليها... يديكى كل الخير انشاالله..... حلقطعى بينا

والنبي ، ياريتك تفضلى معانا علطول

وهج (بتأثر) انا كمان حبيتكوا اوى والله ونفسى افضل معاكوا

برضه علطول لكن انا كمان ليا اهلى وناسى اللي

وحشونى ووحشتهم...

أُم راضى طب ماتتسيناش وابقى طلى علينا من وقت للتانى.....

وهج ورائيا تنظران لبعضهما بتأثر....

وهج ان شاء الله ياطنط... ان شاء الله...

مشهد (89) نهار - داخلي

مكتب الضابط وليد

وليد يجلس الى مكتبه ويجرى بعض المكالمات التليفونية.....

وليد ايوة... وصلتوا لإيه.....

معقول..... ولا اى معلومة ولو صغيرة عنها....

هنا يدخل ممدوح ويبدء ملف يضعه على المكتب امام وليد..... وليد يشير اليه بأن يجلس.....

وليد طب وقف التحريات شوية واستنى منى او امر جديدة....

ثم يغلق سماعة التليفون يلتفت الى ممدوح....

وليد ايه الاخبار.... ايه الملف ده....

ممدوح انا خلاص جالى شلل رعاش من كثر اللف والتدوير عن

اى معلومة ولو هاففة عن اللي اسمها وهج دى ومالهش

اى اثر فى اى ملف فى البلد لاسجلات نسب او قيد

ولاشهادة ميلاد ولافى السفارات او مكاتب السفرات

ولا المطارات حتى ... مافيش اى حاجة تثبت وجودها

فى الحياة اصلا.... انا قربت اتجنن

وليد برضه لسة مبلغنى ع التليفون نفس اللي قولته حالا

دلوقتى

ممدوح طب والعمل.... تفكر نقبضوا عليها ونعتقلوها ونعذبوها

لحد ماتعترف

وليد لأ... لأ... استنى شوية لسة فيه خطوة كمان وبعدها

حتحركوا عطول

ممدوح ايه هى؟

وليد نسالوا فى نيكاراجوا نفسها عنها.....

مشهد (90) نهار - داخلي

حجرة مكتبة الزمن

باهر وعطا يراقبان وهج من خلال شاشة المكتبة.....

هنا يلتفت عطا الى باهر.....

عطا كده خلاص وهج تقريبا خلصت رسالتها وباضوبك لازم

نبدأوا نتحركوا حالا....

باهر ده لسة ادامها حوالى 3 ايام وترجع

عطا يبقى ده ادعى اننا نفكروا بسرعة فى مشكلة نوقعوها فيها

النهاردة او بكرة بالكثير ماتخرجش منها الا بعد الثلاث

ايام وبكده يفوتها معاد الرجوع وتتوه

باهر طب وجانتك الفكرة وللا لسة....

عطا يعنى ... هو فيه فكرة كده بقالها يومين بتتحببك فى

دماغى ادينى شوية وقت وع العصر حاقولهاك

مشهد (91) نهار - داخلي

حجرة مكتب مقبل

مقبل بحجرة مكتبه يهب واقفا من امام شاشة جهاز المراقبة بمدينة

العلماء حيث يبدو على وجهه الارتعاب والقلق الشديدين.....

مقبل المجرمين... معقول يوصل بيهم الشر للدرجة دى.....

يفكروا ازاي يتخلصوا من وهج عشان يستولوا

على رسالتها

يلف ويدور بالحجرة وحول نفسه يفكر بتوتر وخوف.....

اعمل ايه دلوقتى.... اعمل ايه؛ دول خلاص نوا يودوها
 فى داهية فى الزمن اللى هي فيه
 يتوقف فجأة ثم يكشف عن الاسورة المعدنية التى بمعصمه.....
 مافيش غير انى ابعثها اشارات موجية ، بس يارب تفهم
 منها قصدى.....
 وهنا يضغط على بعض الازار بالاسورة وبعض الازرار بجهاز صغير
 موجود على مكتبه مع مراقبة الاثنين معا بشغف واهتمام وكأنه ينتظر
 نتيجة فى الحال.....

مشهد (92) نهار - خارجى

كافيت بسان ستيفانو

راضى ووهج يجلسان بالكافيه المطل على البحر ويحتسيان
 النسكافيه....

راضى معقول ماعندكوش قهاوى.....
 ووهج لأ طبعا... الكلام ده ممنوع والدولة منعتة لأنها بتسبب
 كسل ومضيق للوقت اللى ممكن يدوا فيه للدولة حقها

راضى اومال لما تحبوا ترتاحوا... ترتاحوا فين
 ووهج راحتك فى بيتك بعد الشغل.... اما اماكن للمة والقعدة ففيه
 مطاعم ونوادى طبعا مفتوحة فى الاجازات وبعد مواعيد
 العمل الرسمية

راضى يعنى مانشربوش حاجة نعدلوا بيها دماغنا حتى وقت
 الشغل.

وهج لا طبعاً فيه مَكَن في كل حنة وكل مكان يديك مشروبات
سخنة وباردة تأخذها تشربها وانت بتشتغل عادى
هنا الاسورة بيدها ترسل ذبذبات خفيفة فسرعان ماتتظر لها....
راضى مالك فيه ايه....
تتغير ملامح وهج للقلق.....
راضى مالك يا وهج شكلك مخضوض....
وهج جاياالى اشارات تنبيهية من البروفيسور مقبل
راضى طب ودى حاجة تخوف....
وهج طالما اشارات تنبيهية ببقى فيه حاجة غلط
راضى وحتعرفى الغلط ده ازاي....
وهج مش مهم اعرف هو ايه بالظبط.... المهم انى فى اسرع
وقت اخلص رسالتى
راضى انتى مش لسة ادامك حوالى 3 تيام على نهاية المدة
وهج ابوة... بس واضح ان فيه حاجة غلط....
ياللا بينا بسرعة ع البيت.....
يقومان معا من مكانهما.....

مشهد (93) نهار - خارجى

أكارة

عطا يظهر بالحارة وهو متخفى فى صورة صبى لصاحب محل
بطريقة متقنة وبتقنية عالية الجودة ليست معروفة بزماننا هذا
عطا يحمل حقيبة فضية اللون صغيرة الحجم ويتوجه ناحية منزل
راضى ثم يدخل المنزل.....

مشهد (94) نهار - داخلي

امام شقت راضى من الخارج

عطا يرن جرس باب الشقة....

ثوانى وتفتح ام راضى الباب.....

عطا صباح الخير يا حاجة....

أم راضى صباح النور يا ابنى.....

عطا الدكتور وهج موجودة....

أم راضى أيوه يا ابنى استنى اندهالك.....

تلتف للداخل....

وهج.... يا وهج....

صوت وهج أيوه يا طنط.....

أم راضى واحد بيسأل عليكى يا بنتى....

تأتى وهج ثم تنظر الى عطا باستغراب حيث انها لأول مرة تراه ولم

تعرفه من قبل.....

وهج افندم.. اى خدمة....

عطا يمد يده بالحقيبة.....

عطا انتفضلى يا دكتورة.....

وقبل ان تمسكها وهج....

وهج ايه الشنطة دى....

عطا الشنطة دى بعثتها معايا الباشمهندس راضى وقال لى

تسلمها للدكتورة وهج عندى فى البيت فى ايديها لأن فيها

حاجات مهمة اوى عشان رسالة سيادتك....

وهج حاجات!! حاجات ايه!!؟

عطا هو الحقيقة ما قاله بس قال لى أكّد عليكى تستنيه لما
يرجع هو مش حيتأخر

وهج تأخذ الحقيقة.....

وهج اومال انت تبقى مين بقى.....

عطا انا مساعد الباشمهندس راضى فى المحل ما هو اصل
الافتتاح بكرة يادكتورة

هنا بيدو على وجهها الارتياح لكلامه وقد اطمأنت اليه ثم اخذت
الحقيقة.....

وهج ايوه... ايوه... مانا عارفة.... ع العموم شكرا.....

تغلق الباب.....

عطا يلتفت للخلف وهو ينظر نظرة انتصار.....

مشهد (95) - نهار - داخلى

مكتب الضابط وليد

وليد وممدوح يجلسان معا بحجرة المكتب.....

ممدوح خلاص الحمد لله خلصنا من قضية الواد حدّقْ بّاع
الميناء ومشاكله وقرّفه.....

وليد أيوه والله أهه اخد 7 سنين.... ده انا.....

يطرق الباب ويدخل العسكرى....

العسكرى فيه واحد برة بيقول عنده معلومات مهمة عن واحدة
اسمها وهج نبع الحياة

وليد وممدوح يهبوا واقفين.....

وليد دخله بسرعة.....

يخرج العسكرى ويدخل باهر.....

باهر مساء الخير يا حاضرة الطباط....

وليد أهلا اتفضل....

باهر شكرا يا فندم... انا اسمى باهر علوان وساكن فى الحارة

من سنين والحقيقة من ساعة مَادَخَلت علينا اللى اسمها

وهج دى وأنا ما ارتحتلهاش واللى حظيته فى اعتبارى

حصل

ممدوح مَادَخَل فى الموضوع علطول يا جدد انت

وليد استنى بس يا كابتن ممدوح اما نشوفوا عايز يقول ايه

ممدوح يسكت على مضض...

باهر باختصار يا فندم، الواد ابن اخويا عرف انها مش باحثة

ولا حاجة وانها بتروج افلام سى ديهات وفلاشات

كمبيوتر عليها افلام بتتكلم عن الحرية والديمقراطية

السليمة فى الحياة وبتشجع الناس على انهم يقوموا بثورة

وانقلاب ضد نظام الحكم والحكومة

وليد شفت يا ممدوح باشا.. شفت انا برضه مش مرتاحلها من

الاول وحاسس ان وراها سر

ممدوح وعرفت ده منين... انت شفت الافلام دى

باهر لا يا فندم الواد ابن اخويا شاف فيلم منهم عند صاحبه فجـه

قال لى ، ده غير ان الصبح شفت واحد طالع البيت عندهم

وبيسأل عنها ومعاها شنطة فضى صغيرة

ممدوح يعنى هو ده اللى خلاك تيجى تبلغ كده أوام

باهر ابوة طبعاً يا فندم... ده فيه حاجة كمان بتقولها لستات

الحنة....

وليد (باهتمام) هي ايه دى....
 باهر انها جاية من زمن تانى غير ده بعثها ربنا بمعجزة عشان
 تصلح البلد من الفساد اللي فيه
 وليد وممدوح ينظران لبعضهما
 وليد ممدوح بيه اوامرلنا يطلعوا إذن نيابة بالقبض ع اللي
 اسمها وهج دى.....
 ممدوح يخرج.....
 ينظر لباهر مكملًا.....
 وليد وانت حتيجي معانا الحارة عشان تورينا اللي قولت
 عليه.....
 باهر ببعض الحذر.....
 باهر طبعاً يافندم تحت امرك طب حنروحو بعد كده بابيه.....
 وليد ان شاء الله ياللا بينا.....

مشهد (96) نهار - داخلى

شغقت راضى

وهج تجلس بالصالة الى المنضدة وهى تفتح الحقيبة الفضية فتجد
 بداخلها بعض السى ديهات وفلاشات كمبيوتر فتأخذ بالتقليب بها ثم تحاول
 الاتصال براضى ولكن التليفون غير متاح.....
 رانيا تأتى.....
 رانيا لسة موبايل راضى مش متاح
 وهج ايوه... مانتصوريش أنا عندي فضول أد ايه اشوف فيها
 ايه الحاجات دى

رائيا ماتستعجلىش ؛ طالما راضى بعثها وقال انه جاى ببقى
مش حيثأخر

جرس الباب یرن.....

رائيا تتقدم مسرعة نحو الباب.....

رائيا أهه راضى جه أهه.....

تفتح الباب فتجد امامها رجلا عجوزا بشدة حيث انه مقبل متكرر
فى زيه.....

رائيا ابوه ياأحاج عايز مين.....

ينظر بالداخل فيجد وهج امام الحقيبة المفتوحة فيدخل مهرولا بسرعة
ناحية وهج.....

رائيا ايه ياأحاج ده... مين حضرتك....

هيئتلك مش ماشية مع سنك وصحتك ابدا

مقبل وهج ... الحمد لله انى لحقتك....

وهج تتظر اليه بتعجب.....

مقبل يخلع اللحية البيضاء والنظارة ذات العدسات سمكة الزجاج ويفك
بعض التجاويد المصقة على وجهه...

وهج بروفيسور مقبل....

رائيا انتى تعرفيه.....

وهج ده البرو.....

مقبل انتى لسة حتشرحى مافيش وقت....

وهج (بقلق) فيه ايه قلقتنى.....

مقبل باهر وعطا هنا فى نفس الزمن وعاملين لك فخ - مصيبة

عشان تقعى فيها وماتعرفيش ترجعى زمنك تانى ابدا

وتتوهى جوة المكتبة

وهج (بانزعاج) معقول... طب وانا عملتلهم ايه....
مقبل مش وقته دى حكاية طويلة... المهم تعرفى انهم عايزين
يئذوكى وخلص عشان يستولوا على رسالتك
انا !!!
وهج فيه ايه ياوهج انا مش فاهمة حاجة.....
رانيا اللى انتى سمعتيه... انا كان المفروض امشى بعد 48
وهج ساعة بس انا مضطرة امشى حالا فيه ناس مش عايزانى
ارجع زمنى تانى
مقبل ده باهر راح بلغ البوليس عنك وفهمهم ان معاكى شنطة
فيها افلام ضد نظام الحكم والدولة.....
رانيا ايه...!! ده لمسة.....
مقبل ايوه... ايوه... انا عارف كل حاجة.. هاتى الشنطة
بسرعة معاكى وبالا بينا من هنا بسرعة قبل ماييجى
البوليس ويقبض عليكى
هنا رانيا تبكى
رانيا لأ ياوهج مش بالطريقة والسرعة دى تمشى كده ده
راضى حيزعل اوى انه مش حيسلم عليكى
وهج عيناها تدمع فتحتضنها وتقبلها.....
وهج كنت اتمنى افضل معاكوا لآخر وقت بس اديكى سمعتى
اللى حصل.... سلمى لى على طنط وحمدى...و....
وراضى طبعا كتير جدا وقولى له انى عمرى ما حانساها
وعمرى ما حبيت حد غيره وانى بادعيه من كل قلبى ربنا
يوقفه ويوصل للى يتمناه وشجعوه دايمًا انه مايسكتش
عن حقه مهما كان طالما صاحب حق

مشهد (97) نهار - خارجى

الحارة

عطا ينتظر باهر على مدخل الحارة حيث انه قد عاد الى هينته الطبيعية مرة اخرى....
تأتى عربات الشرطة بصوت انذارها المدوى ثم تقف على اول الحارة.... ينزل وليد وباهر فيقترب عطا منهما مسرعا....

مشهد (98) نهار - داخلى

شقة راضى

مقبل ووهج ورائيا يسمعون اصوات انذار سيارات الشرطة.....
مقبل ياللا مش وقته البوليس وصل
رائيا طيب تعالوا بسرعة...
تجرى نحو باب الشقة ومعها وهج ومقبل ثم تفتح الباب....
رائيا تطلعون من هنا ع السطوح وتعدوا لسطوح بيت فتحى اللى
جمبنا انتى عارفاه ياوهج....
وهج ايوه ... ايوه ...
رائيا وبعدها تنزلوا من بيت فتحى ع الحارة اللى ورائنا.....
رائيا تطل برأسها من الباب....
ياللا بسرعة قبل ما حد يشوفكوا....
مقبل هاتى الشنطة ياوهج....
ياخذ منها الحقيبة ويخرجها من باب الشقة.....
رائيا تغلق الباب بسرعة وبهدوء....

مشهد (99) نهار - خارجى

فوق سطح المنزل

وهج ومقبل فوق سطح منزل راضى يسيران منخفضى الرؤوس
كى لا يراهما احد حتى يقتربا من سطح منزل فتحى فيقفا قليلا كى يعبرا
المسافة الصغيرة وهى مسافة نراع تقريبا بين سطوحى المنزلين ومن ثم
ينزلا منه الى الحارة الخلفية.....

مشهد (100) نهار - خارجى

أكارة الخلفيت

وهج ومقبل يخرجان من منزل فتحى الى الحارة الخلفية متجهين
خارجها ولكن يقف مقبل فجأة.....

مقبل استتى.....

وهج فيه ايه يابروفيسور.....

مقبل لازم تغيرى برمجة المكتبة وتخليها تنتهى فى خلال

3 ساعات بدل 48 ساعة

وهج ازاي يابروفيسور.. طب وباهر وعطا...

مقبل مالهم.....

وهج كده حنسيبوهم وتخلص البرمجة كمان 3 ساعات ومش

حيكونوا لحقوا يرجعوا وكده حيتوها فى المكتبة

مقبل انتى غريبة... كان زمانك انتى اللى تايهة فيها بسببهم

وهج معلش خلىنا نسامحهم المرة دى....

مقبل لأ.. مافيش سماح ، هو ده اللى يستحقوه مقابل خيانتهم

ليكى وليا ولمدينة العلما كلها ؛ ولو حتى رجعوا معانا

حيبقى عقابهم السجن مدى الحياة فخليهم تايهين احسن.....
 ياللا بسرعة اسمعى اللى باقولك عليه ونفذه مافيش
 وقت..... دقايق وحتلاقيهم محاصرين الحارة ومش بعيد
 تلاقيهم فوق دماغنا.....
 وهج تكشف عن الاسورة المعدنية التى بمعصمها ثم تضغط على بعض
 الازرار لإعادة البرمجة ثانية.....

مشهد (101) نهار - داخلى

شفت راضى

الشرطة تقتحم شقة راضى بعد ان فتحت رانيا لهم باب
 الشقة..... أم راضى تخرج مفزوعة من حجرتها على صوت طرق
 الشرطة للباب... هنا يأتى راضى مصادفة فى ذلك الوقت.....
 راضى (بدهشة) خير... فيه ايه يا حضرة الطابط
 وليد انت ملاكش دعوة احنا عايزين وهج
 راضى وهج !!!
 رانيا (تلاحقه) وهج مشيت من زمان باباشا من بعد ما كُتوا
 عندنا هنا آخر مرة بيومين
 وليد ازاي ده اذا كان الراجل ده لسة جاى مبلغنى انها كانت
 هنا حالا ومستلمة شنطة فضى صغيرة من شوية.....
 عطا ايوة والله يافندم انا شايف الراجل بعينيا
 راضى ينظر بدهشة الى رانيا.....
 أم راضى ماقولنالكوا وهج مشيت من هنا من زمان وما نعرفوش
 عنها حاجة وأدى البيت أدامكوا أهه فتشوه لو مش
 مصدقين

وليد يأمر العساكر....

وليد فتشوا البيت كله ودوروا لى ع الشنطة الفضى وهاتوها

ينتشى العسكر فى كل مكان.....

راضى ماهو لو تريحنى حضرتك وتقوللى شنطة ايه دى اللى

بتدوروا عليها

وليد وهج ياباشمهندس استغلت طبيبتكوا وسذاجتكوا وجات هنا

عاملة نفسها دكتورة باحثة عشان تروج افلام عن

الانقلاب ضد البلد والنظام

راضى ماحصلش وانا اشهد بده ياباشا

وليد خليك براها انت ياراضى بدل ماتدبس فى القضية

راضى ليه وعلى ايه... انا افتتاح المحل بتاعى بكرة ان شاء الله

ياريت تشرفنا.....

بس انا أكذلك انها فعلا مشيت من عندنا من زمان.....

العساكر يعودون مرة اخرى من داخل الشقة وخارجها....

عسكرى 1 (من داخل الشقة) مافيش حد جوة ولا فيه شنطة سعادتك

رانيا تقف متوترة متمنية الا يجدوها.....

عسكرى 2 (من خارج الشقة) مافيش حاجة ولاحد ع السطوح ولا فى

بئر السلم

ينظر وليد الى الجميع بحذر حيث انه متعجب لاتفاقهم فى القول....

عطا ينتفض غير مصدق.....

عطا لأ يافندم هى هنا.... انا لسة شايفها والله انا واقف على

مدخل الحارة ماخرجتش منها لحد ماحضراتكوا جيتوا....

باهر دى اكيد مستخبية هنا او هنا ، لايمكن تكون لحقت تهرب

او تخرج من الحارة

يبدأ الشك يتسلل الى داخل وليد من ناحية باهر وعطا.....
وليد انا مش فاهم انتت مُصِرِ اننا ندوروا تانى ليه مالعساكر
 قلبوا البيت كله والحارة كمان واهل البيت كلهم أكدوا انها
 مش موجودة من مدة.... ايه سبب اصرارك هى عملتك
 حاجة وعاييز تخلص منها
 كل تلك المحاولات من اصرار عطا وباهر على ان يبحثوا عنها مجددا
 وتستمر حتى يتركوا الشقة وينزلوا بالحارة.....
عطا صدقنى انا مش كذاب....
باهر احنا لايمن نضللوا سيادتك.... اللى بيقوله عطا صح

مشهد (102) نهار - خارجى أكل

يصل وليد ومن معه من عساكر الى سياراتهم كى يهملوا بالركوب
 والمغادرة.....
 اما باهر وعطا فمازالا مصممين على ان وهج لاتزال
 بالحارة.....
عطا يافندم الحقها هى اكيد لسة فى الحارة مالحقيتش تهرب
 بعيد
باهر حضرتك كده حتضيع قضية امن دولة بايديك....
وليد ومين قالك اننا حنسكتوا.. احنا حنتابعوها واكيد حتقع ،
 هى حتروح فين يعنى....
 باهر وعطا ينظرا الى بعضهما حيث لم يستطيعا افشاء سرهما لوليد بانهما
 ليسا من هذا الزمن وكذلك وهج وانهما لابد وان يعودا زمنهما فى خلال

48 ساعة كما يعلما حتى لايعتبراها مرضى عقليين.....

هنا يأتى صبى فى حوالى الثانية عشر من عمره ومعه الحقيبة الفضية الصغيرة مهرولا ناحية عطا...

الصبى عمو... عمو انت نسيت الشنطة دى ادام شقة الباشمهندس راضى لما كُت بتمسح نضارتك حتى بالامارة ضربت جرس الباب ومشيت علطول وما استنتهوش يفتحوا..... وليد ينظر الى الحقيبة بريبة ثم ينظر الى عطا نظرة اتهام ثم يلتفت الى العساكر.....

وليد امسكوهم.... عطا لايفندم... دى مش شنطتى ولا اعرف عنها حاجة ... صدقت بقى انها لسة فى الحارة..... يافندم صدقتى ده مقلب منها عشان تلبسهالى.....

وليد لم يهتم بكلامه ولم ينظر لهما مطلقا ثم يهم بركوب السيارة... عطا يافندم دى مش شنطتى والله مش بتاعتى حتى اسأل باهر هو اللى جابهالى (ينتفض) لالا لالا يافندم ابدا والله انا معرفش عنها حاجة....

وليد (يصرخ) حطوهم فى البوكس.... اخلصوا (يلتفت للسائق)..... باللا اطلع..... ده انتوا حاجة خنقة

مشهد (103) نهار - داخلي

شقت راضی

راضی یجلس الی المنضدة ویضع رأسه بین یدیه حیث علم بما
حدث وامه تجلس بجانبه اما اخته رانیا فتقف من الجانب الاخر....
راضی کل ده یحصل بسرعة كده وفى غمضة عين.... هی كات
حاسة ان فيه حاجة غلط
رانیا معلى یراضی اللى حصل بقى، اللى حصل ده اثر فینا
كلنا والله والحمد لله انك شفتها الصبح قبل ماتمشى....
راضی كُت عايزها تحضر افتتاح المحل.....
أم راضی أکنها موجودة یاحیبی انا عارفة انك حبیبتها... بكرة ربنا
یرزقك باللى زیها.... کات مالیه علینا البيت والله
رانیا یاللا یراضی قوم... قوم وحاول تركز فى الجای هو
اللى باقى لنا یأخوياً؛ وانت كده كده كُت عارف ان حیبی
یوم ووهج لازم تمشى من هنا... طبعا انت فاهم قصدى
راضی ینظر لها والحزن یملأ عینیه.....

مشهد (104) نهار - داخلي

مكتب وليد

باهر وعطا امام مكتب وليد یقفان وولید یضرب رأسه بیده وكأنه
سوف یجن.....
ولید بقالکوا اکثر من ساعتین ونص بتقولوا كلام مجانيں مش
مفهوم وكل واحد فیکوا بیرمى التهمة ع التانى....
خلصونى انتوا تعرفوا وهج دى اساسا منین وازای وکنتوا
عايزین تنذوها لیه

يا فندم احنا حكيالك حكايتنا اكثر من عشر مرات
وحضرتك اللي مش مصدقنا يا فندم احنا لازم نرجعوا
قبل 48 ساعة ضرورى وبسرعة

وليد
ليه بقى ان شاء الله اشمعنى يعنى وراكوا اجتماع وللا
تنظيم سرى مهم عايزين تلحقوه..... خلاص لعبتكوا
انكشفت

عطا
يا فندم والله كل اللي فاهمه سيادتك ده غلط مش حقيقى
باهر (بلاحقه) وبعدين الطباط عندنا بيحترموا الشعب جدا
وبيتعاملوا معاهم بطريقة مهذبة وارقى من كده حتى لو
مجرمين

وليد
اومال انتوا ايه... شُرفا..... (بغضب) انتوا عايزين
تهلوني ، طباط ايه اللي عندكوا دول... انتوا يامجانين
يا بستهلوا آآآه انتوا بتفكروا تعملوا مجانيين عشان
اسييكوا ، لكن ده بعيد عن قفاكوا...

هنا باهر وعطا يبدءا فى الشعور بالغثيان والدوخة....
باهر (بفرعة لعطا) عاجبك كده شورتك السوداء شكلها غيرت
برمجة المكتبة واحنا اللي حنروحوا فيها
وليد ينظر لهما باستغراب....

عطا
(بخوف ورعب) يعنى ايه اللي كنا ناويين نعملوه فيها
حيثعمل فينا... حنتوهوا فى المكتبة
وليد مازال مستغربا ومتعجبا لما يسمعه منهما حيث انه كاد يصدق انها
بالفعل مجانيين.....

باهر
وافقد الامل بقى ان اى حد من زماننا ممكن يعتر
فينا.....

وليد انتوا بتخرفوا بتقولوا ايه....
عطا (بخوف وارتعاش) يافندم ارجوك تسيينا نرجعوا زماننا
 كده حنتوهوا فى المكتبة لآخر يوم فى عمرنا
باهر (وكأنه يبكى) يافندم ارجوك سيينا بسرعة... احنا آسفين
 ومش حنعملوا كده تانى....
وليد يكاد يجن مما يفعلاه ويقولاه....

عطا احنا مش عايزين رسالة وهج يابروفيسور مقبل
باهر ايوه.. احنا خلاص اتعلمنا الدرس يابروفيسور
 وهنا بيدء عطا وباهر فى الثلاثى تدريجيا من امام وليد.....
 وليد بندهش مما يراه وكأنه ولا فى الخيال أو الاحلام فيبدأ فى فك عينيه
 بأصابعه ثم تبدأ يداه فى الارتعاش حيث انه غير مصدقا لما يحدث امامه
 او يراه.....

وليد ياعسكرى... ياعسكرى
 يدخل العسكرى مسرعا وملبيا....
العسكرى تمام سعادتك.....
وليد (بانزعاج) المتهمين اللى كانوا هنا راحوا فين.....
العسكرى محدش خرج والله سعادتك من ساعة ما دخلوا عند سعادتك
 وفجأة يقع وليد على كرسيه فاقدًا وعيه.....

مشهد (105) ليل - خارجى

امام محل راضى

محل راضى مزين بالانوار والزينات حيث انه يوم الافتتاح ويكتب
 على يافطة المحل راضى اتصالات.....

يقف راضى وبجانبه فتحى وسيد امام باب المحل مستقبليين اهالى
الحارة والناس والزبائن بفرحة غامرة مع تعالى اصوات الغناء.....
اما حمدى فيقوم بتوزيع زجاجات المشروبات الباردة.....
هنا يظهر رجلا جادا يحمل حقيبة على كتفه سوداء اللون حيث
يبدو من هيئته انه من مصلحة الضرائب...
المأمور مين صاحب المحل ده....
ينتبه فتحى لمن يسأل عنه.....
فتحى راضى... واحد بيسأل عليك....
راضى يقترب منه مرحبا به.....
راضى أهلا يافندم أهلا... شرفتنا... اتفضل.. المحل محلك...
كل اللى حضرتك عايزه موجود...
المأمور وهو يبخلق فى المكان كله....
المأمور ماهو واضح... واضح.... انت راضى عبد الصبور
راضى (باستغراب) ايوة سيادتك خير... حضرتك بوليس وللا ايه
المأمور انا من مصلحة الضرائب....
راضى مازال لم يفهم بعد....
راضى طيب يافندم وفيها ايه... برضك أهلا وسهلا
المأمور انت مش مسجل المحل وعامل له سجل تجارى من سنة
تقريبا
راضى ايوة ياستاذ....
المأمور انت ماسمعتش عن قانون الضرائب الجديد
راضى لأ طبعا سمعت وعارفه بتاع مصلحتك اولا مش كده.....
آآآ انا فهمت ؛ لآ ماتخافش من النهاردة حن سجلوا كل
كبيرة وصغيرة وحنقدمولكوا التقرير بالحق والمستحق...
احنا نحبوا نخدموا البلد يابيه....

المأمور يفتح الحقيبة ويخرج اوراقا....

المأمور ازاي يا أستاذ لسة حاتقدم.... انت فايتك تقرير ماقدمتهوش
لحد دلوقتي من تاريخ التسجيل و عليك ضرايب مستحقة
قدرها 65 ألف جنيه

راضى يلطم.....

راضى بالهوى 65 ألف....!!!

فتحى يفاجأ ويتدخل.....

فتحى ضرايب متأخرة ايه يافندى أنت، انت مش شايف ان
افتتاح المحل النهاردة لسة احنا لحقنا نبيعوا وللا
نشترؤا... فيه ايه ياعم.....

المأمور ماليش دعوة الورق اللي معايا بيقول كده
سيد (بغيط) الورق اللي معاك ده تستبله وتستشرب ميته
ياخينا.....

المأمور لم يابه لكلام فتحى او سيد ويكمل كلامه موجه اياه لراضى....
المأمور لو مادفعتش اللي عليك حنعتبروك متهرب من الضرايب
.... وساعتها حيبقى فيه قضية ومحكمة وحكم

راضى (يصرخ) ايه قضية !!! لأ.. لأ.. ده ظلم وافترا... وكانوا
فين مفتشين الضرايب دول طول السنة ماشفناش خلقه حد
منهم ليه يجي يفتش علينا ويشوف بنفسه ان المحل كان
مقفول ومابيشتغلش

المأمور قانون الضرايب الجديد بيتعامل مع العميل بكل ثقة....
احنا سبناك براحتك سنة بحالها وانت مااحترمتش الثقة
دى ببقى لازم نيجوا لحد عندك نطالبوك بحق الدولة ولو
مادفعتش نبلغوا عنك

فتحي هو خلاص مافيش نظر... مافيش رحمة
 المأمور هو ده اللي عندي
 راضى يبدأ فى التراجع للخلف بحزن والم شديدين.....
 راضى برضك لأ... لأ انا مش حادف ولا مليم ووروني حتعملوا
 ايه... حرام عليكوا... والله حرام ، انتوا بتعملوا فينا كده
 ليه... بتعملوا كده ليه.....
 انتى فين يا وهج... ماقولتيلش اخبار الضرايب عندوا
 ايه...
 وهنا تصدم راضى سيارة مارة من خلفه ولكنها ليست بخطيرة فيقع على
 الارض فاقد للوعى فيلتف حوله اهله والناس.....

مشهد (106) والاخير نهار - خارجى

عودة للمشهد (10) على البحر

راضى مازال فاقد للوعى بطريق البحر بمنطقة سيدى جابر حيث
 انه ازداد الطريق ازدحاما واصبح متوقفا.....
 احدهم يحاول إفاقته.....
 فتاة فوق يا استاذ... فوق... محصلش حاجة لده كله...
 قوم دى خبطة بسيطة انت حتفضل متسلبط كده.... انت
 يا استاذ انا مش فاضية ورايا مصالح انت معطلنى كده
 راضى يفيق تدريجيا ويفتح عينيه ببطء وفجأة يجد امامه وهج هى التى
 تحاول إفاقته واعادته الى وعيه ثانية....
 راضى ينتفض من غيمته فرحا بأنه اخيرا قد وجد وهج ورأها مرة
 اخرى.....

راضى وهج... وهج... انتى جيتى تانى.... انا برضك كُنت

متأكد انى حنشوفك تانى

تبتعد عنه الفتاة بارتياح وحذر منه حيث انها شكت ان الصدمة قد أثرت على عقله.....

الفتاة وهج مين ياأستاذ... انا اللى خبطتك بعريبتى وعايضة

اعرف انت كويس وللا أوديك مستشفى

راضى يبتسم وكأنه لم يصدق انها ليست وهج.....

راضى ايه ياوهج انتى نسيتى... مانتى وديتبنى قبل كده خلاص،

وشفت دنيتكوا الحلوة المرتاحة المنظمة..... تعرفسى....

انا مش حاسيبك تمشى المرة دى من غير ماتاخدينى

معاكى انشالله نتوهوا مع بعض فى المكتبة.....

أحدهم ياأستاذ فوق بقى وافتحلنا الطريق.... المكتبة لسة أدام....

الفتاة ياأستاذ الحمد لله انك كويس عن اذنك ممكن اروح شغلى

بقى.... انت معطلنى ارجوك ، ومعطل الناس والشارع

كله مش كده يعنى....

الفتاة تخرج بعض النقود من جيبها....

لو بتعمل كده عشان .. عايز فلوس اتفضل 300 جنيه أهُم

اللى معايا والخمسين دى عشانى

راضى يقف من مكانه وكأنه بدأ يسترد وعيه....

راضى ايه ده ياوهج..! انتى بتعاملينى كده ليه.. فلوس ايه اللسى

بتديهاالى... وبعدين انتوا مش بتتعاملوا بالنقط....

الفتاة نقط ايه يااستاذ حرام عليك ، ثم انا مش وهج ... مش

وهج والله

احد الناس سببيه حضرتهك وشوفي حالك انتى ياآنسة.... معلى مكان
الخبطة بيلوش شوية وبعد كده حيفوق..... خلاص ياآنسة
حصل خير مانتعطلش نفسك انتى... انتفضلى...
انتفضلى....

هنا يكون راضى قد فاق تماما وبدأ يستوعب ما يحدث من حوله حيث انه
ايقن انه كان يحلم اثناء غيبوبته إثر الصدمة وان تلك الفتاة التى كان
يعتقدها وهج هى التى صدمته بسيارتها وحاولت افاقته.....
تقوم الفتاة كى تركب سيارتها ثم ترحل مبتعدة....
وتدريجيا ايضا الناس والسيارات والازدحام بدأ ينقشع شيئا فشيئا اما
راضى فظل واقفا وحده بعد ان انتقل فوق رصيف البحر ينظر لنفسه
ولمن حوله بدهشة وتعجب وهو يقول لنفسه.....
صوت راضى معقول.... معقول كل ده كان حلم من أثر الصدمة ، وهج
وسنة 2100 كل دول كانوا وهم.....

راضى يمشى على رصيف البحر...
لأ... دول كانوا القشاية الللى كُت باتمنى الاقيها عشان
نتعلق فيها ونخلص من الواقع المرده الللى عايشين
فيه....

بس انا مش حافضل واقف مكتف ايدى كده....
لازم احاول واحاول وافضل احاول واعاقر واتفاعل لحد
ما احقق احلامي واحلام اخواتى رانيا وحمدى....
لازم يكون عندى امل واحاول اصلح انا والللى زى عشان
نوصل للحياة الللى شفتها فى الحلم سنة 2100....

النهاية

المحتويات

المحتويات

الموضوع

رقم الصفحة

3 مقدمة الكتاب
	مشهد (1) نهار داخلي "حجرة مكتب مقبل يكتب على
5	الشاشة سنة 2100"
6	مشهد (2) نهار - داخلي "حجرة مكتبة الزمن"
7	مشهد (3) نهار - خارجي "الصحراء"
9	مشهد (4) نهار - داخلي "حجرة مكتبة الزمن"
10	مشهد (5) ليل - داخلي "حجرة نوم وهج"
11	مشهد (6) نهار - داخلي "حجرة مكتبة الزمن"
11	مشهد (7) نهار - داخلي "صاله شقة سيد"
14	مشهد (8) نهار - خارجي "بورصة حلموس"
17	مشهد (9) نهار- داخلي "وحدة التراخيص بسيدى جابر".
19	مشهد (10) نهار - خارجي "طريق البحر بسيدى جابر".
21	مشهد (11) نهار - داخلي "حجرة مكتبة الزمن"
21	مشهد (12) نهار - داخلي "معمل"
22	مشهد (13) نهار - داخلي "حجرة مكتبة الزمن"
23	مشهد (14) نهار - داخلي "حجرة رئيس مدينة العلماء".
25	مشهد (15) نهار - داخلي "حجرة مكتبة الزمن"
	مشهد (16) نهار - داخلي "حجرة مستشفى على أحدث
26	طراز"
31	مشهد (17) نهار - داخلي "حجرة الاشعاع والتحاليل" ..
33	مشهد (18) نهار - داخلي "حجرة مكتب الطبيب"
35	مشهد (19) نهار - داخلي "حجرة مكتبة الزمن"

رقم الصفحة

الموضوع

38	مشهد (20) ليل - داخلي "منزل باهر"
39	مشهد (21) ليل- خارجي "منطقة محرم بك سنة 2100"
	مشهد (22) نهار - خارجي "احدى شوارع محرم بك
41	2010"
43	مشهد (23) نهار - خارجي "الحارة"
43	مشهد (24) نهار - داخلي "بيت فتحي"
45	مشهد (25) نهار - داخلي "شقة راضى"
48	مشهد (26) نهار - داخلي "حجرة مكتبة الزمن"
49	مشهد (27) غروب - خارجي "بورصة حلموس"
52	مشهد (28) ليل - خارجي "الحارة"
52	مشهد (29) ليل - داخلي "شقة راضى"
54	مشهد (30) ليل - خارجي "مديرية أمن اسكندرية"
55	مشهد (31) ليل - داخلي "مكتب الضابط وليد"
58	مشهد (32) نهار - داخلي "حجرة مكتبة الزمن"
59	مشهد (33) نهار - خارجي "الحارة"
60	مشهد (34) نهار - داخلي "مكتب الضابط وليد"
61	مشهد (35) نهار - داخلي "حجرة مكتبة الزمن"
63	مشهد (36) ليل - داخلي "شقة راضى الصالة"
66	مشهد (37) نهار - داخلي "شقة راضى"
69	مشهد (38) نهار - خارجي "بورصة حلموس"
72	مشهد (39) نهار - داخلي "شقة راضى الصالة"
74	مشهد (40) نهار - داخلي "حجرة رزين"

- 75 مشهد (41) ليل-خارجى "كافيتيريا الانفوشى على البحر"
- 81 مشهد (42) ليل - داخلى "داخل تاكسى بطريق البحر"...
- 85 مشهد (43) ليل - خارجى "الحارة"
- 88 مشهد (44) ليل - داخلى "منزل باهر"
- 89 مشهد (45) نهار - خارجى "بورصة حلموس"
- 90 مشهد (46) نهار - داخلى "شقة اللواء هاشم"
- 92 مشهد (47) نهار - خارجى "امام عمارة اللواء هاشم"...
- 94 مشهد (48) مساء - داخلى "مكتب هاشم بالبيت"
- 95 مشهد (49) ليل - خارجى "بورصة حلموس"
- 98 مشهد (50) ليل - داخلى "صاله شقة راضى"
- 100 مشهد (51) نهار - داخلى "مكتب الضابط وليد"
- 101 مشهد (52) نهار - داخلى "مكتب هاشم بالبيت"
- 102 مشهد (53) نهار - داخلى "حجرة نوم رانيا"
- 103 مشهد (54) نهار - داخلى "مكتب مقبل"
- 104 مشهد (55) نهار - خارجى "محل راضى"
- مشهد (56) غروب - خارجى "شوارع واحياء مختلفه
- 105 بالاسكندرية"
- مشهد (57) ليل - خارجى "بكافيتيريا لمحل مثلجات
- 106 على البحر"
- 110 مشهد (58) نهار-خارجى "محطة ترام كليوباترا حمامات"
- 111 مشهد (59) نهار-خارجى "سيارة نانا بشارع ابوغير المزدحم"
- 114 مشهد (59) نهار-خارجى "سيارة نانا بشارع ابوغير المزدحم"
- 115 مشهد (61) نهار - داخلى "مستشفى الجامعة"

116	مشهد (62) نهار - داخلي "عنبر مرضى بالمستشفى"...
122	مشهد (63) ليل - خارجي "بورصة حلموس"
124	مشهد (64) ليل - داخلي "قاعة الفرح"
128	مشهد (65) نهار - داخلي "مكتب هاشم بالبيت"
129	مشهد (66) ليل - خارجي "كافيتيريا الانفوشي"
130	مشهد (67) ليل - خارجي "بورصة حلموس"
131	مشهد (68) ليل - داخلي "شقة راضى"
133	مشهد (69) ليل - خارجي "كافيتيريا مطلة على البحر" ..
136	مشهد (70) نهار - داخلي "مكتب هاشم بالبيت"
137	مشهد (71) ليل - داخلي "بهو شقة هاشم"
139	مشهد (72) نهار - داخلي "شقة راضى"
142	مشهد (73) نهار - خارجي "بورصة حلموس"
143	مشهد (74) نهار - خارجي "خارج الحارة"
145	مشهد (75) نهار - داخلي "شقة اللوا هاشم"
147	مشهد (76) ليل - داخلي "شقة راضى"
148	مشهد (77) نهار - خارجي "امام بيت فتحى بالحارة"...
148	مشهد (78) نهار - داخلي "باب شقة فتحى من الخارج" ..
149	مشهد (79) نهار-خارجي "ممر ضيق بين بيوت الحارة"
151	مشهد (80) نهار - داخلي "حجرة المدير المسئول"
152	مشهد (81) نهار - داخلي "شقة راضى"
154	مشهد (82) نهار - خارجي "امام محل راضى"
156	مشهد (83) ليل - داخلي "شقة فتحى بكليوباترا"
156	مشهد (84) نهار - داخلي "شقة فتحى بالحارة"

158 مشهد (85) ليل - داخلي "حجرة رانيا"
159 مشهد (86) نهار - خارجي "جليم على البحر"
161 مشهد (87) نهار-خارجي "ارض فضاء بالكينج مربوط"
163 مشهد (88) ليل - داخلي "شقة راضى"
165 مشهد (89) نهار - داخلي "مكتب الضابط وليد"
166 مشهد (90) نهار - داخلي "حجرة مكتبة الزمن"
166 مشهد (91) نهار - داخلي "حجرة مكتب مقبل"
167 مشهد (92) نهار - خارجي "كافيه بسان ستيفانو"
168 مشهد (93) نهار - خارجي "الحارة"
169 مشهد (94) نهار - داخلي "امام شقة راضى من الخارج"
170 مشهد (95) نهار - داخلي "مكتب الضابط وليد"
172 مشهد (96) نهار - داخلي "شقة راضى"
175 مشهد (97) نهار - خارجي "الحارة"
175 مشهد (98) نهار - داخلي "شقة راضى"
176 مشهد (99) نهار - خارجي "فوق سطح المنزل"
176 مشهد (100) نهار - خارجي "الحارة الخلفية"
177 مشهد (101) نهار - داخلي "شقة راضى"
179 مشهد (102) نهار - خارجي "الحارة"
181 مشهد (103) نهار - داخلي "شقة راضى"
181 مشهد (104) نهار - داخلي "مكتب وليد"
183 مشهد (105) ليل - خارجي "امام محل راضى"
 مشهد (106) والاخير نهار - خارجي "عودة للمشهد"
186 (10) على البحر"



رقم الإيداع : 2011/5826

الترقيم الدولي : 978/977/327/876/5


مع تحيات

دار الوفاء لدنيا الطباعة والنشر

تليفاكس : 5274438 - الإسكندرية







Bibliotheca Alexandrina



1126339